

姚伯昂紅戲館藏書

九國志 上冊

道光十四年癸甲午上元次日與徐星伯同年游廠肆購此伯昂記



九國志卷一

吳太祖以唐景福元年再入揚州至睿帝天祚三年  
為南唐所篡蓋晉天福三年也歷僞四主凡四十年

年六

太祖姓楊名行密初名行愍字化源廬州合肥人唐中  
和三年起兵為亂光啟三年入揚州自稱淮南留後景  
福元年七月再入揚州唐以為淮南節度使乾寧二年  
封宏農王天復二年進爵吳王天祐二年十一月庚辰  
薨年五十四謚曰武忠武義初改謚曰孝武王廟號太



宋

路

振

撰



Faint vertical text on the right side of the page, possibly bleed-through or a secondary title.

祖乾貞元年追尊為武皇帝陵曰興陵

烈祖名渥字承天行密長子唐天祐二年冬嗣位五年五月戊寅為張顥徐溫所弒年二十三諡曰威武義初改諡景王廟號烈祖乾貞元年追尊為景皇帝陵曰紹陵

高祖名隆演初名瀛又名渭字鴻源行密第二子唐天祐五年五月己卯嗣位十六年建吳國改唐天祐為武義元年二年四月己丑薨年二十四諡曰宣乾貞元年尊為高祖宣皇帝陵曰肅陵

睿帝名溥行密第四子武義二年六月戊申嗣位改元順義乾貞元年稱帝天祚三年禪位南唐昇元二年十月辛丑薨年二十八追諡曰睿皇帝葬平陵凡改元四順義六年乾貞二年太和六年天祚三年

### 袁襲

襲廬江人少好學善屬文洞明緯象秦畢之亂高駢辟行密為行軍司馬俾率所部赴難行密猶豫不行龍言於行密曰高駢倦於政事聽惑妖妄彥等雖以誅呂用之為名觀其事乃以暴易亂耳寧知非天將贊於公耶

行密善其言乃移檄諸州誘集徒衆將兵數萬長驅至廣陵秦畢害駢襲勸行密縞素舉哀於城下衆皆義之及破賊入城招輯編戶會孫儒兵至行密問計於襲曰今城壁未完賊且盛若儒至圍城是重擾民也不如且避之先是海陵將高霸擁衆來附行密將令以兵屯天長扼儒來路襲謂行密曰霸擁大衆心持兩端若使居天長是自扼也可因犒其士卒擒而斬之行密遂斬霸而併其兵行密聞孫儒至復欲遁歸海陵襲曰不若歸合淝繕甲兵再議攻取今稽諸乾象公必再來及孫儒

逼城行密果自天長返謂襲曰無子吾幾不得歸行密平宣州獲趙鏗留與其弟同館鏗與梁祖有素果遣使來求鏗時襲寢疾行密使人問襲曰但斬首送之必無慮也未幾卒襲剛忍好寇每欲殺人必折節下之行密哭之曰吾每恤刑而襲好殺享年不永深可哀也

### 劉威

威廬州慎縣人少為小吏豪爽有志節與田頔陶雅俱為行密奔走之舊人行密起淝上及平秦畢有功表領賓州刺史大順初與安仁義敗孫儒別將劉建鋒於武

進其後儒兵益集威與頽屢為所敗行密將歸銅官威  
曰今眾寡勢殊殆難與爭然儒焚室掃壘絕後而來糧  
若不繼何從供饋公宜勿與戰堅壁以禦之坐待其弊  
行密然之儒果敗乾寧初表授廬州刺史及行密承制  
封拜就遷淮南節度副使行軍司馬東西行營副都統  
未幾加使相天祐三年授鎮南軍節度使撫州危全諷  
率虔吉撫信之眾十餘萬將復鍾傳舊地時州兵無多  
士庶大駭威獨傲然日縱酣飲全諷屯象牙潭不敢輕  
進及周本破全諷四州初平渭令威巡視四境撫諭而  
還先是行密疾病問周隱以後事隱以威為請威初聞  
不能無意及移鎮鍾陵復多專刑徐溫請討威聞之  
沮喪計無所出有幕客黃訥謂威曰公受謫雖深及本  
無狀能挺身入覲必解前疑也威曰善遂遣訥為先容  
渭果復令之鎮天祐十一年卒於鎮年五十八

陶雅

雅字國華合肥人本儒家子儀形魁偉眉目甚秀乾符  
中天下將亂始投筆和門會西蕃入寇徵四方兵防秋  
西夏雅與行密淝上軍偕往未幾隸諸葛爽征沙陀有

功從爽鎮河陽還補廬州衡山指揮使行密據合肥遣  
雅平鄉盜秦定過脩己等遷八營主將光啟初破桐城  
吳迴擊李本於柘子山乘勝攻舒州下之以雅為舒州  
刺史為蔡盜許勅潛兵夜至雅奔歸文德初從行密破  
趙鏗授池州刺史大順中破孫儒軍於人頭山儒卒授  
常州刺史遷池州團練使田頔攻歙州時給事中裴樞  
守新安將歸歎於行密以宣州副使魯邵往代之是時  
諸將授郡鮮不以虐斂為事惟雅寬厚人多便之樞因  
遣問政山人聶師道往說頔曰苟得池陽陶牧為守州

人孰不承命頔驛報行密因令雅治新安入見樞盡州  
郡禮樞奇之及樞至京師奏雅為歙州刺史天福三年  
田頔以宣州叛雅以州兵勅臺濛伐之頔出戰橋陷墜  
馬為帳下小卒許渥王綬所殺宣州平兼西南面招討  
使先是順義軍使汪武聚盜據婺源行密以為滁州刺  
史婺源歙屬邑武恃險未嘗謁雅及頔叛武多行剽劫  
至是雅移檄聲言討洪饒由婺源往武引弟姪十餘人  
就路迎謁雅顧左右擒殺之緩轡入其營中無敢動者  
天祐初陳詢以睦州歸歎吳越遣萬衆攻詢雅率兵救

之軍士夜驚多踰營遁去將吏白雅欠伸不應乃下令  
曰明旦有軍士不在營者俱斬果逋相傳告未頃而定  
明年破婺州虜越州刺史沈夏以功遷衢睦團練使江  
南郡招討會宣州王茂章叛奔越雅虜茂章伏兵斷其  
歸路乃令大將軍金師會領睦州事遂班師新安而越  
兵大至衢睦婺三州復沒八年移鎮武昌雅利黥川殷  
阜上書請之遂遙領武昌軍節度加同平章事知歙州  
團練觀察等事十年八月卒於任年五十七雅性沉靜  
好讀書手不釋卷雖臨陣敵常褰衣博帶自幼年戲弄

未嘗有錐刀傷手及為大將每天石交飛終莫能中接  
賓佐有禮事兄弟以孝敬非公宴不舉音樂踈財重士  
人以此歸之典黥川二十餘年民感其化生男女或以  
陶為字焉

### 李神福

神福涪州人幼執親喪哀毀過瘠鄉里異之及長沉厚  
勇敢唐末四境交募勁兵因隸上黨軍籍時高駢兼諸  
道行營都統神福從州將王重屯淮海因投於行密中  
和中同安賊陳儒攻刺史高瀆遣使來告行密未能救



謀於神福對曰此羣盜烏合易與耳公但聲言赴援可不勞刃弓矢又為公解之乃請本軍旌旗間道以入既夕引州兵出外各持旌旗入列大陣之狀儒果夜適行密大奇之光啟二年壽州張翱叛寇淝上神福率兵與戰敗之於楮城秦畢之亂高駢召行密因遣神福諭曲谿劉金盱眙賈令威各以義兵來附破秦畢軍神福功居多會選卒為黃頭軍遷神福為左右黃頭都尉龍紀中涇縣王賞太平稔常滿俱聚盜剽鄉里神福引兵破之但誅其首惡餘皆不問大順二年孫儒前鋒兵屯溧水行

密遣神福將兵禦之神福謂諸將曰兵倍不戰况儒衆十倍於我當且避其銳以驕之乃退舍而儒衆果怠神福乃選銳卒躋險夜襲之果大潰又擊儒要山寨破之擒其將李宏以功改左游弈將銅官鎮過使田頔為孫儒所敗行密欲退守銅官神福諫曰儒掃境而來利在速戰宜堅壁清野以老其師神福願以本軍據險結柵時出輕騎抄其糧運彼前不得戰退無儲糧此速克之道行密曰善因以神福為宣池兩路都游弈使是夏儒食盡果敗以功奏授左千牛衛將軍景福二年廬州刺

史蔡儔叛遣何瓌來寇神福逆擊於青斗山大破之遂  
傳城下賊平遷左衛都校未幾授舒州刺史天復元年  
與呂師造攻臨安錢鏐使顧全武來援神福退師令羸  
老先行又令師造設伏青山路自將一軍殿後夜未半  
全武果盡銳來追神福偽北走伏軍發前返來攻越軍  
大敗擒全武復攻臨安久不克先是神福遣使護鏐先  
塋禁其樵採及獲全武又遣通家問越人皆感之因納  
其犒賂而返二年改昇州刺史行密以女妻其子承鼎  
三年攻杜洪於鄂州大敗洪軍時城中積荻山上神福

謂將軍曰今夜焚此諸將皆不測是夕遣人乘舟載火  
炬至灑口夜分焚樹偽為梁軍來援之狀城中焚荻應  
之諸將服其智梁祖遣將韓勅率步騎萬餘屯灑口又  
令荆南以舟師赴援成汭盡衆浮江而下神福登岸望  
之曰舟人雖盛然首尾懸絕宜急擊之乃迎戰大別山  
汭果敗溺水死勅亦引衆遁去自是洪勢益孤會宣州  
田頔叛襲昇州劫神福輿帳下妻子俱歸宛陵厚養之  
以誘神福行密急書召神福覽書袖之揚言曰鄂州尚  
未下又令急取荆南因弭令諸軍速圍順流而下頔遣

將王壇汪建以舟師援洪又別遣人遺神福書約分地而治神福斬其使擊壇建破之復戰於皖口又敗其衆浮尸棄舟蔽江而下壇建以輕舟遁去四年以兵屯田梁加西面行營招討使光州團練使疾甚求醫於江都卒年五十

### 臺濠

濠字項雲廬州合肥人少為金牛鎮將行密據合肥始來歸從征秦畢趙錕俱破敵有功大順中馬敬言為孫儒敗於廣德初儒與李從立乘勝至東谿時城守未固

軍士大恐濠以一旅巡谿西會天晦詐令士卒傳諭往返者數四謂大衆屯集中夜皆遁去及儒柵陵陽濠於魯江五堰作輕舟饋糧於儒之世軍無饑色從行密歸廣陵以功遷楚州刺史乾寧三年破蘇州以濠守之越人水陸大至濠擊敗之錢鏐親率舟師至會糧盡濠拔衆遁歸光化二年行密初得朐山以濠為海州刺史在任貪殘為郡民所訴又為田頔所譖降為漣水制置使天復三年田頔叛於宣州行密歷數討將年敵頔乃謂濠曰此公莫可濠曰頔不守富貴自取滅亡濠今仗

大王威武以順翦逆往必擒願願王年慮行密大悅濠  
初入其境即翻陣以往軍士俱笑其怯濠曰願宿將多  
謀當自過防翌日果遇陣於廣德濠欲奪其銳先以行  
密書遺願將校皆下馬拜受因其擾亂濠麾眾擊之願  
兵大敗乘勝遂圍宣城冬十月願出州外求戰登橋馬  
墜為外軍所殺宣州平行密承制加濠檢校太保宣州  
觀察使天祐元年卒於治所年五十

張訓

訓字克明滁州清流人身長八尺餘腰帶十圍中和三  
年歸行密於合肥行密訪以方畧悅之令從右令言攻  
同川克其城從田頔擊張翱於楮城入擊趙鏗昌山兵  
破之克宣州訓功居多遷左右黃頭指揮使以所部戍  
廣德拒孫儒於黃池從李神福襲歷陽下滁州孫儒焚  
廣陵志銳攻宣州行密令訓潛軍入廣陵滅其餘燎獲  
軍儲數十萬以賑饑民行密令馬爽守廣陵爽叛為諸  
將所殺城中大囂訓整師以出眾乃定孫儒之起也毗  
陵守將劉建鋒從儒俱西土豪陳可兇據毗陵訓率兵  
奄至城下可兇倉卒出迎訓於馬上手刃殺之奪其兵

入城中又率兵絕儒糧道於安吉馬頭儒敗訓論功為  
最景福元年從行密歸江都路經毗陵行密顧左右曰  
毗陵大城也訓一劍下之不亦壯哉即授温州刺史乾  
寧二年屯兵漣水以備梁師劉知俊聚糧石碣戍守皆  
潰盡焚其儲積訓歸路出東海為知俊所邀訓擊大破  
之清口之役吳師悉起訓帥所部迎行密行密以喜兵  
千人令為前鋒會朱瑾假梁人兵鋒先入其壘訓登岸  
疾戰踰柵而入遂破龐從軍以功授淮海游弈使天復  
三年王茂章平密州以訓為刺史會梁祖以大軍至訓

謂諸將曰城孤師少何以待之皆欲焚城掠聚而去訓  
曰不可如此則我師難歸遂封府藏下懸門立虛幟於  
城上遣老弱居前訓自以銳兵殿其後梁軍前鋒至見  
城上旗多未敢逼數日方入城又見府庫城邑晏然如  
故亦不追之天祐七年遷黃州刺史卒於治所訓質直  
勇而多力曾渡毗陵西橋馬畏不渡乃將尾鬣舉之以  
濟然不恃其勇故多功保全焉

### 李遇

遇合肥人始事行密帳下光啓中禦梁軍於慎縣遇單

騎按槩率先破衆以伍長遷馬軍副指揮使從平秦畢  
趙鏗孫儒皆有功遷淮南馬步諸軍都尉累遷常州刺  
史天復三年安仁義以潤州叛夜襲毗陵仁義善射諸  
軍多畏避遇背城逆戰仁義喪師自是不敢東顧天祐  
中宣州王茂章奔越乃以遇為淮南行軍司馬宣州團  
練使徐溫專政遇不能下之常言曰徐溫何人吾所未  
識溫怒命柴再用將兵送王壇代遇不受命再用攻其城  
逾月不克時新王遣典客何蕘說遇曰公本圖反請斬  
蕘以徇本無反心可隨納款遇聞王命遂開門委命溫

族之孫仁義方嬰為人匿之而免李昇秉政以仁義為  
縣令

### 劉金

金淮陰洪澤人光啓中江淮兵亂後鄉酋李章保曲谿  
章死金代有其衆行密營廣陵金盡以其衆來附破秦  
彥金有力焉文德初從攻趙鏗於陵陽明年金度鏗必  
遁思以計擒之因偽與鏗通好約為外應鏗大以金帛  
為遺復夜迎金入卧內許妻以女金歸營慮鏗兵盛出  
不能制乃遣人臨城大譟云劉郎不能與爾為女婿也

鏗聞之沮喪果宵遁大順中孫儒寇宛陵行密遣金拒  
之屢敗儒軍以功授滁州刺史行密破鏗金移濠州刺  
史未幾遣團練使天祐二年卒子仁規嗣仁規娶行密  
女渥襲位遷過口兩城使乾貞初授清淮軍節度使

### 秦裴

裴慎縣人少驍勇頗喜獵以鷹隼為事嘗云天上黃鷹  
地下黃金餘不足貴也行密起合肥因隸帳下大順元  
年奏授檢校左散騎常侍行密據廣德以裴知揚子縣  
有虎入縣郭裴親殺以獻行密召褒賞之裴曰此眾共

殺非獨能制也行密歎曰勇而能謙必享富貴歷高郵  
無錫令俱有能名乾寧五年率兵破越崑山鎮以千兵  
守之錢鏐遣顧全武以萬眾來復裴援絕全武以檄說  
裴封函納款全武頗自負召諸將聚觀全武曾為僧  
發函乃佛經一卷全武大慚裴戰無虛日士卒多病傷  
死未幾糧盡告降錢鏐預設千人食以待之及出士卒  
不滿百鏐讓之曰軍孤眾寡何苦相拒裴曰但事君盡  
節死而後已今食盡歸命非本志也鏐大賞之因熟視  
裴曰君有藩侯相他日必歸君餘勿為念裴在越三年

寔無歸耗忽一日裴遣人告行密遣李神福攻越臨安  
鏐遣顧全武方宇救之為神福所擒明年行密送全武  
及宇易裴以歸天復三年從李神福攻鄂州荆南成汭  
乘大艦來援裴率兵汴流逆戰汭敗溺水死又攻田頔  
衆於吉陽磯以功授諸軍都尉從劉存攻夏口破之加  
昇州刺史天祐三年洪州鍾傳辛州人立其子匡時江  
州刺史延規傳之養子恣不得立以其郡納款因授裴  
西南面行營招討使攻匡時至蓼州時軍欲限水為柵  
裴不聽匡時果遣將劉楚據之詎將相顧失色俱咎裴

裴曰城中驍銳惟楚耳若令總衆拒守此城何由卒破  
吾固留此要害以謀致之既而分軍晨出盡銳破柵既  
擒楚方傳於城下未幾城陷擒匡時以獻詎將皆服其  
智弼令嚴肅兵士不敢殺戮洪之士卒俱來就營求其  
戚屬為出府帛贖還之洪人感悅授洪州制置使張顥  
用事慮裴為變急召歸及湖口遇鄂師劉存與潭軍戰  
沒復授裴鄂岳觀察使會重午裴宴諸將而潭人入寇  
裴遣弟師鐸師虬乘戰艦先往裴食訖登黃鶴樓以望  
乃以平頭舫顧小校曰但乘此卷旗奪潭人船以戰及



與師鐸軍合乃建大將旗潭人愕眙裴因擊敗之六年  
入覲因求歸故里以民禮謁縣宰見里中故老必拜坐  
以少長為齒九年加武昌軍節度使遇疾求歸至潁中  
卒年五十九裴在治七年積軍儲二十萬開青山大冶  
公家仰足

### 馬珣

珣廬江人少驍勇有機畧初以貨財商於江都會秦畢  
圍城乃歸鎮鄞軍畢師鐸於城南立高樓以望城中呂  
用之患焉募壯士摧其樓珣應募夜半獨仗劍入賊營

例之用之厚賞還十餘級行密入城聞其名錄為偏將  
與朱延壽相友善乾寧初授珣舒州刺史移守漣水三  
年梁將朱友恭圍翟章於黃州命珣率兵援之黃州陷  
戰不利與張訓呂師造成知進石率等收散兵三百人  
自黃州間道緣分寧絕山谷而東道經撫州危全諷聞  
其來布四壘於路壘皆萬餘人珣語珣將曰彼謂我可  
坐傳也今與汝將擊其中堅逐其軍帥取其資而食其  
穀可以歸矣會夜擊全諷之壘大破之全諷僅免乃飲  
宴於賊營擇其利兵而用之明日廣張旗幟揚麾伐鼓

後山直下衝其連營鋒若雷電賊皆潰走珣凱唱而歸  
謁行密言其戰狀行密罵之曰儒豎子儒何不遂據其城  
珣拜謝不敏珣滑稽好妓樂歌舞雖出師騎登俳諧不  
輟既而卧疾謂所親曰若患愈當乞師數千可以蕩平  
西南夷獠俄而卒衆惜其智勇部下將校見其二子無  
不感悅申敬朱延壽錄其孤而字之延壽敗行密收其  
二子給與第宅

劉存

存陳州人少拳勇從行密起合肥破秦畢趙鏗皆有功  
孫儒入寇身先苦戰為賊斷足三指而戰不輟翌日行  
密出城與儒戰存請先登行密諭以指痛不止因求皮  
履裹足而往是日午儒以功遷壽州馬軍都尉乾寧中  
預破葛從周於潁河邊舒州刺史改團練使天福中副  
李神福攻杜洪於江夏會田頔叛遣將汪建王壇率舟  
師沂流而上存與神福下瀝池磯逆戰為流矢中目存  
戰自若建敗存殺獲居多四年復攻江夏時神福病歸  
存代為招討使引十數騎巡城憇於高岡張樂命飲酒  
酣鄂兵大至存以旗向江三招而止鄂人望之化然有

頃自退軍中服其胆畧存急焚鄂城樓梁援兵將突圍  
而出許將欲急擊之存曰擊之賊必復入復入則城愈  
固矣不若聽其遁去許將皆曰善是日城陷捨杜洪父  
子斬於廣陵市以功授淮南行軍司馬鄂岳都團練使  
天祐三年率舟師攻潭州大雨不止軍回至瀏陽為潭  
人所敗執存以歸馬殷親解其縛欲授以官存大詬曰  
汝昔歲宣城潰散偶漏我鋒刃今反欲臣我耶殷知不  
可留乃斬之唐保大中邊錫予湖南遣使就墳致祭贈  
宣武軍節度使武衛上將軍

### 李簡

簡上蔡人有胆勇姿質環偉始隸陳蔡軍中趙錕選武  
幹之士因任為帳下親信龍紀初錕為行密所圍糧盡  
將逸簡給守門者得出因奔行密補黑雲隊長大順二  
年孫儒寇廣德行密將逆戰會夜屯於行密柵及旦儒  
軍圍之數重率百餘人挺身突戰自外破柵拔行密以  
出遷黑雲都指揮使乾寧二年後攻濠州濠水深濶簡  
手卷重甲口銜大刀先渡踰壘破其閫鍵捨刺史張遂  
以獻後攻壽州加淮南右廂馬步軍都虞侯先是江都

多盜令雖嚴莫能禁止及是為簡獲者必詢其部分姓名所盜之物盡黥於面於是盜竊皆息三年後田頔破蘇州虜刺史成及從行密破龐從於清口敗梁軍於淝河副王茂章援青社從臺濠圍田頔於宣州皆有功簡本姓陳既貴欲復其氏行密謂之曰天下皆知有李簡何更有陳簡也以是不易渥襲位王茂章將以宛陵叛命簡率眾攻之茂章聞簡至率眾奔越改楚州團練使杭人屢寇錫以簡為常州刺史改鄂岳觀察使天祐十二年授武昌軍節度使武義初加鎮西大將軍襲復州破之倖知州鮑唐以獻乾貞二年加西南面招討使入覲卒於采石江年六十九簡鎮上游之地十餘年重固洞啓敵人不敵侵軼然忍而好殺又非法重斂鄂民之高貴无不破產時論以此鄙之

### 柴再用

再用蔡州汝南人性至孝七歲遇龐勳亂舉族避地祖訓瞽不能去惟再用獨留侍賊見而去之以是大為鄉里所異及長沉毅有斷面黑如鉄人號為柴黑子會秦宗權召募驍勇再用以騎射應選時軍令亡馬斬一

日戰回籍疆而寢既寤而馬逸再用追之遇賊於林中  
環樹而射一發人樹俱貫賊畏走遂奪馬而歸光啓中  
從孫儒攻廣陵再用本名存與嘗軍中小校結為死友  
曾有告小校謀反儒斬之執再用至儒問何故反再用  
不對及伏鎖又問之始對曰某與彼相結為死友反則  
同反耳公既誅之復何向焉儒奇之曰汝果不反吾再  
用汝因令改名再用儒敗歸行密授先鋒馬軍指揮使  
乾寧中朱延壽辟為衛將因遷壽團練都押衛敗梁兵  
於壽春遷團練副使從延壽平劉存於弋陽授光州知

軍州事一日大震電家人皆伏匿再用當戶坐不動俄  
見青襦袴七四人昇再用所坐牀出庭中復大震屋楹  
折有龍出焉梁兵寇光山再用擊走之以功遷光州刺  
史天祐二年梁祖平趙匡凝於襄漢乘勝畧淮上遣使  
謂再用曰苟以城降遷以蔡州本郡為賞再用乘圍而  
拜曰此州城小衆寡王若先下壽州回當自送款梁祖  
信之攻壽州不拔而還再用襲之斬首二十餘級以功  
加檢校太保渥襲位遷楚州刺史俄授淮南左廂步軍  
都指揮使越人寇東州遣再用率兵禦之賜長稍五十

戰敗艦破水滿再用為長稍所泛得不溺衆人聞敗飯  
干僧為禱再用戰歸取其飯召麾下以賜之曰此輩濟  
我佛何力之有十一年袁州劉崇景叛引潭將許真為  
援令再用攻之近城有萬勝岡再用欲奪之每旦出師  
岡下不與戰袁人頗怠一日列大陣岡南崇景望之氣  
奪因出戰再用躍馬徑入陣中斬首數十袁人大敗崇  
景棄城而遁武義元年破越軍於乞錫遷鎮西將軍領  
天平軍節度使未幾移鎮武昌改德勝軍節度加中書  
令卒年七十二再用寬厚淹雅有儒者之風好讀左氏

春秋未嘗省視厨廡寮屬白事有不如意但對之假寢  
諸子娶聘必擇平昔舊族史官王振請述戰功以補方  
冊再用曰鷹犬之效出自偶然何足紀也累歷藩鎮敦  
尚儉素車馬導從不過十人亦一時之良將也

### 陳璋

璋潁川人少橫壯不羈歷事諸帥俱無成乃歸行密未  
幾復委質於錢鏐景福初授杭州武勇都指揮使改鎮  
海軍踏白使乾寧中領賓州刺史從平董昌詔賜佐忠  
去偽功臣天復二年鏐將許再用叛據外城召田頔為

後顏將樹柵於杭州咽喉之地鏐乘圍觀之大懼出金  
綵十輦募法將有能奪其地者與之乃以顏為賞璋應  
募選驍健三百假護軍白馬以出免胄馳擊往返七數  
四竟奪之鏐大喜飲之巨觥即授璋衢州刺史與軍校  
葉讓不協因斬之與睦州陳珣連衡復歸歛於行密鏐  
以兵圍其州踰月不能出行密遣周本援之拔璋盡室  
以歸天祐二年行密遣陶雅平婺復授璋衢婺州諸  
軍事充都招討副使會王茂章叛雅棄其地改璋池州  
團練使署淮南節度副使越將張仁保陷東州授璋水

陸行營都招討使擊仁保於海曲奪戰船三百艘盡復  
東州舊地復乘輕舟入松江九谿偵邏越師大集團之  
數重璋獨射柁工心目皆應弦而倒因奮銳衝擊長圍  
遂解軍回泊洞庭見橘林意欲除之謂士卒曰若食鱸  
用此木研醖酪不假他物自有香辛味諸軍皆爭取樹  
立盡凡年以舟師破岳州擒刺史苑玫荆人潭人會於  
江口邀璋歸路璋乃方舟並貫夜過其所敵人後出已  
無及矣璋每入敵境或晚泊戒士卒整舟楫待令下當  
行必此宿軍之所也若移帳下岸脩棚習射及夜多前

去越兵寇上饒璋引兵侵蘇湖上饒之兵乃解乾貞元  
年加鎮江大將軍領平盧軍節度使溥遣王彥章苗濇  
舉兵西伐璋謂嚴可求曰朝廷攻湖湘何不用璋與周  
本彥章與濇可當其偏裨耳其後彥章果敗三年加使  
相太和二年改鎮東將軍充寧國軍節度使遇疾歸江  
都求醫至江陽縣卒年六十五

侯瓚

瓚字信美城濮人黃巢聚兵於曹濮瓚從之時年十六  
巢陷京師瓚逃歸鄆州時僖宗幸蜀徵十道兵討巢朱

瑄以鄆兵應命瓚為偏將預行尋復與諸道兵伐秦宗  
權皆以勇果聞頃之隨瑄弟瑾襲兗州瓚與瑾逆殺齊  
克讓破宿州瑾據有兗州瓚為爪牙梁祖攻兗州力戰  
以卻梁兵梁祖圍時溥於徐州兗鄆兵救之不利溥死  
梁兵進攻兗鄆戰於城下者數年長圍三合而三卻之  
時瓚常在瑾之左右大小數百戰隨瑾搏擊馳突出入  
敵中殺傷不可勝計乾寧四年隨瑾與太原將史儼掠  
徐泗瑾將康懷貞以兗州叛瑾無所歸與瓚等率兵數  
千走海州遂來歸行密授瓚衙將是歲梁祖大舉兵伐



吳龍從與聶金率眾入自清口葛從周以精甲圍壽陽  
江淮大恐行密以兵數千會戰於清口時起兵倉卒加  
以陰寒戰士皆攘食飲雪而行甫及梁營則豎戈植足  
鬪志未決瑾與瓚率五十餘騎潛濟淮入自壘北舞梁  
而馳囂聲雷沸梁兵皆殞眩不能舉遂斬龍從大將軍繼  
之死者大半鳴鼓而行破葛從周於壽陽沉其卒萬餘  
人於淝河梁人大震瓚功為多授左右隨從騎軍副使  
隨王茂章救王師範於青州破梁兵五萬餘殺友寧瓚  
復有功從周本攻蘇州戰於黃天蕩從徐溫卻王景行  
於壽陽逐劉崇於袁州朱瑾救徐州之圍及攻潁州瓚  
皆預戰累授滁州刺史太和三年卒年七十

朱景

景壽陽霍邱人少豪猾驍壯有膽畧為邑中所服行密  
得淮南以霍上地界南北盜賊交會難可防限聞景之  
勇為遠近所畏故以委之且伺北鄙之奔突景招合無  
賴少年得絕伎者百餘人撫禦之晝與捕獵暮分巡警  
月餘而材力疆力無有及景者以是服從如一沿淮羣  
盜莫敢犯之梁祖聞其名命彥卿率勁騎三千

澤中射死者無數彥卿兵折刀殫而去康懷貞之至復  
為景所困王茂章乘來寇渡淮水可涉處立表識之景易  
置於深潭水中立表浮木之上茂章軍敗望表而涉溺  
死者大半積其尸為京觀後破李進金阿駢涉騎數千  
尋拜滁州刺史移光州刺史卒於任

張崇

崇廬州慎縣人少以伉勇隸軍籍光啓中始補戎職從  
行密破趙鏗有功乾寧二年行密攻蘇州崇為越人所

獲行密欲嫁其妻曰崇忠孝必不負公請待之未幾  
崇果返以為諸將都尉遷蘇州防遏使越人攻蘇州崇  
從臺濠敗越兵於小白方天復中安仁義叛崇與茂章  
率兵攻之揜仁義以功授常州刺史累遷廬州團練觀  
察處置等使天祐十一年加檢校太傅光州軍校王言  
叛崇討平之授平南軍節度使武義元年加安西大將  
軍梁祖遣將合湖南兵攻荊州以崇為應授招討使引  
軍攻安州降其騎兵二百而還遷德勝軍節度使加中  
書令太和中封清河郡王卒於治所年七十二崇殘酷

暴斂淝人畏之嘗入覲議者盛言不返塵市少年皆將  
髯相慶崇歸聞之因斂將髯斂數萬貫尤好使酒殺人重  
掌奏刁鎔每謂左右曰吾醉慎勿令鎔出一日醉甚三  
召鎔至竟殺之詰旦召鎔左右曰已殺矣崇大悔取其  
首視之揖曰罪過負外其輕人命如此頗信鬼神家人  
求以厭息崇者先是后土廟塑韋安道配座乃遣巫女  
詐云天上謫后土與公為偶崇往視之巫女潛洩異香  
以為后土至矣崇乃命樂對像酣飲一夕家人竊其兵  
器盡寘廟中巫女報曰列仙不喜殺戰故遣兵丁取去

公不得更用此傷害崇因是大為改悔歷藩鎮二十年  
掠下以奉上每歲一人覲輸貢絡繹國中執事無不受  
賂故其肆害陵下保全祿位終身為橫耳

### 王綰

綰廬江人勇敢有謀光啓中始從行密破趙鏗下蘇濠  
累有戰功署行營法軍都尉兼漣水防遏使光化三年  
青州戍將陳漢賓殺海州刺史牛從義歸款於行密行  
密命綰與張訓率勇士二千乘勢未附襲之漢賓設備  
不暇果出迎謁遂入府中諭以利害漢賓乃解甲聽命

以功授檢校左僕射是歲青州王師範告沂密內叛授  
館海州副使兼沂密兗鄆諸州副使與臺濠攻密州下  
之將擊沂州覘者曰城中偃旗卧鼓寤者各人館曰此  
必有備而援兵近矣汝將曰密城既下沂易與耳館不  
能禁但於茂林設伏以待果攻沂不克援兵俱至師既  
退而沂兵持其後伏兵擊之沂人大北未幾代臺濠為  
海州刺史天復三年改漣州制置使天祐中復刺海州  
就加平盧軍節度使明年改定南大將軍知處州防禦  
使給洞民多為盜至皆平之順義元年授百勝軍節度

使召歸乾貞初卒年七十二

### 王稔

稔廬州人少驍勇始以騎射隸行密帳下累從征討有  
功乾寧中梁祖遣將葛從州周討揚州稔與崇再用率兵  
禦之稔以六騎登高山覘梁軍為梁軍所圍候于望見  
之請以救兵往再用曰王稔辦事不須憂也稔與其徒  
解鞍而卧梁兵不敢上會暮圍兵漸合稔乃步依林木  
轉戰而行因是解去時亡馬令峻遂重襲梁兵奪馬而  
還軍中壯之袁州劉崇景叛湖南將許貞率眾來援貞

單騎求鬪稔獨援長槩逐走袁州平以功授滁州刺史  
又從徐溫破寇於山南遷壽州團練使未幾授清淮軍  
節度好儒學性寬厚褒衣博帶有同儒士先是壽春人  
多尚武復警夜至嚴稔至惟閱籍籍下帷肄業通宵  
禁不數年鼓篋待問於四境鱗萃每講肄開必饋以束  
脩旨酒鄉里荐舉歲常百餘人稔多力每選二勁弓弦  
加兩耳分手前引雙滿其數四乾貞三年歸授左右雄  
武統軍卒年六十六

### 李原

原蔡州人乾寧初歸行密為黑雲隊長破濠壽有功加  
檢校兵部尚書改隸朱延壽將戰會立新軍每旗以五  
伍為制遣原以十旗擊其西偏不克而返延壽將斬之  
原曰彼衆我寡願更益師以往苟不勝敵死未晚也乃  
增以五旗原力戰梁人亂延壽乘之遂大敗行密聞之  
召歸授黑雲都指揮使天復中從臺濠破宣州天祐二  
年以兵援宜春深掠越境師還以功遷黃州刺史溥襲  
位授泰寧節度使同中書門下平章事卒於金陵年六  
十

陳知新

知新廬江人從行密起兵攻畢師鐸孫儒皆有功屢以親軍攻定南北諸部多立功累授先鋒指揮使天祐元年率兵攻巴陵破其水柵逐楚將許貞盡收其地拜岳州刺史三年加團練使是歲從劉存大舉師伐湖南會天大雨旋至瀏陽江為楚兵所襲存與知新戰敗俱被擒楚王馬殷親釋其縛且慰勉之冀為已用知新叱罵曰吾豈能負楊公而反事汝耶殷知不可留乃殺之家悉陷敵

朱虔祐

虔祐潁川人少多力善戰初為義興令行密惜其材召居帳下常率眾居前從王茂章援青州去為前鋒歸則殿後我軍皆噓虔祐以五百人當之追兵大至茂章亦留解鞍而寢虔祐促茂章亟去自與梁人戰殺傷無數日暮兵盡被擒士卒無求生者以故我軍行遠追兵不能及梁人執虔祐見太祖太祖壯其事欲釋之虔祐請死不得瞑目大罵被害行密厚恤其家後數年嫁其妻詰旦行矣其妻沐浴禱之曰王愍我窮獨恐終不能自

存當嫁我於某氏嗟乎今日猶君之妻明日他適吳君  
忠烈若是歿豈無神遂棄我是夜無疾而卒夫忠婦義  
如此

九國志卷二

宋路振撰

吳

劉信

信字興遠兗州中都人少豪勇善騎射始陷蔡盜許勅  
軍中勅敗自滁州奔於行密及破秦畢頗著戰功大順  
中行密與孫儒對壘一日召信受事信醉不能起行密  
罵之信出投賊左右請追信行密曰信醉耳豈負吾者  
耶明日信果返孫儒平以功轉騎軍副指揮使從破濠

泗遷滁州刺史改左右隨從馬軍都尉王師範據青州  
密人叛師範求濟師行密遣臺濠率兵破之信先登破  
敵冒重瘡及青人獠師先求白甲軍增其賞蓋信所部  
兵皆鈇鎧也天祐六年袁吉信撫四州結潭人將復豫  
章改信鎮南軍節度副使率兵攻潭將苑玫於上高遷  
袁州刺史危全諷新破其將黎汾王藻聚殘黨為盜南  
城間信盡破之一郡遂寧十一年授鎮南軍兩使留後  
劉崇景以袁州叛信擊走之授鎮南軍節度使信為治  
苛猛民流言將反會王祺率身師南上信意其圖已乃

乘小舟解其冠帶謁祺請罪祺大驚謂曰奉命討譚全  
播於南康請公駐吉州以警潭人非他也時虔城險攻  
之久不克祺以疫死遂改信為招討使全播惧因納款  
信受其質而還徐溫方執政聞之大怒杖其使者信于  
彥英時為親軍校溫令將三千人往援之溫戒之曰汝  
父據上游之地擁數萬之衆取一小郡不克而還是反  
也今授汝此兵可往助父反信用之大惧既返旆疾趨  
克其城而還先是有譖於溫言其逗撓固縱全播至是  
信自獻捷於江都溫大喜復遣還鎮十六年吳王開國



加信征南大將軍後唐莊宗即位遣諫議大夫薛昭文  
冊関王假道豫章信勞之謂昭文曰皇帝知有信否昭  
文曰主上新有河南未熟公之名信曰漢有韓信吳有  
劉信異代其人也因指牙旗銀首舉卮酒以屬昭文曰  
射中此願公飲一箭而穿之觀者無不稱快信用親吏  
吉况輩聚斂財貨置積廳事中日納銀滿其中莊宗伐  
蜀温恐信為變急召歸江都為左統軍温卒又傾心事  
知誥復歸鎮明年卒於治所年七十信將上章請立廟  
於洪州許之

### 馮宏鐸

宏鐸漣水人少與張雄友善雄以事為吏所抑因與其  
徒亡入海為盜宏鐸隨之聚眾千人自號天成軍遂據  
上元雄卒宏鐸繼其位治水軍於金陵樓艦之盛聞於  
天下大順元年詔復以上元為昇州命宏鐸刺史遂增  
版築大其城為戰守之備行密定淮浙因請歸附時田  
頵在宣州常欲窺伺宏鐸介居二大國之間又郡中數  
有妖怪居人相驚忽負抱嬰孩奔走諭之不可止宏鐸  
心不自安遂悉眾南上其日淮口大風發屋拔樹大石

巨木皆飄於空聲言將討豫章寔欲襲顏自帥舟師  
與戰於昌山宏鐸敗沿流將入海行密自出東塘邀之  
先使人謂宏鐸曰用兵者勝負豈有常哉今衆力未損  
公何憂一郡而欲自屏於海外吾府雖小足以容君之  
衆使無失所若欲淮南節度吾亦當讓君捨此而去亦  
謂也宏鐸左右聞之皆哭於是聽命行密乃升宏鐸舟  
執手慰勉一軍皆歡呼遂以宏鐸歸署揚州節度副使  
館給甚厚將吏皆分部安堵常與行密同祀漢高廟有  
二鳥鬪於樹上行密命射之宏鐸引弓伺便一發而二

鳥俱墜天祐四年卒

### 賈鐸

鐸字聲遠唐相耽之嫡孫生於上蔡遇亂為秦宗權愛  
將宗權暴虐不軌鐸諫之不聽反見疑懼禍及乃挈家  
夜與屬卒十人出奔宗權嚴兵追之鐸且戰且行數日  
乃渡淮遇故人馮敬章導之襲蘄春破其城推敬章為帥  
鐸為牙將塹城厲兵以自固行密命朱延壽攻之鐸方  
出獵延壽潛軍掩至圍其城鐸奔還度不得入以兵休  
林中選士二人衣羊皮夜入延壽所掠羊羣中因得入

城約城中夜半開門舉火為應再以羊皮復命鐸如期  
令兵趨城南門中火舉乃力戰突圍而入延壽知其  
狀驚曰吾恐其潰圍而出今反潰圍而入如是則城安  
可卒平乃以鐸報行密令召軍中與鐸有舊共持誓書  
金帛與之和仍令延壽與之約婚小將崇再周應召而  
行鐸乃請盟延壽以妹妻其子匡浩行密復授鐸左監  
門衛將軍乾寧二年加壽州左右軍光化二年授檢校  
右僕射天復三年加金紫光祿大夫檢校司空授黃州  
刺史天祐三年移光州刺史七年卒於治所

### 危全諷

全諷臨川南越人世為農夫初生赤毛而醜狀駭人父  
母欲勿舉其姊保護之僅而得全及長人質明秀豪勇  
任氣乾符末所在寇亂乃招合同鄉少年即其居為軍  
營鄉里賴焉時安南都護謝肇受詔安撫江嶺聞而嘉  
之補為討捕將表加憲職賊帥黃天感據龍安鄉朱從  
立據石牛洞皆竊稱名稱官軍屢敗肇遣全諷討之期  
年悉平中和五年黃巢餘黨柳彥章攻破臨川遂郡守  
大掠而去全諷遂入之詔即以全諷為桂州刺史郡署

及郭郭焚蕩畧盡乃悉心為理招懷亡散興緝圯壞不  
數年完復如故時南平王鍾傳亦乘亂據有豫章朝廷  
因命為帥許郡人多自立皆不能恭承節度而全諷  
最強尤驕傲不遜遂為勦敵久之傳不能忍自率兵討  
之既傳其城而城中夜失火士民驚亂許時請急攻之  
傳曰君子不逼人之危乃掃地而祭曰全諷之罪身害  
於民烟焰遠止天之惠也翌日全諷聞之遣使謝罪聽  
命請以其女嫁傳之長子匡時傳許之乃盟而還由是  
稍修支郡之禮然豫章之人常畏之傳卒軍中以匡時

為留後全諷曰聽鍾郎三年為節度吾當為之既而我  
師圍豫章全諷不能救及城陷乃謀起兵時宣州刺史  
王茂章叛入越假道臨川以之梁問全諷曰君欲大舉  
願見君之將士以卜濟否乃陳師於野與茂章登城而  
觀之茂章曰衆凡幾何曰十萬茂章曰淮南有三等將  
如公此衆可當下將爾盍更益十萬乎全諷不聽悉衆  
屯象牙潭自稱江西留後旁郡皆以兵資之湖南馬殷  
又遣將高安以為之援軍勢甚盛豫章大恐將軍周本  
攻象牙潭大破之擒全諷於陣許郡皆潰楚撤高安之

圍而遁於是克定八郡之地送全諷維揚親詰之全諷  
不答初行密之攻趙鏗遣使通聘於臨川全諷報禮甚  
至糧運兵器皆取給焉至是以舊恩釋之先是潤州刺  
史安仁義築第於邗溝之西因以賜全諷資給甚厚天  
祐六年以壽終諱子才叙錄全諷敬愛賓客善於士  
民頗有巧思多所興創今城郭館署皆其遺構也

### 譚全播

全播南康人昭宗末嶺表寇亂全播與鄉人盧光稠相  
與聚兵謀署首領衆推全播怒曰汝君舉事必望成功

須藉良帥盧公軀貌堂々真諸君帥也衆唯々未定全  
播拔劍三擊庭樹曰不從令者與此樹同乃立光稠而  
全播為謀主所向多捷兵勢漸盛遂破王潮之衆入據  
虔州推光稠為兵馬留後全播分掌城中兵天復三年  
與潭人共伐番禺下韶州潭人不利乃引還又遣光稠  
弟光睦攻潮州光睦好勇而輕進全播戒其持重不聽  
度其必敗乃為奇兵伏其歸路光睦果敗奔還潮人乘  
之伏兵四起大破之擒其首將鄭廉遂從光睦圍潮州  
番禺救之乃引還劉巖劉隱以廣州之衆伐光稠以報

韶州之役旌旗相繼數十里圍城十餘重光稠大惧全播曰吾聞劉公易與爾名足憂也光稠喜曰度與韶昔與君所共定也此邦之事死君不能移之於是治戰場於城南告戰期於劉巖令許軍曰戰之日勿殺度兵悉可生擒之全播選精甲萬餘伏於隍塹邱嶮之間與老弱五千鼓行而前殺戰乃退巖從兵長驅中途伏發巖等大敗單騎遁免斬首萬餘級光稠議功全播泛讓許將而不受自是光稠大歎賞之俄有疾將以符印授全播不沒光稠死延昌自韶州奔喪全播立事之延昌

好遊獵荒傲無度大將黎球俟其出獵閉壁門而殺延昌於城外球以全播不與已同謀將害之全播請老閉固不出後球方欲蒞事見延昌持彈叱責之球中丸而死衛將李彥圖復知州事全播惧禍稱疾篤杜門彥圖疑之與議親姻多方以覘其動靜全播應覘為狀終不可識廣州聞全播之病乃北侵陷韶州彥圖卒其子不肯閉子城以自衛州人無歸相率謁全播第請為帥拒之不可遂從之遣使詣梁俄授萬勝軍防禦使五嶺虔韶二州節度用道使檢校太尉開國侯在任七年人物

殷盛俄而徐溫命劉信伐之信以大衆填其城壕全播  
令人潛為地道運其土壤深如故信以為神莫之測也  
攻擊萬端不能尅遣使說之令歛服全播請從溫聞之  
怒曰信以十倍之衆不能下一城何以取威敵國命回  
兵攻尅之全播以歸授左威衛將軍領虔州如故卒  
於江都年八十五當盧光稠之未舉南康先有謠言曰  
盧破黎頭出李子始削花潭深魚正聚楊柳西邊栽既  
而光稠有南康至子延昌而被黎球所殺球死彥圖繼  
之全播方盛柳亦劉也而楊氏命劉信攻取之一郡之  
地何冥數之若是乎

### 李濤

濤趙郡人祖遠唐杭州刺史父逸壽安令濤涉書史會  
唐末四方盜起乃投筆從軍光啓三年秦彥囚高駢濤  
從行密舉義列八寨維揚西彥盡以步騎背城求戰俄  
而彥軍已破一寨法將以兵勢相懸宜堅壁勿出濤怫  
然曰今以順伐逆豈論衆寡設令欲退將焉歸濤願以  
所部為前鋒請覩破賊行密壯之遂出戰果敗彥軍自  
是無復敢出濤以功遷騎軍都尉渥襲位授和州刺史

初行密既卒張顥陰有異志以都統符印送宣諭使李儼行事嗣王意未決一日諸將共議四座畏顥無敢言者濤曰都統符印是昭皇御翰所賜王父子承襲用之不疑苟付他人中外安仰法將以其辭正昏服顥獨默然投袂而去渭襲位遷吉州刺史十年授行營招討使攻越臨安濤敗陷於越順義元年吳越通好杭人厚禮歸之授左雄武統軍加泗州防禦使遷寧遠軍節度使太和四年卒年七十二

### 鍾章

章字憲明廬州合肥人少不拘細行雄果有四方之志中和中行密據合肥召置帳下累從征討皆克獲有功天復三年朝使李儼至行密得承制拜授以功歷左監門衛將軍天祐五年張顥弒渥將出徐溫守潤州以圖自立溫與嚴可求謀非章不可除顥章知之因選士三十人夜集軍舍椎牛享之刺血而飲以為誓溫謂曰君有老母不若且止章曰斯事一言既出寧可中輟耶明日章與姚克瞻殺顥於衙堂遷檢校尚書左僕射左衛副指揮使從周本攻越州拔衆夜歸越人龍衣之章以二



百人散樹旌於菰蒲間越兵退去絕糧三日章壯氣在  
衰章自以除顓功大賞薄會與克瞻爭握槊因譁語較  
軍功以及之溫聞而歎曰斯固吾過也明日加章滁州  
刺史滁民有訴章者章詣金陵自理溫逆謂之曰前事  
為理已改授公光州吳章逐之任未幾遷壽州團練使  
會疆吏告章侵市官馬馬因遣王稔以巡霍邱為名往代  
章歸中途改饒州刺史俄召歸金陵在郡二年加同  
中書門下平章事章多力嘗怒其家人其人匿避章愈  
怒因拉折鐵杆後卒於治所年六十二

朱瑾

瑾宋州下邑人也雄武倜儻有吞壘四方之志光啓元  
年汶陽曾全昱過害軍城無帥鄆兵共推瑾兄瑄為留  
後瑾之季仲俱為列校明年兗州齊克讓妻女於瑾  
伏兵仗假稱聘禮改服甲士詐為昇夫而往親迎夜發  
卒殺兗州軍校王稠膚遂虜克讓詰旦自稱留後三年  
夏秦宗權併兵攻夷門梁祖發兵不守會瑄援至合梁  
祖兵大戰城北瑾率騎嘗寇馳突往返當午矢不披靡  
宗權敗走自是瑾與梁軍互為犄角屢破宗權朝廷以

功授瑾兗州節度使未幾梁祖交惡於瑾遂成仇敵大  
順二年冬瑾率兵萬人攻單父梁祖遣丁會禦之瑾軍  
大敗於金鄉景福初梁祖攻徐州瑾率全軍來援時搏  
擊梁軍殺其將霍存因席卷十餘寨乾寧元年梁祖親  
攻鄆瑄瑾合兵迎戰敗之於東河二年春梁祖將朱友  
恭攻瑾整其城守之是時連歲交兵四郊無耕織瑄瑾  
勢蹙因遣使乞師太原李克用假步騎五千濟河梁  
人退舍十月梁祖復親攻兗川塹圍之瑾卑騎求鬪梁  
將無應敵于瑾兄瓊先以齊州納款於梁祖使瓊臨

兗州說瑾怒瓊無急難之義偽遣使告降梁祖自至  
延壽門與瑾交說瑾謂梁祖曰兗州符印他人莫可付  
願得兄來付與既而梁祖遣掌謁劉捍與瓊偕至瑾馬  
立橋上遙謂捍云願兄先來乃麾將士搥瓊徑入未幾  
城上大譟擲瓊首於外梁祖大悔因班師焉四年正月  
鄆州先下瑾亦糧盡與晉將李承嗣史儼求軍食於野  
梁將龐從奄至城下瑾將康懷貞率瑾子私以兗城送  
款歸不得入引承嗣諸軍將保沂州為其將尹處賓拒  
固不納瑾狼狽將奔海上復追之後迫乃渡淮歸於行

密行密迎之於高郵待以殊禮立解所服玉帶為贈擇  
甲第遺財帛鉅萬表瑾領武寧軍節度淮南行軍副使  
是冬梁祖遣將龐從大寇清口行密親征之令張訓以  
羸兵前導從意輕吳師貪奔碁不顧瑾請假梁人旌旗  
率騎潛濟突入從中軍營行密得引兵急渡爭破泚柵  
遂擒從斬之乘勝攻泚河軍葛從周敗走光化二年春  
從行密攻彭門移師來侵梁祖屯睢陽以禦瑾會天大  
雨與瑾交綏而退天復三年授瑾東面諸道行營都統  
平盧軍節度使同中書平章事天祐十三年淮南小校

馬謙李球乘酒脅衆狹渭登樓發武庫兵為亂陳於門  
橋北外衆屢却會瑾自浙西至惟引一騎視其坐起云  
此不足為禍因返顧外衆推手一呼亂兵皆潰去遂擒  
謙是冬與行軍副使徐知訓率兵攻潁州梁人援至而  
解渭將開國知訓患瑾位加於己請以泗州建靜淮軍  
出瑾為節度先是瑾因朔望令女妓通候問於知訓知  
訓淫縱強欲私之瑾心已不平復有是行會知訓夜張  
祖筵瑾中宵先起詰旦度知訓酒方困復留刺以去既  
盱知訓果來謝瑾因延入室出其妻陶氏知訓方拜瑾

以笏擊之踣於地左右自外突入殺之初瑾先繫二惡  
馬於廡下及將圖知訓密令釋其羈紲馬果蹄啣外人  
莫得聞變因斬首以出知訓後人數百瑾扼臂叱之俱  
辟易散去復乘知訓馬馳入府中訴於渭云今日為大  
王除患渭曰此事吾不敢知因命瑾疾去瑾忽以知訓  
首擊柱詬渭曰懦夫安足與成事携劍復出望府門已  
閉因踰垣折足大呼曰吾為萬人除患今以一身當之  
耳遂自刎夷其族時年五十二

### 米志誠

志誠沙陀部人少便騎射以驍勇聞乾寧四年奔於行  
密龐從寇清口葛從周寨潁河志誠俱為前鋒連戰皆  
勝以功遷為軍指揮使田頔叛於宣州志誠與臺濠敗  
頔於廣德天祐六年危全諷將伐鍾陵湖南遣苑玫也  
上高以為全諷聲援命志誠與王祺率兵破之十年從  
徐溫敗錢瑛於梁谿後又破王茂章於淮上十一年隨  
柴再用討刘崇景於袁州敗袁人於萬勝岡崇景棄城  
遁去遂入之先是袁人兒童聚戲穴地為奎園箬為甌  
曰將柴米來至是果應以功加檢校大傅領泰寧軍節

度使十五年朱瑾殺知訓携其首入府中志誠聞之被  
甲引其子并親從十餘騎至天興門問瑾所向聞瑾已  
死乃歸徐溫疑其助瑾遣使殺之嚴可求懼其不克遣  
人偽自袁州去告大破楚人誥將皆賀志誠亦入因伏  
壯士斬於棘門之下誥子皆棄市

### 翟度

度彭城人也乾寧初徐方將陷度盡室南渡謁行密於  
廣陵及徐溫興右衛以度為軍佐屬張顥之亂溫與嚴  
可求陰計其事密遣度往復傳導及誅顥度有力焉因

授子城甲伏諸庫院鈐轄等使天祐十五年朱瑾殺徐  
知訓挈首突入府門時兵圍倉卒莫敢抗禦度驅率散  
卒兵閉閤瑾以是不得出遂踰垣折足自刎而死會朱  
志誠引十餘騎向瑾所向聲言以襲瑾為名度乘圍謂  
曰瑾已戮矣何不急自歸營因是志誠遂返渭喜其應  
機却賊以瑾宜陵莊賜度為賞及吳建國復旌其勲授  
閤門宮城武備等使領光州刺史順義四年溥享白沙  
對徐溫呼雨為水溫請其故溥曰此是翟度父名吾慣  
諱矣因言宮內諸王須索度多阻限不時進納溫欲斬

之為溥救護而免黜於撫州未幾授行軍副使及廉使  
徙任虔知本州軍事七年卒年六十三

### 張可琮

可琮不知何處人中和之亂奔於江淮行密識其勇毅  
擢在左右破孫儒於宛陵先登陷陣稍遷列校時吳人  
初得宣城毗陵之地無錫居越人之衝患其攻擾天復  
中選可琮守之錢鏐忌其名棟驍將卒二千中夜襲之  
邑中大擾可琮閱兵得百餘人皆乘城疾戰越人驚潰  
而去吏士皆賀可琮笑曰彼眾我寡其勢未已方復勞

諸軍一陣爾於是息燈火屏旗鼓若空邑然越人偵之  
以為宵遁果復至可琮約將士候其附城突擊大破之  
寇盡潰去方告於郡守李簡一雖怒其不時告且壯其  
事列上其功後有徐溫之命掠東洲下之即以為制置  
使天祐中除江陰縣鎮遏使遂城江陰沙山之役可琮  
以江陰之衆供軍旅展斥埃無闕謀徐溫喜之擢拜常  
州刺史大修城隍民賴以安順義五年卒年六十五

### 鄭璠

璠汝南人始事秦宗權後隸孫儒入淮南尋歸行密前

後戰伐皆預行先化四年授左先鋒兵馬使是歲後李  
神福攻臨安擒越將顧全武方宇等四十餘人遷左衛  
將天祐初王茂章征安仁義於潤州洎城陷中十餘瘡  
以功遷左先鋒都尉從攻豫章璠以所部發機飛火燒  
龍沙門率壯士突火先登入城焦灼被體以功授檢校  
司徒復從柴再用與越人戰敗及陳璋復東洲璠城而  
守之復會呂師造攻蘇州與大戰虜其次將陳綰璠左  
脇中弩矢死授蘇州行營都指揮使周本擒危全諷於  
象牙潭璠所部功多又攻新淦縣克而守之尋以張宣

代歸復佐周本攻袁吉緣山疾戰悉收其巖壁焚之民  
皆復業十五年從王祺劉信攻虔州克之授璠羅城使  
順義元年領饒州刺史六年知楚州率兵授汀洲軍事  
乾貞元年就拜團練使二年授鎮南軍節度副使知軍  
府事大和三年授饒州刺史五年遷金陵行軍副使卒  
年六十六

楊彪

彪宿州人身長七尺餘呼聲如鐘個儻有武幹善騎射  
行密見而壯之擢授衙內散指揮使渥嗣位潭人犯邊

授西南面行營護軍副將謂詰將曰彼衆我寡未可輕  
動乃守其要津以輕兵挑戰登高以望之見其麾下進  
退不一彪笑曰非勅敵乃縱兵出戰親射其守將殺之  
順風焚其艦溺殆盡凱旋擢授江陰鎮遏使徐知誥鎮  
潤州充都尉以從越人寇無錫東南大震知誥東征彪  
與陳再過領死士千人於路次弓弩忽發越人驚擾又  
竊賊郭令以入其壘殺獲甚衆明日又戰自旦及辰未  
決彪躍馬疾馳之越人遂退師還以功授殿直軍副使  
與郭琮分直宿衛徐知誥謂之曰郭琮猛而少機警宿

衛之職惟爾是賴太和三年卒年五十二

### 陳祐

祐歷陽人年十七歸行客於合肥從入廣陵孫儒來襲  
吳師亂祐之卒伍獨成列洎入宛陵稍遷為偏校時行  
密脩貢於天子祐應募而行達於朝廷制授兼御史中  
丞從攻滁濠壽等州重甲先登戈傷弓墜下而復上敗  
龐從葛從周朱友寧皆預戰有功秦裴下豫章時朱思  
勅范師從陳鏞以兵戍之鏞等皆渥之腹心也張顥忌  
焉令祐以渥命往誅之三校皆勇士也顥既遣祐行甚



憂之祐踰險輕行六日至豫章微服懷短兵入秦裴帳  
下裴驚其來且告之故因責裴以不能制三帥而令有  
異謀裴懼未及對祐乃令召思勳等宴會及至則祐已  
與裴飲矣三校入見祐皆色變俄而酒三行祐數其罪  
悉叱而斬之以歸徐溫之誅張顛祐有力焉天祐七年  
越人侵無錫徐溫自征之祐率黑雲都尉以從諸軍未  
集祐告溫曰寇謂我勞頓而吾未能陣也願以所部先  
薄之大軍見可則進溫從之祐詭道以出賊後會大軍  
夾攻大敗之十三年溫在潤州小將周郊詐稱役從懷

短兵入府多殺軍吏而圍士無兵仗拔武庫之囚出兵  
仗授之以戰或有自後擊祐傷腦踣於地從者負之息  
於門下稍蘇時賊雖息府中尚擾升樓傳呼不能止祐  
舉首叱之衆皆投兵仗罷去溫手封其傷授黑雲都尉  
溫遷金陵制宮室府署命祐董其事以功加檢校司空  
太和元年授饒州刺史卒於任年六十五

### 劉權

權許州人少從軍於蔡州景福元年來歸行密入淮南  
隸田頔麾下累遷同州節度副使元化二年頔與越人

戰權乘勝深入為寇所得錢鏐見而慰之曰爾壯士也  
吾終不以俘虜相畜洎通和從之歸渥襲位補衛將渭  
南國以權侍衛勳勳肅授右衛副校檢校右僕射從周本  
破蘇州回授右衛列校為毗陵子城使率海船與越人  
戰勝之充洪州都督長史領吉州刺史潁州之役授行  
營都虞候時徐知訓為帥而軍政皆委朱瑾梁將袁象  
先帥步騎救潁瑾晨興西北皆昏黑知梁兵將至召權  
與議值天大寒權幅巾錦袍而玉瑾問曰爾何職曰行  
營都虞候瑾曰是職也勳必為法軍先今氛興西北陰

霾閉天此梁人至矣爾司斥侯尚為此服且軍禮何在  
以左右執之就戮知訓徒跣而往救之僅免時梁祖兵  
已至戰少不利乃引還及瑾殺知訓城中恐懼將沒而  
為文權出師而瑾自殺衆乃肅然徐知誥至自丹陽遷  
左右軍都衛押事武義元年領雄武大將軍六月從徐  
溫與越人戰於沙山洛社敗之俘其卒數千七月從知  
誥戰無錫大破越人二年卒

崔太初

太初淮西人父亮蔡州監牧副使太初身長七尺勇力

過人中和末以大力長禦應募行密見偉之召居帳下  
歷壽州衙內副指揮使天復中田安將謀叛行密疑朱  
延壽與之交結太初累從延壽征討曾諫延壽及延壽  
捨行密嘉其意遷太初衙內都指揮使天祐十五年從  
徐溫破王茂章遷本州司馬權知壽州團練事先是壽  
春自乾符後守卒俱為多謀彊力者據而後奏報以要  
恩及陳紹卒宣王遣王定持虛銜官誥以往令度可授  
者與之定以軍政雖出太初而職在衙將審審言之次  
因潛報太初曰誥朝若州之符印再至於君慎勿更讓

明日召諸將齒先以待印置坐末以次遞捧而上及審  
言而立定曰王府之命非審公而誰然合當相推以成  
禮也審言如教復至太初定曰惟公不可多讓乃麾其  
下位者俱令列賀復數日軍州無異議始以官誥授之  
人有密譖太初常蓄鄉閭之念者會徐知訓征潁州路  
出壽春且觀其意太初著烏帽草履徒步至塌山為知  
訓馭馬十五餘里知訓見其屈降前疑大釋太初不喜  
儒生多疑好察每通衢交會之所墻必置耳常謂人曰  
還聞墻有耳否又曰非墻耳乃吾也由是行路之人鮮

敢偶語者召歸授右雄武大將軍加檢校大傅同中書  
門下平章事守左殿直統軍太和三年卒年六十六

### 陳彥謙

彥謙毗陵人少負壯節有剽繁治劇之才行密定江表  
召為潤州司馬以幹局聞徐溫鎮浙右以樞務為寄彥  
謙亦坦然不疑言行計從人莫能間溫欲居金陵問策  
於彥謙對曰金陵昔為王者都今實近畿閩輔也作鎮  
於彼其誰不往溫從之遷彥謙金陵大都督府右司馬  
營度外城府署三年而畢上經費之籍天祐十五年朱

瑾殺徐知訓溫急召謂之曰蛇豕雖亡彼蔓猶在今就  
廣陵除其餘孽及梁祖即位隴蜀建號彥謙勸溫諷渭  
建朝廷及更章服彥謙頗有力焉溫嘗閱帑藏見金帛  
委積因曰此三軍物吾豈敢有然致此盈衍公之力也  
因授鎮海軍節度判官無錫之役未戰而溫疾吳越兵  
攻其帳我軍相顧失色彥謙即引旗鼓詭遷於左其攻  
稍息及敗越兵遷楚州團練使諸藩郡歲時伏臘爭獻  
賂遺溫悉令納之病溫親往慰問自調湯藥臨卒手疏  
十餘事首即以用嫡嗣為請順義五年卒年六十

高澧

澧越州人祖實唐武寧軍節度使文瑰湖州刺史澧為錢鏐之時累功遷特進湖州刺史武義軍使天祐七年以受疑挈家屬二百餘口甲卒五千奔授淮南節度副使澧嗜酒好俠殺人而飲其血日暮必於宅前後掠行人而食之一旦醉在樓上王寬經其下澧召之登而命左右去其梯操鋌於旁而以酒虐寬、懼為所圖乃以大觴酢之澧皆推觴寬躍而取其鋌橫之於膝乃慢罵澧連以觴罰之澧辭不飲寬乃引鋌逐之澧環席而走叩頭乞哀併飲十觴卧不能興寬乃下樓徐去泊上馬命以鋌還之十五年徐知訓為朱瑾所殺徐溫遷怒誅之

九國志卷三

宋路振撰

吳

田頔

頔字德臣廬州合肥人博覽書傳容止儒雅雄果有大志少與行密同鄉及戍塞上情好愈密軍回俱遷八營主將中和二年行密圖有淝上頔首為輔翼光啓二年壽春張翽遣將魏虔率衆來寇行密使崔自審敗復命頔往大破虔衆於楮城鎮三年從行密破秦畢於維揚

頡功稱最文德元年圍趙錕於宛陵明年夏錕糧盡舟出東漢乘瀑流以逸將奔淮南錕度行密皆步騎限水無從復至因泊永陽解甲登岸初頡疑錕將遁密造輕舟逐之至是追及錕奔不暇為頡親執以獻奏授頡馬步軍都虞候檢校尚書左僕射是冬與安仁義攻杜稜於常州下之十二月復為孫儒所敗大順元年秋頡屯浙右懼儒兵盛焚浙右營屯於野二年春退軍黃池廣德與孫儒軍塞壘相望頡兵屢戰多北會夏大雨儒營多墊溺避水而歸是秋儒盡焚維揚復濟師廣德十月

頡率敢死士千人夜襲儒將張景思沈粲二寨破之擒粲而返十二月頡與劉威大為儒所敗行密怒盡奪其衆儒遂乘勝逼城戴友規言於行家曰強敵匝壘不用田頡恐非長策行密遂復起之明年六月盡破賊寨頡親與其下范文感等臨陣擒之秋行密歸淮海表頡寧國軍節度累遷檢校太保同中書平章事乾寧三年夏同安仁義破越之蘇州光化末馮宏鐸以樓船自將介守上元頡以厚利購得其工令速成大艦工曰馮公每一舟必遠求梗楠既成數十歲為用餘木性不禁水非

以必敗顯云汝但以此地木造之吾只圖一用不暇多年爾因而急就天復二年四月果與宏鐸戰於昌山宏鐸大敗舉族奔淮海時以上元地歸行密顯遂入覲會行密左右要賂者衆下及獄吏亦有私情顯愀然不懌謂所親曰斯吏亦欲吾下獄哉顯方求池歛為屬郡行密復未之許顯意望甚高由是愈不能滿及回指維揚南水門云此門不復經入矣初行密克定江淮方撫循百姓而顯與安仁義朱延壽等皆猛鷲果以攻取為務行密憚其難制每抑之是秋錢鏐游臨安其下許再思徐綰以餘杭外城叛召顯為應鏐得報夜從水路入保子城時顯圍之愈急鏐屢遣間使求哀行密行密亦以顯若得志杭越為患必深不若存鏐別圖進取因召顯歸鎮鏐復輸錢二百萬貫以元瓘為質顯始旋軍自是財富兵盛復以取餘杭垂下為行密所召乃與錢鏐和親反意遂決三年秋顯與潤州安仁義同叛初召其謀將康儒議多忤意行密因而間之遣使授儒廬州刺史顯果疑儒私納款遂族儒先是行密遣李神福攻武昌及顯反行密急召神福旋師顯聞之復以兵襲上元



叔神福子承鼎遣諭意云苟見機從吾事平之後當分  
地以治別命將汪建以樓艚踵其後神福不顧叱左右  
射承鼎以誓諸軍明日大破建於吉陽磯顧聞建敗自  
督親軍求戰神福收兵皖口際水為堅柵是時行密別  
遣臺濛王茂章率步騎以往顧復委舟師於汪建王壇  
自出廣德迎戰大為臺濛所敗遂率殘衆遁保宛陵壇  
建聞其敗因盡以舟師歸歎於行密十二月顧出外州  
柵疾戰橋陷馬墜為外軍所殺時年四十六顧母老行  
密哀而捨之初顧與行密微時約為兄弟渥渭俱以子  
孫禮事其母顧善撫將卒通商惠民復疎財愛樂文士  
時游其門者楊夔康駟夏侯淑殷文圭杜荀鶴王希羽  
晚年楊夔知顧以兵賦自恃將謀為變因著溺賦以諷  
之顧終不顧以至於敗

### 安仁義

仁義沙陀人初事李國昌於塞上以過奔河南隸秦宗  
權軍中光啓三年擢為馬軍指揮使從宗權弟宗衡攻  
維揚及宗衡遇害復奔行密行密得之甚喜盡以騎軍  
委之列在田頌上文德元年從行密破趙鏗於昌山與

九國志 卷三  
顧攻杜稜於常州破之大順初梁祖遣將龐從率衆十萬至高郵孫儒盡衆禦之行密乘虛襲據浙右命仁義率衆敗儒將劉建鋒於武進儒後渡江陷蘇州自是與儒春夏鬪黃池秋冬戰廣德儒軍竟以衆勝圍行密仁義於宛陵時儒亦火戰不決遺書仁義叙舊款密欲令行密猜間之行密待遇愈至辟為行軍副使依前馬軍都指揮使景福元年行密仁義及田頔背城晨戰儒軍大敗破五十餘寨以功奏授檢校尚書左僕射潤州刺史仁義蓄性好貨雖凋弊之後科歛尤急初儒之亂士

庶多奔豫章及諸郡平流者皆復行密皆以循吏守之惟浙右人聞仁義所為相與悲歎曰獨吾郡乃得畜人以是多無歸者天復三年仁義遣衆盡焚東塘戰棹結連宣州田頔以叛潛兵襲常州刺史李遇設伏於路率兵前戰因極罵仁義仁義止其衆曰遇何敢辱我至此是有伏兵也偵之果然仁義戰父而敗遇因襲之至夾岡仁義立二幟於岡上乃解甲而食無敢追者行密遣王茂章李德誠攻仁義仁義不毀濠梁常開門出戰與茂章對敵無不先告所中而後射之故諸將多挫銳而

止以是歷年不能破天祐二年仁義之衆漸寡自度終不濟乃擁其家屬登城樓外衆無敢登者呼李德誠謂汝最福人可以委吾命擲去弓矢令德誠父子執之俱斬於廣陵市

### 朱延壽

延壽廬州舒城人行密之妻弟也美姿容未冠事行密從征秦畢孫儒皆以摧堅陷陣受賞行密鎮維揚授延壽以扞城之任時軍中多盜行密方務寬恕求得士伍心知延壽好殺每捕至者必并所盜物遣而賞之仍誠

之曰慎勿使延壽知既而密報延壽俱復擒殺之乾寧初黃州吳討歸款遣延壽受之徇地蘄陽而還從圍壽春城堅不可拔將捨之延壽請以所部試往臨城一舉而破城中市不易肆以功署淮南節度副使壽州刺史明年取蘄光二州以功遷團練使四年從征葛從周於潁河敗之是後梁將屢寇淮上延壽每開關延敵未嘗敢逼天復初北司擁駕西幸昭宗聞延壽有武幹遣李儼間道齎詔授延壽蔡州節度使令促行密與諸道犄角共誅梁祖會鳳翔圍解而止田頔安仁義結構延壽

叛將分地而治行密憂形於色即詐為目疾每接延壽使必錯亂所見以示之嘗誤觸楹柱而朱夫人掖之良久始蘇因泣曰吾今表目軍府事大兒輩子俱幼不如得三舅代治吾無憂矣夫人因以書召之延壽不疑遂來覲延壽迎至寢門使人刺殺之年三十四出夫人嫁蘄州刺史石膳既而朱瑾入賀行密曰彼二大賊不足憂惟憂此小賊今得之無事矣延壽善用兵有鈐畧好以寡擊衆不勝敵而返者無不盡戮之嘗與梁人戰遣衆二百持大劔而往內指一卒留之卒云願攻賊自效

延壽亦斬之其令出必行皆此類也性疎財每得賞賜皆分賚將士李昇建國以延壽子鄴列於環衛復其官爵

### 徐溫

溫字敦美東海朐山人少無賴入羣盜中以販鹽為事中和二年行密起合肥遂隸帳下為伍最常從行密征討先登陷陣敵人畏之及平秦彥虜趙鏗敗孫儒溫皆有功奏授衙內右直都將左長劔都虞候尺從平濠泗有功授隨身都知兵馬使檢校工部尚書天復二年昭

宗徵兵入援行密將赴之議以戰艦艦運糧温曰此水入  
吳舟楫不敢南行岸谷既變葭葦且深必不繼矣遂令  
以小艦易之師次宿州重載不能進士卒甚飢惟小艦  
先至一軍賴之行密嘉之由是參預謀議討安仁義於  
京口諸軍頻戰不勝行密遣温率兵援之温至城下盡  
易新製衣服旗幟悉用舊者仁義不知如常而戰温乃  
麾軍奮擊遂敗之朱延壽入覲行密聞其來慮有內應  
召温歸陰為之備既殺延壽營中果亂温奮劔大呼斬  
其首惡者部分遂定既誅三叛以功授尚書右僕射廬

州長史隨授右衙都指揮使天祚二年行密疾病渥出  
鎮宣城將行温謂渥曰公有病而令嫡嗣出外必姦臣  
為之不可不防他日有徵召非上令某手書非某之使  
幸勿應命也渥泣謝而行後行密問後於判官周隱隱  
以劉威對諸將皆無言温進曰宣州既賢且長國之令  
嗣不可廢也乃召渥歸行密疾甚召温與左衙都指揮  
使張顥同受顧託渥既嗣位憤大臣擅權政非已出乃  
置東院馬軍置立親信以為心腹温與顥頗忌之故顥  
將圖弒遂温知其謀而無所諫止但引嚴可求與之計

事顯既弒渥白溫議分國兵共歸款於梁祖溫僞許之  
乃與可求謀使鍾章姚克瞻程思忠等人殺顯溫稱疾  
不朝嚴兵於第以防不克是日章等斬顯溫乃入悉收  
賊黨紀祥等誅之遂兼左右衛事無大小皆專斷始立  
制度戢兵明禁人漸安堵溫謂可求曰大事定矣與公  
等克己行善政使人家解衣而寢於是聞者莫不感激  
渭襲位遷溫昇州刺史淮南節度副使七年起復檢校  
太尉潤州刺史浙西觀察使內外馬步軍指揮使是時  
大臣劉威陶雅李簡之徒皆與行密同起義勲高任重

溫以一旦之功超居其上皆內意不服李遇嘗謂人曰  
徐溫何人吾素所未識而遽至此豈可入覲耶乃密議  
誅溫溫知其謀遣柴再用討之遇出降遂夷其族於是  
雅等始懼而來覲溫盡禮事之如見行雅等乃安中外  
遂定以平李遇功加平章事遷行軍司馬領浙西節度  
使十二年溫請就藩以泊舟師乃加浙西招討使封齊  
國公以金陵京口毗陵宣城新安池陽六郡為都督府  
溫以金陵形勝之地乃大城昇州建大都督府十四年  
溫徙治金陵以第三子知訓為淮南行軍副使留廣陵

以輔政十五年知訓為朱瑾所殺以長子知誥為代焉  
時中朝多事南北道絕諸將分守郡府雖尊奉盟主而  
政令征伐多以便宜從事温以都統權不足臨制乃定  
冊建吳國改年武義稱制拜温大丞相封東海郡王越  
人攻常州温率衆拒之戰於無錫大敗越軍越人多舟  
師是歲旱江河皆竭諸將白温曰此天亡越之時也可  
盡車徒之勢一舉而滅之温曰天下紛紜民甚困矣錢  
公亦未可輕也若連兵不解方為諸君之憂今戰勝以  
懼之戢兵以懷之其勢不得不服使兩地之民各保室  
家吾輩亦高枕為樂豈不快哉多殺何為乃遣使盡以  
俘歸之於是越人請和順義三年後唐莊宗滅梁始通  
使於朝五年封温東海王賜車輅黻冕七年十月卒於  
金陵年六十六追封齊王諡忠武

九國志卷四

宋路振撰

南唐

烈祖以晉天福二年受吳禪至後主煜乙亥歲國滅蓋宋開寶八年也歷三主凡三十九年

烈祖姓李名昇字正倫小字彭奴徐州人初為徐溫養

子冒姓徐氏名知誥吳太和二年嗣溫位天祚元年封

齊王三年受禪改元昇元國號齊尊溫為太祖武皇帝

昇元三年二月乙亥改太祖廟號為義祖己卯改國號

曰唐復姓李氏改今名七年二月庚午薨年五十六諡

曰光文肅武孝高皇帝廟號烈祖葬永陵



元宗名璟字伯壬初名景通昇長子昇元七年三月己卯嗣位改元保大十五年改元中興是年臣屬於周奉正朔蓋周顯德五年也宋建隆二年六月己未薨年四十六請於宋許復帝號諡曰明道崇德文宣孝皇帝廟號元宗葬順陵

後主名煜字重光初名從嘉璟第六子宋建隆二年六月嗣位在位十七年至開寶八年十一月宋將曹彬滅其國後主降太平興國三年七月辛卯薨年四十二是日七夕也贈太師封吳王葬洛陽北邙山

### 周本

本舒州宿松人漢南郡太守瑜之後祠廟隴畝皆在子孫守故土者猶數十戶本少孤貧嘗在田里獨格猛虎唐末大亂投楊行密軍中以勇敢聞嘗先登深入蒙犯矢石身無完肌及歸營自燒鐵烙其瘡飲唱言笑自若軍中猛虎皆服累遷淮南馬步軍使天祐五年楊氏始得江西撫州刺史危全諷率諸郡兵十萬來爭其地屯兵於象牙潭楚人取高安為之援江南守將劉威告急判官嚴可求薦本可用時本從軍圍蘇州不克恥之稱

疾不出可求即卧内強起之本曰蘇州之役非彼強我弱也蓋上將權輕下皆專命故爾今必見用願無任偏裨可求為言楊氏許之得選兵七千使救高安本曰楚人非欲取高安也為全諷聲援爾若先敗全諷楚人必走乃疾趨象牙潭劉威要之宴犒不留或曰賊勢甚盛宜審觀形勝計定而後進何其遽也本曰賊有十倍之衆使吾軍知之必將奪氣須乘其銳而用之既至指授諸將戮力急攻大破其軍擒全諷諸郡之兵皆潰楚人果遁吉州刺史彭玕信州刺史危仔昌棄城走於是江

西之地始定以本為信州刺史越將陳璋據衢州歸歛越人圍之本受命以兵迎璋既至越人解圍陣於城下璋以其衆來奔裨將呂師造曰賊去我咫尺而勒陣不動是輕我也必擊之本曰吾受命迎陳使君陳君今在此吾事訖矣何為復戰且彼近而不動必有以待我也擊可勝乎待其先動擊未晚也璋亦以為然乃還越人躡之至中道宿半夜佯驚棄輜重走先設伏兵於道左越人急追至伏所前後夾攻盡殲其衆越人累至皆敗之唐莊宗入濟陽吳遣司農卿盧贛使於濟陽莊宗問

吳之名將存否而本預焉由是召入為雄武統軍出為  
壽州節度使移鎮廬州拜太尉中書令封西平王本不  
知書而愛重儒士賓禮寮屬不撓其權吏民愛之性純  
樸伎藝無能者惟軍旅之事則如夙習烈祖將受禪徐  
玠周宗等以本及李德誠皆位望隆重故諷之以為推  
戴之首本以昏耄仍不知時變皆少子祚左右其事時  
吳宗室臨川王濛廢處歷陽聞將受終乃殺監守者與  
親信二騎趨詣本本將見之祚固執不可本怒曰我家  
郎君也何不使我一見祚閉中門拒之濛被殺吳宗遂

移本隨衆至建康勸進由是愧恨數月而卒子鄴有戰  
功亦至廬州節度使

九國志卷五



宋路振撰



吳越武肅王以唐乾寧二年起臨安至宋太平興國三年忠懿王納土歸朝凡三世五主有國八十年

年四

武肅王姓錢名鏐字具美杭州臨安人唐乾寧二年年二十四起兵討賊歷事四朝累加天下兵馬都元帥開府儀同三司尚父尚書令兼中書令上柱國吳越王後唐長興三年三月庚戌薨年八十一在位四十一年諡武肅以王禮葬安國縣衣錦鄉茅山之原

文穆王名元瓘字明寶初名傳瓘鏐第七子後唐長興三年四月己未嗣位先是鏐以中原長亂於梁開平元年改元天寶私行境中凡改元三天寶十六年寶大二年寶正六年至是以遺命用藩鎮禮仍遵中國年號在位十六年於晉天福六年八月辛亥薨年五十五勅諡文穆葬於國城龍山之原

忠獻王名宏佐字元佑元瓘第六子晉天福六年九月庚申嗣位在位七年於晉開運四年六月乙卯薨年二十勅諡忠獻葬於龍山之西南原

忠遜王名宏侖字隆道元瓘第七子晉開運四年六月丙寅嗣位是時猶稱契丹會同十年閏七月漢以宏侖為吳越王遂遵正朔十二月晦內牙統軍使胡思進等作亂叔幽衣錦軍傳位於弟宏俶居東府二十年始薨年四十四諡忠遜以王禮葬會稽秦望山之原

忠懿王名俶字文德初名宏俶元瓘第九子漢乾祐元年正月乙卯嗣位宋開寶九年正月八朝四月歸國太平興國三年納土歸朝賜居禮賢宅端拱元年八月二十四日薨諡忠懿以鹵簿鼓吹葬於洛陽縣之賢相里

陶公原

杜建徽

建徽字延光新登人父稜廣明中為鎮海軍節度副使  
歷常潤二州刺史兩浙行軍司馬黃巢之亂稜歸鄉党  
保聚徒衆得千餘人號武安都鏐與董昌起兵石鑑及  
平劉漢宏其衆漸盛稜謂諸子曰吾每責人不過十罰  
則為之傷心竊觀錢公每臨斬決皆談笑自若成大事  
者必此人也遂率衆歸附於鏐光啓中從征薛朗以稜  
為常州刺史尋遷潤州軋寧中安仁義逼東陽命稜率

師討之仁義宵遁鏐平宣州以其降卒隸中軍號武勇  
都為腹心稜常患之密遣人白鏐曰狼子野心稜觀武  
勇都士卒終非大王所蓄願易之鏐不聽及徐綰叛鏐  
思稜言遣祭其基建徽少強勇不與諸昆弟類嘗自署  
軍事押衙稜聞之頗加詬責建徽出顧左右而歎曰大  
丈夫何止一軍校耶後隨稜歸鏐稜治常州為淮人所  
攻建徽率兵馳赴父難未及境而城已陷遂還新登後  
稜自淮安歸軍中嚴整無改稜甚嘉之累從征伐未嘗  
介甲所至輒有功軍中謂之虎子乾寧初從征董昌流

矢貫臂而戰不輟開平中從征姑蘇與敵遇於河河梁  
斷策馬徑渡及岸而馬斃因葬之至今馬塚存焉徐綰  
之亂建徽率所部自新登來赴難或有勸鏐東保會稽  
者鏐未之答建徽按劍叱之曰事若不濟當同死於此  
誰敢東渡耶鏐甚壯之睦州陳詢叛建徽之姻也鏐疑  
建徽不言俄有睦州聽吏來降持建徽所遺詢書以示  
鏐皆戒勵勸辭鏐大嘉歎賜建徽錢百萬從兄建忠嘗  
譖建徽言其第中蓄兵仗將為異圖鏐遣人密視之一  
日建徽方食堂上使者至徑抵卧內建徽但食不顧鏐

感悟益加殊待性儉率出入導從不過數人凡得賜予  
皆散施鄉里親族每朝使至鏐與之宴必指建徽以示  
之曰此杜丞相今日至此皆其力也其孫昭達為宏佐  
內都監使盛治第宅建徽曰乳臭兒不諳事乃爾後昭  
達果以罪誅嘗從擊鞠於廣場盤辟大呼舊所中箭鏐  
忽自臂中迸出人皆壯之初稜之將死也散財物於諸  
子至建徽但得一笏謂曰此吾所秉者惟汝能保之建  
徽自授節鉞至於丞相封鄖國公皆奏授朝命子弟多  
至二千石連姻公室人稱其盛乾祐三年卒年八十八

鮑君福

君福字慶臣餘姚人少羈貧性淳厚有胆勇餘姚有井面濶丈餘橫以雙梁水深不可測君福每醉必寢其上及從軍以驍勇聞初事劉漢宏及鏐東討乃率其党來附號曰歸朋都累從征討有功能馬上輪兩劔望之若飛電沉默少語軍中謂之鮑不鬧淮人寇三衢以君福為應援使屬刺史陳章叛淮人入其城楊行密令其將李元嗣監守君福署以郡職君福不受鏐聞之恐其被害也乃密以絹書令其就職君福竟拒之一夕與元嗣飲伺其醉而殺之奔歸錢塘授衢州刺史淮人屢寇其境君福每擊破之及罷歸鏐勞之曰公在郡數年戰鬪而已豈為優賢耶因復遣之任元瓘領清海軍節度辟為副使同平章事兼侍中天福五年卒年七十七

成及

及字宏濟錢塘人祖克評唐嘉王府長史父貞國子博士及性純厚為鄉里所知光啟初江浙兵亂及保聚於富春稱靜江都劉漢宏作亂及以所部兵從鏐討之漢宏平鏐宴犒諸軍北關鎮將孟安亂於席上拔劔將擊



鏐坐中驚愕不敢動及徐起舉胡牀格孟安仆於地左右因擒殺之以功奏遷散騎常侍靜江軍都指揮使潤州刺史薛朗常州刺史丁從實叛鏐命及討之破朗軍於陽羨進圍毗陵從實具羊酒以犒之並遺美女於諸將及大怒曰我當菹醢從實而食之今乃以酒美女子悅我耶因盡索諸女斬之親督諸將攻陷其城從實遁走以功奏授越州防禦副使潤州刺史阮給卒命及代之遷蘇州刺史軋寧三年淮人攻姑蘇常熟鎮將陸郢等以兵迎之及不能守遂降楊行密行密入城閱府庫

多圖書樂物由是重之與歸淮南署行軍司馬及拜泣曰及以百口託在錢塘姑蘇城陷不能引決豈忍更圖富貴願以一介之軀贖百口之命乃引佩刀將自刺行密遽起執其手因厚禮而歸之鏐迎勞郊外把袂以泣署鎮海軍節度副使徐綰之叛從鏐還至北郊鏐微服將入城及代乘其車行與賊鬪鏐遁得入綰平奏授保大軍節度遷彰義軍加開府儀同三司乾化三年卒年六十七

顧全武

全武越州餘姚人少時嘗為僧博通外學机警有才畧  
鏐每延接與語甚器之及八都建國因辟令從戎以為  
裨將軍中號曰顧和尚討賊有功累遷武勇都知兵馬  
使乾寧三年董昌據越州叛遣裨將崔温李蕙率兵屯  
石侯全武率衆擊破之臨陣斬温蕙湖州將徐應起兵  
以應昌與淮人圍嘉禾全武擊破其烏墩光福二柵以  
屯西陵三年昌將徐珣李元賓據肅清四封九鄉之地  
全武自西陵擊破之珣元賓皆乞降盡總其衆昌又遣  
裨將湯白守石城袁邠守餘姚全武自西陵趨石城與  
白遇大戰石城東斬首千餘級白僅以身免去會稽三  
十里不敢出援復攻餘姚袁邠堅壁自守昌遣將徐宣  
率兵援邠全武潛師斷其要衝俟軍過半橫出擊之殺  
二百餘人擒徐宣翌日袁邠以城降全武進軍圍會稽  
昌出戰五雲門懸玉帛以誘我師全武率勵諸將并力  
擊之昌懼退入城中遷全武諸軍都虞侯東面都知兵  
馬使遂攻五雲門時淮將臺濛陷姑蘇鏐欲遣全武屯  
西陵以備北寇全武曰賊之根本繫於越州豈以失一  
姑蘇而遂緩大衆也當先拔越州後復茂苑未為晚也

繆從之俄而越州陷執董昌以歸奏加全武檢校太保  
明州刺史四年與沈夏許再思率師由海路以赴嘉禾  
諸將欲緩入全武曰嘉禾圍閉久矣莫知我之勝負宜  
速往慰之因倍道而進城中見我軍旗幟皆稱萬歲全  
武與昌將李宗禮頓全戰於城外大破之擒頓全宗禮  
餘衆遁去俘千餘人以歸嘉禾平時吳將田頽守吳興  
聞之亦遁去全武追襲百餘里斬馘沉溺者千計遂督  
衆復蘇州吳將臺濛棄城遁走時淮軍屯崑山全武擊  
破之擒吳將秦裴光化二年加贊忠去偽功臣天復初  
淮將李神福攻衣錦城繆遣全武率兵禦之全武素輕  
李神福領衆夜掩其軍為神福所敗執全武送於淮南  
繆方食聞之大驚以匕擊案曰喪我良將二年楊行密  
遣使來求秦裴因歸全武繆大喜以秦裴報之是歲徐  
綰許再思叛圍外城繆懼綰據會稽將令全武領兵屯  
越州全武曰東府不足往當詣邗溝繆曰何也全武曰  
綰急必召田頽來則淮南興師矣繆乃令全武行成於  
吳全武又曰獨行必不濟請擇諸公子與之同往繆乃  
以元瑋聘楊氏與全武俱行至廣陵楊行密遣使召頽

還師明年全武與元瑋同歸長興初以疾卒年六十五  
全武寬裕有謀善撫士卒喜怒未嘗形也每大敵在前  
輦鼓動地分布行陣願指口授怡怡如也嘗圍淮將秦  
裴於崑山裴援絕不降頗殺傷士卒全武自為長檄以  
諭裴裴乃封函納款全武喜召諸將觀之既發函乃佛  
書一卷蓋以全武為僧也諸將失色全武大笑曰爾不  
即死何暇相謔也及裴降乃為言於鏐卒全活之時人  
稱其長者

### 黃晟

晟明州鄞縣人少伉勇始應募於望海鎮鎮中立表以  
選魁梧者晟以姓陋不中選隸都虞侯林膺膺甚倚之  
後潛歸鄞江募衆據平嘉埭權知州事楊僕召補平嘉  
鋪將有衆千餘人初劉漢宏以台州賊劉文知明州事  
僕率兵擊破之其党杜宗自寧海鎮率鄉豪據奉化晟  
自平嘉以所部兵擊之擒杜宗赦而不殺盡驅使還台  
州獲其粟帛悉屬於本道遷欽飛都副兵馬使徙奉化  
鎮將餘姚鎮將相喜率衆侵越州董昌禦之不利晟領  
兵追喜殺之昌奏授晟左散騎常侍充浙東道東面副

指揮使會明州刺史鍾季文卒晟遂據其郡晟好禮尚  
文士江東儒學之流多往歸之辟前進士陳鼎羊紹素  
以為賓介頗加優待築居於城中謂之措大營董昌將  
僭竊晟每移書諭之及鏐舉兵乃率衆來應破越州晟  
功居多在任十八年開平三年卒時屬郡刺史卒多遺  
疏請立其子晟疾亟獨上疏不請以子為嗣凡府庫所  
蓄必題送使鏐頗歎其忠順

九國志卷五終

九國志下冊

九國志卷六

宋路振撰

前蜀

高祖以唐大順二年入成都至後主咸康二年國滅父子二世凡三十五年

高祖姓王名建字光圖許州舞陽人會黃巢亂與鹿晏

宏等西迎僖宗於蜀時中和三年十二月也明年赴行

在僖宗以為諸衛將軍光啟二年三月再西幸李昌符

焚棧道幾新建控僖宗馬過焯焯中既至興元命為壁

州刺史大順二年破陳敬宣入成都為西川節度使天

復七年九月建號曰蜀明年改元凡改元五武成三年



永平五年通政一年天漢一年光天一年共在位十一年於光天元年六月薨梁貞明四年也年七十二諡曰神武聖文德明惠皇帝廟號高祖葬永陵

後主名衍字化源初名宗衍建第十一子光天元年六月癸卯嗣位改元乾德至六年改咸康是年十二月為後唐魏王繼岌破滅出降時唐同光三年也明年四月己丑被殺於秦州驛年二十八

### 王宗裕

宗裕建之宗屬幼從建入為牙校善遁甲絕甘分苦得

將士心大順二年與王宗祐克彭州遷青衣刺史建伐梓潼為第二指揮使建親督諸軍力戰宗裕必冒矢石以掖衛之東川平諸將爭功宗裕口未嘗言戰謙和接下人皆服其沈厚為東川留守昭宗下詔加以真命武成功召歸總成都城內外諸軍事其導從不避成都尹崔隱隱懲其僕宗裕大怒入白建建曰京尹五火長君汝有識之士也不能教戒參從反令我責大尹耶宗裕僂俛而出再為東川節度副大使班白者携幼以迎於道封通王永平初建興師取秦鳳等州再至綿谷宗裕



饋輓貢獻道路相望建以其盡瘁明年乃改東川為武  
德軍以宗裕為節度使宗裕既秉旌鉞遂貪冒財貨以  
白金百兩作鋌鑄計年月每五鋌為一束以生牛皮裹  
之子諫曰牛革著物堅確後難可開宗裕叱之曰何更  
開也罷歸 慰諭久之自謂功高以征伐為己任築第  
蜀城中頗損民舍有酤者青陽家不徙去宗裕遣人以  
巨虺寘其舍中復投以穢溲酤者將訴於建宗裕懼而  
止之又於郊外開廣林莽壞掘邱墓立亭榭鑿池沼樹  
花木携妓縱酒為樂一日方醉坐軒檻中見數人衣冠  
甚偉謂宗裕曰與君幽顯異路何相陵太過因相顧大  
笑宗裕亦笑遽仆於地寢疾不數日而卒

### 王宗壽

宗壽建宗人之子幼從征伐警悟有機辯好琴碁篇什  
方術皆臻其妙建入蜀奏署懷 節度使以所部鎮逼  
江源縣嘗以許汝間得一鉄鏡晦不可鑿屢令工人瑩  
之了無所睹著巾奩中有日矣至是忽覽之光彩煥發  
因見市舍中小兒青衣卅角獨坐宗壽異而使人招  
之小兒曰何以知我至此宗壽以言怛之不惧因曰我

與鐵鏡來耳公不見選神物終當化去君以還我他年  
當有報也宗壽出鏡與之乃長揖謝去後宗壽得辟穀  
行氣之術或謂小兒傳之乾寧初建令率所部兵平南  
充遂知果州事安輯離散得郡牧之體武成初封嘉王  
荆南高季昌畧地三峽建以壽為忠州節度使兼行營  
招討使以鐵鑠斬夷陵江季昌戰艦不能進宗壽禦之  
大敗荆人季昌奔歸以功加中書令宗壽性方正樂於  
貞退自歸成都以飛鍊自娛與孟繼平許寂楊珍為八  
室清設之友未幾為金吾上將軍持法平正院吏周郃

受贓鬻獄宗壽捕鞠得其實郃以重貨求救於大閹為  
解宗壽不聽竟棄郃市建討鳳翔以宗壽為第三招討  
使取陳倉還衍襲位宗壽請閑火之行沈酒色時宣華  
苑初成數為長夜飲宗壽在坐諫衍請以社稷為念少  
近盃酒因感激流涕佞臣潘在迎顧在珣韓昭等奏嘉  
王酒悲無怪也乃大為諧謔而罷後起為武信軍節度  
使破雞子槽賊擒其魁李茂章請納賂以求免宗壽曰  
吾歷官四十年未嘗受同寮之遺况爾賊乎遽命斬之  
唐師入境郭崇韜遣人遺宗壽書宗壽不納聞衍降乃

治裝赴闕時行先次岐陽宗壽請於李嚴求謁衍衍見之泣下曰早從王言豈有今日及衍遇害奔入熊耳山依定林寺明宗即位詣闕自陳賜與甚厚授保義軍節度使行軍司馬上表請葬衍許之初衍至秦川驛母妻及子弟遇害者十八人並藁葬道左至是宗壽盡易棺歛縞素徒步親自營護偕葬於三趙村聞者義之明年授淄州刺史卒

### 王宗鑑

宗鑑建從子也以偏裨從征建入閬州署都知兵馬使從征東川有功遷廣都鎮遏使天復中僖宗反正建令宗鑑以所部兵奔問行在授北路第二班馬步軍排陣使建親征山南以宗鑑為御營使師還留屯平林時岐將劉知俊等繼領大軍分路來攻由階成路奪固鎮糧宗侃唐襲等禦之至青泥嶺為知俊所敗退保西縣會大雨漢江漲宗鑑自羅村得鄉導緣山而行數百里與宗播遇於鐵谷合軍出湯頭時知俊自斜谷山南直抵興州圍西縣軍人散掠巴中宗鑑與宗播襲之會建亦至遂解西縣之圍以功遷山南節度使同平章事從征

秦鳳遷中書令衍襲偽位加太保乾德六年卒

### 王宗佶

宗佶豫章人本姓甘氏幼穎利建討徐堂舉於江西獲之憐其慧黠是時諸子未生遂收為養子每給事帳下後從建入關中隨諸將征討有功號貔虎都指揮使遷嘉州刺史乾寧中建克綿州以宗佶為兵馬留後尋加檢校太傅知節度事未幾移鎮梓州昭宗幸鳳翔建遣宗佶與宗滌等率步騎迎駕至山南降節度使王萬宏以功加檢校太尉武成初進爵為公拜開府守中書令

宗佶恃其位隆地長頗專征伐而諸將皆避之多樹朋黨策勲錄舊高下在心附順者超擢違戾者擠之散地及宗懿等兄弟長成內不自安遂與御史中丞鄭騫判官李綱謀求為方鎮欲為亂建知之因進封晉國公罷其機務宗佶憤怨陰養死士出八卦內將圖不軌鄭騫等又教宗佶求為大司馬盡總六軍并乞為儲貳表連上而辭甚不遜建未之罪也忽一日請對言詞甚悖建勉諭令出終不肯去因叱衛士撲殺之騫綱並賜死

### 王宗翰

宗翰建之姊子也本姓孟氏建為神策軍使僖宗封其姊為晉國夫人宗翰最被親愛建入蜀以宗翰為拱辰軍使累遷眉彭二州刺史封集王賜姓王氏授文成等州招討制置使宗翰好蓄妓妾後庭綵翠常百餘人性殘虐各責刺彭州日部民史有胡讓莊號為沃饒宗翰殺吏民而取之元膺之亂以兵入衛建令安撫元膺倉卒而死建疑宗翰殺之竟無以自辯通正初投通義軍節度使同平章事守興元尹以杜堯嗣為之佐令規正焉宗翰於泉倉置寨於捍龍山與上清寨相接分鄉兵屯守建畧地秦隴以宗翰為第一招討使拔大散關取陳倉耀兵三壘而還宗翰所為不法堯嗣多諫止之及為招討使請堯嗣同行至大散關堯嗣腹疾請歸府乃自木皮店沿流而去宗翰令以膠舟載之中流而溺天漢元年宗翰被病若見堯嗣既而堂宇藩溷隨其大小皆堯嗣在焉疾遂亟數日卒

### 王宗滌

宗滌潁川人本姓華名洪建將入蜀募勇敢之士以宗滌為廐將宗滌膂力驍果輕財好施為士卒所推得隸

神策軍為小校建入成都以宗滌領前鋒兵奪星宿寨  
進攻七里亭以功奏授威信都指揮使邠州王行瑜與  
鳳翔李茂貞攻楊守亮於山南鳳州節度使滿存禦之  
為茂貞等所收存與守亮退保山南茂貞逼之因同奔  
閬中建令宗滌率兵禦之破存等衆斬其將梁承裕俘  
數千人景福元年授邛州刺史為都指揮使攻九隴守  
亮遣將符昭率兵解九隴之圍直趨成都營三學山建  
亟召宗滌歸夜至古城去昭營數里乃多設更鼓遲明  
益張旗幟徧諸山谷昭疑蜀師不敢出戰宗滌命發機

石擊昭營中聲震山谷昭恐懼乃夜遁去宗滌回攻九  
隴拔之後從建攻梓州宗滌以衆五萬先赴東川與岐  
將李繼徽遇於元武宗滌擊破之以功賜名五十三指  
揮之首梓州陷斬顧彥暉降其兵七萬餘衆遂以宗滌  
為東川留守光化初奏授東川知節度副大使事二年  
歸覲遂以疾乞解職建不許昭宗反正梁祖與崔胤叶  
通盡誅中官更相引兵輦轂之下咫尺不通昭宗密遣  
中官仇承坦諭旨於建建遣宗滌與宗佶宗播率步騎  
迎駕至山南遂王萬宏據其城投山南節度宗佶等以

其功高溝以飛語建疑之因至詰讓將加之罪宗滌對  
曰天下寇<sup>盜</sup>平矣是大王聽邪說誅功臣之秋也建曰昨  
在大謾天寨中已有不軌之言矣我念汝之勤尚為隱  
忍今又狂率如此豈憲章之所容也宗滌不顧而起建  
因令人監歸於本營明日盡削奪官爵流於松州既行  
縊之於城外營中將士聞之皆相對掩泣初建開國造  
端門新樓名曰紅樓采繪既畢都人士女競往觀之曰  
看畫紅樓建以宗滌得軍情復有是讖故誅之人稱其  
冤

### 王宗侃

宗侃許昌人本姓田名師世為鄉豪隸名忠武軍藉建  
為部將奏署宗侃決雲都兵馬使光啟中田令孜逼僖  
宗西幸道出陳倉建率宗侃同扈蹕又從建起闔中賜  
姓名討陳敬瑄敬瑄遣漢州刺史張頊領萬餘人來逆  
戰宗侃擊破之敗句惟立於學射山韋昭度來鎮西川  
敬瑄遣將山行章將兵六萬拒戰宗侃破之於沅寨縣  
州刺史常厚奪留東川顧彥暉旌節建令宗侃討之破  
其七寨厚奔緜谷奏授宗侃雅州刺史遷眉州團練使

未幾授武信軍節度使建開國以宗侃有佐命功進侍  
中城內外都指揮使尋加中書令充北路行營都統岐  
將李彥琛寇漢川宗侃保安遠城與宗鑑等三將同破  
岐軍斬彥琛行襲位封宗侃為魏王年六十六而卒子  
承肇入洛為行軍司馬

### 王宗瑤

宗瑤字寶臣燕人也本姓姜名邛以騎射隸許昌軍籍  
中建擢為陳長建迎駕山南宗瑤以勇伉得隸左神策  
軍能馬上盤槩長丈八尺每臨陣馳突人望而畏之遷

威猛副兵馬使建入閬州為先鋒十九都都頭左威猛  
都知兵馬使賜姓王氏更今名軍至緜竹誘諸蠻酋帥  
蹇諫等得其兵數千人破常厚授蜀州刺史昭宗幸石  
門詔建赴難以宗瑤為北路行營都指揮使奏授嘉州  
刺史天復中授武信軍節度使建開國加太子少傅後  
封臨淄郡王建病亟以宗瑤為金吾使參預顧命行襲  
位授太傅嘗自作高冢遇暇則酣酒高歌於其中無疾  
忽一旦默坐而卒年六十七人以為知死

### 王宗播



宗播字昌遠上蔡汝陽人本姓許名存少有胆勇秦宗權據上蔡召募豪傑以宗播為裨校宗權為梁祖所破部下皆逃散宗播亡抵荊州聞郭禹在歸州頗完聚得士卒心遂往依焉禹知其材令統青州元從兵三萬人時襄州兵圍逼荊州靜江遊奕將牟權領衆屯清江源據大山列寨諸營危窘宗播言於禹請討權於是伏兵清江岸中遣裨校蔡行能捨舟直抵山下權素輕行能罄軍來戰行能遁歸舟中權盡銳逐之宗播發伏兵掩其後擒牟權收其軍實以歸於禹禹大喜俄而荆帥張

瓌求救於禹禹令宗播率岐州兵解其圍禹度瓌懦弱因據其城秦宗權上蔡別將常厚以數百人由均房來攻夔州刺史毛湘棄城遁走保白帝厚圍之禹與宗播以十擢子兵寨於南山以攻厚厚令夔校韓楚言罵禹禹不勝其辱宗播請以將士五十人夜斫其營上赤甲山揭巨石投厚寨中厚恐懼與百人遁去遂破其寨復取夔州毛湘奔成都禹令捕韓楚言已為其妻所殺矣先是楚言妻李氏語其夫曰君嘗為常司空罵郭尚書今寨柵危急鋸解之苦旦夕至矣不如早為之所楚言

不忍曰且看事勢李度楚言終不引決乃以及自後浙  
其首并殺二男一女曰無為他人所魚肉也遂自到死  
禹聞之大驚駭為給棺斂刻石以旌之留行軍劉昌美  
守夔州與宗播沂江而上郡縣望風而潰號宗播為許  
掃土禹至萬州賞功以宗播為萬州刺史宗播不得志  
居歲餘禹遣人偵之見宗播不治州務但出蹴踘乃曰  
萬州必背我習脚力耳遣卒三百襲之宗播踰垣夜遁  
遲明其衆稍至遂保豐都禹攻之宗播奔成都建得之  
甚喜令以所部屯蜀州賜名奏授絳州刺史建討王萬

萬宏以宗播為前鋒破金牛黑水西縣褒城四寨乘勝  
傅其城萬宏降以功奏授漢州刺史加檢校太保建即  
位改金吾衛上將軍領彭州團練使岐將劉知俊圍西  
縣宗播為四面招討馬步使夾廉讓水置連珠寨首尾  
相應以勁卒二百出五動磴擊之岐軍大敗遷武信軍  
節度使又敗諸蠻於播倉加兼中書令為三招討攻隴  
州降李繼岌封臨穎郡王被病歸建至其第執手曰北  
面開拓公之力也衍襲位授太子少傅乾德五年卒年  
六十八

王宗鈇

宗鈇許昌人本姓李名武父裕為忠武軍小校鈇少無  
賴善騎射建募義兵迎駕得宗鈇以隸帳下至岐山屢  
有戰功署為隊長尋遷為裨將以勇過人號為武子路  
建入蜀賜姓名常寘左右遇敵必獨挑戰挾人奪馬而  
還遂為軍所推建攻成都一日城內出數騎直抵七里  
橋宗鈇因躍馬奪關子門蜀將宗行能策馬援槊而至  
將及宗鈇佯墜馬奪槊以刺行能徑走入城宗鈇逐之  
至門而還建慰勞人之撫背曰吾能得成都當宥汝十

死洎建開國授晉州刺史性輕率好貨恃勇不法永周  
歲以訟免官歸成都

王宗弼

宗弼許州人本姓魏名宏夫以家籍隸忠武軍建討王  
仙芝尚君長皆在帳下建取閬中補義勇都十將賜姓  
名及入成都改左驍騎都知兵馬使累遷嘉眉二州刺  
史建征果州宗弼掠地於飛鳥為顧彥暉所獲責之曰  
王公見討而君為大將不能諫止何敢來見宗弼曰罪  
固當死但念平昔與相公有素故敢來也彥暉笑而釋

之先是岐將常厚攻梓州彥暉乞援於建建遣宗弼等  
援之臨行建謂宗弼曰汝等破賊彥暉必攜汝汝當報  
宴俟彥暉至營中則擒之俱來庶免後舉也宗弼如其  
約及將報宴而宗弼告之彥暉遂以疾辭故宗弼以為  
言於是厚待宗弼以為養子及彥暉兵敗建圍之益急  
彥暉弟彥瑤有武勇知其城必陷請彥暉衆族沈飲自  
裁無為他人之所魚肉一日城陷彥瑤仗劍入室宗弼  
與諸子尚在彥暉顧宗弼曰爾非我子可自求生也因  
壞垣而出彥瑤遂及彥暉與諸子而自刎建入梓州宗

弼束身自歸建待之如故逾年復令將上軍再授嘉州  
刺史封鉅鹿郡王天貞軍節度使衍襲位拜宮城內外  
都指揮使判六軍事封齊王衍將往秦州宗弼曰唐兵  
壓境秦州何可去耶又上表切諫衍怒擲之於地衍次  
利州唐師已入散關陷鳳州衍遂遣三招討屯三泉以  
拒唐師未戰三招討俱遁走因令宗弼守縣谷而誅三  
招討宗弼遂與三招討同送款於魏王乃還成都斬宋  
光嗣等函首送於魏王遷衍及母妻子西宮貴戚納金  
寶進妓妾救死於宗弼者不可勝計微有絀誤者咸遭

戮焉盡輦內藏之貨實歸於其家魏王遣使徵犒軍錢數千萬宗弼輒斬之魏王甚怒及王師至令其子承班齋衍玩用直百萬獻於魏王并賂郭崇韜請以己為西川節度使魏王曰此我家之物也焉用獻來魏王入城翌日數其不忠之罪并其子斬之於毬場軍士取其尸鬻而食之先是蜀有謠言曰我有一點葯其名為阿魏賣與十八子至是宗弼背國歸唐果其驗也

### 王宗範

宗範本姓張氏幼表父隨母周氏再適建為九夫人宗範年十歲冒姓王氏及建開國立周氏為后宗範沈厚寡言好延納名士親從軍晉暉以女妻之封夔王加太子少師永平四年黎州蠻入寇以宗範為第一招討使宗播宗壽副之乃以所賜金募果敢士出印峽關至潘倉大破蠻衆斬其首領趙嵯政追奔至山口城與宗壽合殺八千餘人擒蠻王子趙龍眉等三人以歸加中書令後隨衍入洛至長安張錢為節度留後宗範以珍玩賂錢請復姓為猶子易名師範後唐天成初王宗壽改葬衍師範來吊贈宗壽不與齒後為雍州行軍司馬而

卒

周博雅

博雅潁川人唐光啟中為龍州司倉參軍考滿將歸闕以川路梗澁乃寓止緜谷建至博雅袖策謁見於軍門建素聞其名一見忻然接待甚厚置之賓席博雅因說建曰唐祚將終有土疆者恣為吞噬以強併弱然以僕觀之皆非濟世之具也明公御衆有術臨事能斷僕昨在龍州已為明公籌之矣自主上蒙塵明公親控乘龍匍匐棧道懷國璽以從周旋患難險阻之中勤亦至矣

及論功受賞不過刺史今端守一隅坐待窘迫非君子豹變之象也且葭萌四會五達之郊非久安之地若不薄人人將薄我不如果闔地與民豪楊行遷為陳田之用控扼要害不修職貢以明公臨之可一鼓而擒也得其地以廣形勝得其士以增卒伍此策之上不可失也建然之遂取閬中之地乃奏署博雅為判官建赴成都為陳敬瑄所拒退無所保建甚危之博雅曰兵家勝負無常古者出師自非晉重耳之賢豈有一戰而霸者今邛南城壁完固粟支數歲取之可以斬蜀右臂願明公

留意建曰吾少在戎行備知民意若無受鉞之將必謂自圖其利今欲請朝廷命將出征吾當助成其事博雅曰善乃令博雅作奏牘朝廷嘉之下詔褒獎乃授韋昭度西州節鉞令與建同討敬瑄割邛蜀黎雅四州為永平軍節度使建壁靈池與王師戮力逾年會糧運不繼建欲請韋公班師因謂博雅曰韋公歸闕我當以兵塞劔門朝廷謂我何博雅曰今皇綱不振強臣掣肘朝廷命令不出閨壺明公當折節為軍民計豈得顧此也於是建乃請韋公歸闕而上表自陳急攻成都克之奏授

博雅觀察判官後出知渝州未幾詔加節度判官遷嘉州刺史建開國名拜成都尹遷御史中丞俄拜中書侍郎平章事建薨葬永陵博雅議山陵事俄請老遷左僕射出為永平軍節度使雲南安撫使依舊平章事卒年六十六博雅本名詳犯孟知祥名蜀史追改之

### 晉暉

暉許州人父和為忠武軍列校暉少有胆氣杜審權鎮許昌以暉為頭營十將從鹿晏宏迎駕至山南晏宏遲留不行暉素與建相善謂建曰鑿駕將回晏宏觀望不

進而姑息吾輩甘言見誘苟不自圖去就禍且及矣不  
如以所部兵為勤王之舉不爾為晏宏所累且宮車反  
正以吾等為賊党何面目行於天下建然之遂俱行迎  
至三泉僖宗嘉之名其軍曰忠義以暉為指揮使隸右  
神策軍及再幸褒斜復統南營兵與建同為先鋒天子  
居梁暉統四部兵屯黑水修營棧道往來無阻朝廷慮  
其疆盛因罷拱衛授集州刺史以散其朋聚一歲之中  
凡歷數郡蓋欲窘之也建圍梓州遂往會焉建以暉為  
壕寨使建開國授武泰軍節度使同平章事黔中郡縣

多屬涪陵比部員外郎陳巖為涪州守以暉制銜中不  
帶涪州刺史遂不納牌印暉上疏歸之凝責授瀘州司  
戶暉招來逋竄剷除蠹弊州民愛之俄上表請老日夕  
與親友宴談噓為娛嘗自言曰吾生罹多難學執干戈  
者為求飽暖耳今至此矣復有何望我嘗拔王宗魯於  
行陣今致位將相女復為王妃矣分封宏農郡王卒年  
七十九

### 張造

造長社人父公素齊州長史造幼好兵家之學年二十



應募隸忠武軍從鹿宴宏出征及宴宏據褒中心無回  
志因與建謀曰吾輩遠離鄉土保聚無名今大駕將回  
主帥反側或隨其逃遁則皆賊也不如率衆拱衛以取  
美名建納之遣使上表僖宗驛召旌賞遂參翊為隸神  
策軍及再幸褒中以扈從功授萬州刺史道阻不能去  
會建起兵閬中以造為行軍司馬廣漢糧盡建慮軍情  
有變謀各據一郡以自固造首唱大義慰諭將士衆皆  
感悅龍紀初詔授行營諸軍馬步都虞侯遷茂州刺史  
從建討陳田引軍攻笮橋為朱敬瑄所敗歿於陣年四

十五建以其死事聞詔贈司徒子彥昭為感德都知兵  
馬使從建收巴西破葛佐授劔州刺史建圍梓州彥昭  
攻堅力戰歿於陣建痛惜撫其尸以泣曰父死於前子  
繼於後忠勇之節出卿一門矣

### 張勅

勅長葛人善推步之學少隸忠武軍籍從討王仙芝以  
勇敢稱建以所部迎駕署勅義勇都判官後隸神策軍  
乃總占候之要著太一元精秘訣詩七十一首以獻僖  
宗奇之詔與建同列從建起閬中破德陽寨斬王彥儔

時建屢為山行章所困勅每臨陣拔梨蒙輪殺十餘人  
敵為之稍却奏署定信軍都知兵馬使大順中與王宗  
保同破浣花寨建將入成都城中多亡命不逞之徒建  
恐其搆亂乃命勅為諸都斬斫使兼左右廂都虞候以  
誘掖鎮撫之勅既入城索無賴者得百餘人悉鞭其胸  
死者相籍中外帖然不敢偶語建即位歷眉邛二州刺  
史卒

### 李簡

簡許州長葛人少以驍勇隸忠武軍從鹿晏宏出征有  
功遷為列校建起閬中簡為義勇都副兵馬使大順二  
年陳田遣將屯犀浦簡以所部擊破之武定節度使楊  
守忠與常厚舉兵援陳田建令簡逆擊之相遇於鍾陽  
簡謂諸校曰賊遠來多疲及其未成列擊之遂整陣鳴  
鼓而進連破其七寨斬首千餘級擒其將楊知宥楊行  
立等獲其軍資甲馬不可勝計建攻毛相於邛州以簡為  
前鋒晉原守任從誨領步騎二萬啣枚奄至解邛州之  
圍簡曰賊輕而驕正可用奇不勞與戰乃分步騎三千  
為兩翼潛河村俟其半過來擊之從誨敗俘甲馬數千

九國志 卷六 二一  
俄而邛州軍使任可知斬湘以降建令簡入城慰撫景  
福中彭州部將李堯率兵焚繁雒以援常厚建令簡逆  
擊之臨陣斬堯遂進攻其城遂拔七寨常厚遁走建獻  
捷於朝以簡為邛州刺史卒於治所

潘在迎

在迎字亞卿前蜀樞密使炕之子身長六尺精神警悟  
少任俠不修細行交結屠狗天復中起家節度押衙王  
建開國以為扈蹕軍使檢校司徒守羽林大將軍內皇  
城使唐宸構難謀害宿將委在迎以心腹黜者既行多

以後命誅在迎妻徐氏后兄女也為營護之獲免衍荒  
於酒色在迎與韓昭華多預宴宮中自昏達旦王宗壽  
泣諫衍在迎等紹以酒悲感自是大臣結舌無敢言者  
王宗壽鎮果州以在迎為都指揮使知州事築江賊杜  
處齊招納亡命據巴王城在迎討平之以功授果州團  
練使魏王繼岌平蜀補為右職知祥鎮成都復令典兵  
未幾出為蜀州刺史董璋遣使并韜於郡中置邸回易  
在迎給事蓋仁達盜官麥以逃誣告在迎因并韜密餽  
金於董璋知祥命執仁達送於蜀州在迎斬之尋令在

迎以州兵按撫 服葯下痢以疾告召歸知祥親  
臨問焉遂請致仕從之嘗謂人曰我於前蜀有誅唐宸  
安社稷功當合秉旄鉞今逮事霸王親  
不得命矣夫明德末卒於成都年五十五在迎  
以財發跡至於權門要地悉啗以厚利曰未必盡仗  
之但不欲其冷語冰人耳

九國志卷六終

九國志卷七



宋 路振撰

後蜀

高祖自後唐同光三年入蜀至後主廣政二十八年國滅父子二世凡四十一年

高祖姓孟名知祥字保允邢州龍岡人晉王弟克讓婚

也莊宗建號為太原尹同光三年破蜀以為成都尹充  
劍南西川節度副大使明年莊宗遇弒明宗立加封太  
原公長興三年破董璋兼有兩川為蜀王明年建國改  
元明德是年七月甲子薨年六十一謚文武聖德英烈  
明孝皇帝廟號高祖葬和陵

後主名昶字保元初名仁贇知祥第三子明德元年七月丁卯嗣位不改元仍稱明德元年四年改廣政至二十八年宋將王全斌軍至城下出降五日至汴京改封秦國公越七日薨時宋乾德三年六月也年四十七追封楚王葬洛陽

### 趙季良

季良字德彰濟陰人父允唐穀熟令季良幼涉書史長於吏治尤善騎射王檀聞其名辟為保義軍節度推官楊師厚鎮鄴署元氏令徙魏州都督府司錄參軍後唐

莊宗入鄴召見與語以季良有文武才略即授大理評事依舊司錄參軍充義勝都指揮使軍中謀議多以諮之時兵革屢興屬邑租賦逋久一日莊宗召至切責之季良對曰殿下何時當平河南莊宗正色曰爾掌與賦而稽緩安問我勝負乎季良曰殿下方謀攻守復務急徵一早衆心有變恐沔南非殿下所有莊宗歛容前席曰微君之言我幾失吾大計自是益加禮遇遷興唐府少尹司錄參軍如故嘗夢手扶御座自謂輔佐之象繇是頗述天時人事以諷莊宗深納其言及即位授光祿

少卿兼洛南水陸營田都制置使明宗即位遷太僕卿  
會宰相任圜兼鹽鐵事薦季良為判官明事授檢校戶  
部尚書為西川官告使兼三川都轉運制置使知祥素  
重其名一見遂悅奏留為節度副使累表不許會李嚴  
來為監軍知祥深懷疑慮乃誅嚴而署季良為副使天  
成三年明宗下詔徙季良為果州團練使知祥匿其詔  
書密上表留之明宗不能奪遂允其請自是傾心接待  
情好款洽或入謁稍晚知祥必顧左右曰副使來何遲  
也及至則讌語竟日每有謀議無不見從時朝廷以夏

魯竒李仁矩分鎮遂闡季良言於知祥曰朝廷增兵二  
鎮張犄角之勢將有不測之變也公處親賢之地以忠  
信見疑倘失先機則禍不旋踵矣知祥曰計將安出季  
良曰我甲兵雖衆然而勢孤易動請與東川董璋合從  
先平遂闡則朝廷兵至我無內顧之憂矣知祥從之及  
王師入劍門而遂闡已平果無功而還及捷書至知祥  
匿之謂季良曰北軍漸邇奈何季良徐曰北軍至絳州  
已來必遁知祥問其故對曰懸師千里饋運不繼彼勞  
我逸不走何待知祥大笑以捷書示之及克黔夔二州

以季良為武泰軍節度使董璋率衆入廣漢知祥領兵拒之季良留守成都制置經度軍用無闕先是季良嘗與知祥從容語及璋植性狼戾下多怨憤若堅守一城攻之難克矣及聞璋起兵知祥憂形於色季良曰璋不守巢穴自來送死此天以璋授公也俄而璋果敗加檢校太保明宗崩知祥建號知特進守司空平章事宏文館大學士判三司昶襲位加守司徒領山南節度使行興元尹廣政九年卒年六十四謚文肅季良性寬厚居常無喜愠之色母早亡事從母如所生季札季友皆從弟也並致位清顯所上遺表言不及私蜀人避之

### 趙庭隱

庭隱開封人世為鄉家庭隱少知兵律尚氣義始事梁祖<sup>子</sup>友亮因擊鞠墜馬死庭隱董璋等十數人皆追赴汴州知其無過竟釋不問令給事左右末帝即位唐莊宗人<sup>人</sup>鄴兩河對壘十有餘年時庭隱為邢州都監累立戰功節度使劉重霸嫉之誣庭隱將所部兵降於莊宗因械送汴州末帝知其非罪又重違邊臣之請乃貶庭隱於南陽未幾追復舊職王彥章守中都庭隱在其軍

中及彥章敗庭隱為莊宗所獲將以就戮大將夏魯奇  
奏曰此矮也其材可用遂釋之魏王繼岌討西川以庭  
隱為先鋒監押自入敵境即禁兵士燒廬舍剽財物蜀  
人德之魏王平成都錄其功奏授左廂馬步軍都指揮  
使知祥至蜀康延孝陷漢州遣庭隱率兵擊破之擒延  
孝檻送闕下知祥奏加檢校司空漢州刺史因留屯成  
都長興初明宗將議伐蜀乃以夏魯奇李仁矩分鎮遂  
閣以分其勢知祥令庭隱與李仁罕張業率部騎十萬  
經略遂閣魯奇堅壁不出戰會唐師入劍門知祥急召

庭隱令統銳兵五千至東川與董璋合軍以拒之至中  
路大寒士卒不能前庭隱撫諭勞問將卒皆奮遂營於  
晉安深溝固柵以養銳一日唐師奄至又分兵斷三亞  
父水及王橋庭隱密遣軍中善射者五百人伏唐師之  
歸路乃領軍出營久而不戰至暮唐師退庭隱縱兵追  
之伏卒齊起表裏合擊唐師大敗初唐師之人劍門也  
內有堅壁外有勍敵遠近震駭及庭隱之捷人心乃安  
知祥遣使慰勞賜書以褒之明年別將平魯奇唐師至  
葭萌而還庭隱班師知祥親勞於郊翌日至其第錫賚



甚厚即授昭武軍節度使留後以鎮邊葭萌知祥送於北郊親舉觴以勸之在鎮踰月上言三泉餘寇盡去乞假一旅之師以拓漢中及秦鳳之地知祥答書慰勉且令休息董璋襲廣漢將攻成都時東川廩藏充實部下多敢死之士其來也衆皆畏之知祥親督諸將召庭隱為副以率勵士旅璋遺書庭隱而詐達於知祥以書授庭隱投書楮中曰此必反間之辭不足觀也竢擒董璋而後閱之與璋戰雞蹤橋前頗為所挫庭隱偽遁璋逐之知祥與公鐸領兵繼進璋軍亂不成列庭隱後整陳

與知祥公鐸合擊之璋軍大敗斬首數千級璋領數騎遁歸東川為部下所殺庭隱追至東川頓兵城下以待知祥梓州平以庭隱為節度使會李仁罕自遂州至求領東川庭隱將讓之知祥以庭隱功多且怒仁罕之貪懷遂自領兩川節度使以庭隱為保寧軍節度使以閬果遂渠梁五州隸之祖襲位李仁罕求總六軍將圖非望以庭隱為六軍副使以制之未幾仁罕誅改衛聖諸軍指揮使明年移鎮東川廣政初加中書令庭隱久居大鎮積金帛鉅萬窮極奢侈不為制限營構臺榭役徒

日數千計十年被病懇讓兵柄疏再上從之仍就第冊  
為宋王經歲不能起賜肩輿入朝既謁見昶感動涕泣  
錫金沃盥及繒綿加太師卒年六十六子崇祚崇韜

### 趙崇韜

崇韜少驍勇有父風累從征討有功署副兵馬使及庭  
隱卒昶以崇韜領衛聖諸軍使以襲父任廣政二年周  
師復至境上昶以崇韜與控鶴指揮使袁可鈞同為北  
面招討崇韜率勵將士行陣整肅士卒有黥其額為斧  
形者號曰破柴周師前鋒屢為崇韜所破至歸安而退  
二十七年王師來伐崇韜與李廷珪等率兵拒之遇王  
師於漢源崇韜策馬先登我師大敗崇韜力戰不止兵  
器皆斷折猶手擊殺數人為王師所擒

### 張業

業開封浚儀人性沈厚有果斷事梁為東頭供奉官時  
兩河兵革未息業頻領監護之任皆立戰功法令峻整  
士卒畏之莊宗入洛聞業有幹略擢為列校繼岌伐蜀  
以業監先鋒兵補右廂馬步軍都指揮使蜀平以所部  
兵駐成都知祥入蜀奏授檢校司空簡州刺史時蜀漢

賊盜羣起燒劫鎮戍百姓驚擾知祥遣業率兵捕之業  
令五家為小保五十家為大保旬日之內擒獲殆盡討  
夏魯竒於遂州以功授寧江軍節度使兵馬留後董璋  
襲成都業在夔州聞之率所部赴難東川平正定授節鉞  
加檢校太傅明德初領右匡聖步軍都指揮使會武定  
興元兩鎮來附令業將兵二萬屯漢水業至褒梁分布  
寨柵控扼駱谷秦鳳諸隘會武定軍衙將與蒲谷鎮將  
任漢謙同謀導晉師入武定業遣戍卒擊走之昶襲位  
改武信軍節度使同平章事是歲昶殺判六軍事李仁  
罕業仁罕之甥也昶慮其為變詔歸本道未幾召入依  
舊同平章事兼判度支新收征税多為主吏乾沒業作  
盜税法犯者十倍征之吏民不堪其命業多視事私第  
中宰相之門被桎梏者常滿昶知之遽除十倍之法業  
子繼昭好擊劍嘗與淨衆寺僧歸信同訪劍術士右匡  
聖指揮使孫漢韶與業不協告業與繼昭同謀不軌翌  
日令壯士就都堂擊殺之年五十七

### 武漳

漳字巨州太原文水人父

汾州別駕漳少勇敢善

騎射事莊宗為定寨都虞侯莊宗以全軍援澤潞漳與  
裨將數攻其別寨斬首千餘級授太原衙前兵馬使改  
匡聖軍指揮使同先初從魏王繼岌入蜀因留成都知  
祥鎮蜀補衙內右第二指揮使天成初漳與張公鐸迎  
瓊華公主於北都中國兵革之後盜賊充斥漳被堅執  
銳通夕不寢至蜀改左第二指揮使奏授檢校僕射其  
後東討果閬北拓劍利漳屢有功授絳州刺史知祥開  
國改邛州遷山南節度使漳以褒中用武之地營田為  
急務乃鑿大湫以導泉源溉田數千頃人受其利入為  
奉饗肅衛指揮使未幾改山南加同平章事廣政七年  
卒於治所年六十四漳質厚儉約所至有治迹俸入之  
外不營貲產蜀人稱之

### 李肇

肇汝陰人父環唐神策兵馬使肇少以材勇從父征伐  
後隸宣武軍補左建牙都頭累轉陝虢馬步軍都指揮  
使莊宗平梁恢復平洛割宣武一軍隸於河東時知祥  
為北京留守待之甚厚同光中以所部兵從魏王繼岌  
討蜀蜀平班師康延孝至普安叛擁衆回據廣漢肇在

其伍中延孝敗肇被俘而知祥親釋其縛擢為衙內都  
指揮使未幾奏授嘉州刺史長興初我師圍夏魯奇於  
遂州唐師來援劍門不守肇領兵赴普安以拒唐師不  
得進以功改漢州刺史駐軍緜谷明年董璋率兵攻成  
都軍勢甚盛遣使致書於肇諭以禍福肇素不知書擲  
之於地曰此不過勸我叛耳因并其使殺之梓州平加  
昭武軍節度使昶襲位肇以足疾不即時來朝昶怒罷  
其軍權授太子少師致仕於邛州安置坎壈不得意廣  
政八年卒年七十

### 李仁罕

仁罕字德美陳留人少隸宣武軍為小校容貌瓌偉梁  
祖為四鎮節度署為衙內昭宗幸鳳翔梁祖遣仁罕奔  
問行在因修貢禮梁祖革命補宮苑儀鑾等使歷許蔡  
華三州馬步軍都指揮使莊宗伐蜀令監先鋒軍知祥  
領鎮奏授馬步軍都指揮使康延孝叛知祥命仁罕討  
平之以功授彭州刺史遷蜀州夏魯奇鎮遂州稟朝廷  
之命繕治兵甲將圖蜀知祥與董璋謀先討魯奇令仁  
罕攻遂州拔之以仁罕為兵馬留後未幾承制授武信

軍節度使又以所部兵定三峽走夔將安崇院知祥卒  
遺命仁罕輔政昶嗣位令判六軍事仁罕奉幼主無隱  
情自以先朝舊老遇事必諫時控鶴指揮使張公鐸內  
醫韓繼勳豐德庫使韓保貞弓箭庫使安思謙等皆昶  
在東府時舊所親狎素不為仁罕所禮皆懷怨怒每譖  
仁罕欲納王衍妃徐氏為側室遂誣以姦昶大怒俟仁  
罕入謁令武士擊殺之年六十二

### 李延厚

延厚涪州平恩人父及唐邢州別駕延厚少有膽略善

騎射從父琮為涪州節度使率衆歸於梁祖延厚亦從  
為梁輔左拱辰指揮第二都頭後唐同光中以所部兵  
從魏王入蜀改馬步軍右驍銳第一指揮使康延孝入  
漢州知祥遣延厚率精兵二千會李仁罕徃討之將行  
延厚集將卒於營口誓之曰令出師征討不三旬必破  
賊乃立功圖賞之日也士卒有誓報國恩不以家為慮  
者立東廂衰疾怯懦厭為征行者立西廂無自苦也得  
請行者七百人逐延孝西寨斬首百餘級竟拔其城以  
功奏授檢校右散騎常侍改右廂馬軍指揮使歷任陵

果二州刺史源州押衙文景琛叛延厚討平之岐軍逼文州延厚率衆赴援即日解其圍昶襲位遷雅州刺史永平軍節度使未幾移鎮昭武軍廣政九年卒年六十一

### 張公鐸

公鐸太原樂平人父頊唐儀州兵馬使公鐸身長七尺個儻有節義好文史之學知祥為北京留守錄為親從及出鎮成都補為牙校從高敬柔迎公主於晉陽轉義勝定遠都知兵馬使董璋舉兵襲我廣漢先鋒兵將至

成都公鐸率諸軍從知祥逆戰於雞蹤橋我師不利公鐸率所部兵力戰直衝其腹璋兵大敗梓州平以功授簡州刺史遷奉聖控鶴都指揮使知祥病公鐸與趙季良趙庭隱李肇等同受遺命輔政昶襲位授保寧軍節度使為政嚴猛寮吏畏憚時承前蜀之弊獄訟繁多案牘堆積公鐸量其所犯隨意裁決無不稱當在任六年民被其惠先是屬邑連歲多逋租公鐸詰其由乃豪民猾胥乾沒賦稅時令佐已有投代者公鐸悉勒止之令盡徵其租而後解由是不數月徵錢糧數萬貫解時論

以為嚴而不殘遷寧江軍節度使公鐸馭下嚴正宿衛  
二十餘年宮禁寧謚謚初染心疾昶憂之為玉局洞開靈  
寶壇親署青詞以醮焉廣政八年卒年六十二

### 張虔釗

虔釗遼州榆杜人父簡唐檢校尚書左僕射虔釗少以  
武勇事唐武皇莊宗之世累補左右突騎軍使莊宗嘗  
以偏師取鎮陽命虔釗率騎衆為前鋒屢挫賊銳遂陷  
其城明宗即位以虔釗有將帥才擢為隨駕親軍都指  
揮使歷遼春二州刺史天成中鎮定節度王都阻兵連

結契丹為邊患命虔釗為北面行營兵馬都監進討契  
丹殺傷甚衆虜不敢南下遂圍定州百日而城陷斬王  
都降其餘衆師還以功遷橫海軍節度使未幾移鎮山  
南兼西面諸州馬步軍都部署應順初閔帝即位以鳳  
翔節度使潞王從珂有異志發兵討之詔虔釗為犄角  
師次岐陽人心離散降於從珂虔釗憤之乃退歸南鄭  
率孫漢韶以山南之地納款於蜀知祥遇之甚厚委以  
節鉞昶襲位加中書令歷左右匡室馬步軍都指揮使  
出為昭武軍節度使及漢祖即位乃移鎮梁州以觀朝



廷之變會晉昌軍節度使趙匡贊鳳翔節度使侯益俱  
謀歸蜀遂以虔釗為北面行營招討使應接經略俄而  
趙匡贊侯益請昶出師掠定三秦因命虔釗與韓保貞  
等總師五萬出散關雄武軍節度使何重建出隴右奉  
鑾肅衛都虞候李廷珪出子午谷會於雍州廷珪始出  
子午谷聞匡贊為王景崇所逼棄城自拔東去遂先退  
私師時虔釗福誠保貞師次陳倉謀不相協而侯益聞匡  
贊已去廷珪班師亦誠款中變閉壘不出司天監趙延  
樞累以雲氣候不利諷於保貞保貞惑之乃與福誠率  
所部取隴州道會重建歸蜀虔釗留寶鷄以勢孤不可  
深入遂班師士卒夜發部伍不整至興州自以功業不  
成感憤而卒年六十六

潘仁嗣

仁嗣浮陽東光人父廷訓密州都指揮使仁嗣少倜儻  
尚氣起家為保義軍兵馬使後唐魏王繼岌西伐仁嗣  
以所部兵從入蜀蜀平改左右廂馬步軍都指揮使知  
祥受節鉞留在麾下康延孝襲漢州知祥遣仁嗣率兵  
救之連破數寨遂屯於漢州董璋興兵趨成都城外皆

為敵境仁嗣以所部兵陳於赤水璋以全軍二萬擊之  
仁嗣大敗以十數騎潰圍而出身被十餘創卧於血中  
及璋敗獲免知祥親至其第以藥傳之明德二年奏授  
武定軍節度使源壁等州觀察營田處置等使之任卒  
於成都年四十六

龐福誠

福誠河東太谷人少善騎射倜儻交結豪俠傾竭家產  
中原兵亂福誠聚徒鄉里剽掠縣鎮知祥為北都留守  
署昭為太谷主簿令招諭福誠因相率歸附從知祥入

蜀補衙內指揮使王師陷劍門從趙庭隱率兵據石橋  
福誠夜領兵數百人循水次東北上山攻王師夾其腹  
背王師不虞其至舉軍驚擾因奮擊破之以功遷茂州  
刺史知祥建國加檢校右散騎常侍昶襲位歷資縣邛  
三州刺史奉饗肅衛馬步軍都指揮使會張虔釗經略  
秦中以福誠為行營馬步軍都虞侯克寶鷄分兵吳山  
進攻隴州以歸改左驍騎軍都指揮使武寧軍節度使  
廣政十五年授衛上將軍以目疾罷卒年七十一

李彥琦

彥琦字子溫京兆長安人本姓楊氏祖父皆隸神策軍  
彥琦善騎射有權略唐中和初鳳翔李茂貞委以心腹  
之任易姓李氏齒於諸子後昭宗西幸梁祖迎駕攻逼  
岐下者累年及昭宗東還長圍方解大軍之後府庫空  
竭彥琦請使甘州以通回鶻徃復二載美玉名馬相繼  
而至所獲萬計茂貞賴之劉知俊自靈武班師途經長  
城嶺梁將率精銳數萬躡其後彥琦與俊同設方略擊  
敗之潞王之守岐下也諸道將急攻其壘彥琦時在圍  
中罄家財以給軍用潞王篡位以功授檢校太傅知河  
陽軍府事俄授鎮州兵馬留後晉祖入洛彥琦罷職西  
歸家財素厚乃閑關自奉游心釋氏專務散施廣政十  
年王景崇納款於蜀彥琦因歸成都授左將軍維州刺  
史卒年八十八

孫欽

欽幽州安次人性忠烈善騎射少遇亂隸安義軍節度  
使充衙內都頭後改補合州衙內都頭兼上客都虞侯  
從本州刺史徐璋入蜀會知祥鎮成都長無初轉充右  
截山都頭董璋來寇戰鷄蹤橋有功遷州刺史昶襲

位累遷東川武德軍左奉聖都指揮使廣政十五年令  
以所部兵北征欽將行白於都監王承丕承丕將謀亂  
欲害判軍府事郭延鈞曰詰朝當領部卒二千人介胄  
閱於雄義營欲與府公觀之欽未知其由從容謂承丕  
曰閱卒舊習皆木刀竹槍今都監令執滯器甲將士臨  
行又是詔旨或有不虞如何承丕遂止又明日欽已具  
行裝入辭承丕承丕止之同詣府中謁延鈞及延鈞送  
承丕上馬承丕願指數卒擊殺延鈞自稱准詔處置軍  
府事即據府廳指揮放諸司罪人分遣將較領兵屯果

閬縣劍州拒守劍門關發帑廩以賞將士自辰至巳亡  
命之徒應募而至者千餘人明日大會將校寮屬欽言  
於衆中曰郭延鈞既抵朝憲遠近未知其由公受命權  
總留務願出詔書以示軍府承丕曰作好官何問詔書  
欽知其已叛乃紿之曰州城內外人情未安願為公督  
部下兵以伺察之因躍馬而出承丕連呼不止馳至本  
軍立召將士告其事遂率衆徑趨府中承丕左右皆奔  
散因擒斬之傳首成都加檢校太子賓客二十五年寢  
疾卒年七十二

何重建

重建其先回紇之別部居雲朔間祖允慶父懷揭從後唐武皇世著勲閥因家於太原重建初事晉祖為奉德馬軍都指揮使歷驩睦曹三州刺史檢校司徒會延州節度使丁審琪殘暴貪冒蕃部苦之重建以所部兵攻其城審琪遁去晉祖即以重建權節度兵馬留後下車諭以威福邊民安堵就加彰武軍節度使累遷涇鄧貝澶孟五鎮節度使皆以廉儉簡易稱未幾移鎮秦州廣政十年契丹犯中原虜使齎偽詔至重建不勝其憤謂

此夏與上頁不接查原本流水原缺兩頁

謂副使趙崇濟監軍武守謙

曰北軍涉險遠來利在速戰宜堅壁待之守謙曰寇據吾城下而不擊將何待也乃獨領麾下千餘人以出時王師頓白帝廟西遣騎將張廷翰引兵與守謙戰我師敗走廷翰乘勝登城彥儔整眾將出拒戰王師已乘而入彥儔力戰於城下不勝身中十餘槍左右皆散去彥儔奔入府中及拒其門判官羅濟勸彥儔單騎歸蜀彥儔曰我昔已失天水今復不能守夔州縱不忍殺我何面目見蜀人乎濟又勸其降彥儔曰老幼百口俱在成

都以一人偷生舉族何負今日止有死耳即解符印授  
濟曰君自為計俄而王師壞門彥儔挺劍拒之殺十餘  
人於是登樓縱火自焚而死大將劉光憐其忠蓋收其  
骨以葬焉

### 李廷珪

廷珪太原人幼慧黠七歲隸知祥帳下為給事從入蜀  
為牙軍指揮使征康延孝有功遷陵州刺史知祥征東  
川廷珪權領親軍以從董璋平轉資州刺史累改眉蜀  
二州昶襲位遷捧聖控鶴都指揮使領興元節度使歷

雅遂闔三鎮加兼侍中廣政十八年周師攻秦鳳以廷  
珪為北路行營都統高彥儔呂彥珂為招討廷珪遣先  
鋒指揮使李進以兵據馬嶺分兵出斜谷營於白澗將  
腹背以攻周師又遣染院使王巒領兵出唐倉與周師  
遇我師敗走王巒死之而馬嶺斜谷之兵聞之皆退奔  
高彥儔與諸將謀退守青泥嶺由是秦鳳階成之地皆  
陷於周矣廷珪上表請罪昶釋不問明年來朝遷左右  
衛聖諸軍馬步軍都指揮使仍分衛聖步騎為左右十  
軍以武定軍節度使呂延珂為之使並隸於廷珪二十

八年王師拔劍門加廷珪太子太傅令從元喆統兵以拒王師至綿州聞王昭遠趙崇韜之師皆敗元喆懼退保東川翌日奔歸成都所過盡焚其儲蓄及王師入成都行營都監王仁贍按籍詰所在軍資將歸罪於廷珪廷珪問計於部將康延澤曰吾觀王公志在聲色苟足其欲則置而不問矣廷珪素儉約不蓄樂妓遂求於姻戚家得女妓四人復假貸金帛直數百萬以遺仁贍由是獲免歸朝為右<sup>千</sup>牛衛上將軍卒

王彥銖

彥銖太原人祖義方汾州長史父德誠贈太子少保彥銖性仁弱不好弄讀書究大義天祐中事知祥於太原後入蜀累補節度押衙詔使李嚴之為監軍也密懷異謀知祥數其過命彥銖擒斬之嚴之左右無敢動者知祥破董璋擇腹心有權略俾護其軍於是以彥銖為東川監押及建國轉授右僕射昶襲位歷蓬嘉雅三州刺史出為山南兵馬都監數載罷歸補左右羅城使眉州刺史遷昭武軍節度使轉右衛聖馬軍都指揮使罷歸改左金吾衛上將軍復授昭武軍節度使廣政二十四

年卒於治斯<sup>所</sup>年六十五

### 李奉虔

奉虔太原人本姓王氏祖欽唐濕州刺史父存賢佐唐武皇累著功因賜姓李氏梁人攻上黨莊宗親總大軍以援之存賢先登陷州授盧龍軍節度使奉虔幼有才略不循小節年十四為幽州衙內都指揮使居父喪骨立數歲及知祥鎮蜀奉虔懇請從行補廳直左押衙明宗即位充貢奉使將進攻遂寧王師掩至劍門不守知祥命趙庭隱督兵往拒之署奉虔為兵馬監押時

衆寡不敵人心動搖奉虔與庭隱率勵士卒竟敗王師以功授檢校右僕射昶襲位領嘉州刺史文恩使遷右金吾衛大將軍為昭武軍都監屬夏秋多雨嘉陵江溢出城奉虔置堰開湍瀨二十餘處洩其蓄水築堤以護之城池克完人被其利授昭武軍節度使監護擁節旄自奉虔始人皆榮之入為左右街功德使卒年六十三

### 王昭遠

昭遠成都人幼孤貧年十三依東都僧知誼為童子知祥入蜀飯僧於府署昭遠持巾復從知誼得入時昶方



就學見昭遠聰慧留給事昶左右昶嗣位以為卷簾使  
遷諸司使會樞密使王處回得罪乃以昭遠為通奏使  
知樞密事機務一以委之府庫財帛恣其所取不問未  
幾遷山南節度使判官張廷偉言於昭遠曰公素無勲  
業一旦位至樞近不自建大功何以塞時論莫若遣使  
致書通好并州令其發兵南下我師自黃花子午谷出  
兵應之使中原表裏受敵可坐有關右之地則君之功  
無有出其右者昭遠然之乃言於昶遣人間行齎蠟書  
以往太原為疆吏所獲及王師來伐昶令昭遠與韓保

貞趙崇韜等領兵以抗王師昭遠好讀兵書頗以將略  
自任始發成都昶遣宰相李昊等餞於郊外昭遠酒酣  
攘臂而言曰是行也非止克敵當以此數萬彫面惡少  
取中原如反掌爾及行執鐵如意指揮軍事自方諸葛  
亮時王師已破劍門昭遠大懼俄與王師遇於漢源趙  
崇韜布陣將戰昭遠據胡床不能起崇韜敗乃免冑棄  
甲走投東川為追騎所獲送闕下授左領軍大將軍開  
寶中卒

安思謙

思謙并州人幼事知祥於太原以勤恪聞知祥入蜀補  
為軍校昶襲位頗見親信歷簡邛彭三州刺史奉鑾控  
鶴馬步軍都指揮使武叅軍節度使未之任改左匡聖  
馬步軍都指揮使山南節度時鳳翔監軍王景崇以城  
歸順命思謙率兵應接且略地關中會漢兵圍鳳翔燒  
其雙門景崇遣使來求救昶遣思謙及韓保貞等率兵  
救之兵次右界漢兵屯寶鷄城思謙令保貞分兵趨隴  
州逼汧陽以分其勢又遣先鋒將申貴等分兵走摸壁  
設伏時家林貴以數百人晨壓寶鷄列陣以誘漢兵漢

兵爭出戰貴偽遁漢兵逐之為伏卒所擊退入寶鷄城  
思謙次渭水將引軍濟會羅暎保義軍與東相應掩我  
不備多殺士卒而漢兵復振思謙與諸將議曰糧儲將  
盡而賊勢且盛不如釋之以圖後舉遂班師十二月景  
崇又來告急昶復督思謙令進兵思謙請先運糧四十  
萬斛然後進軍昶覽表不悅謂左右曰古之良將因敵  
取資近者契丹以數十萬眾入中原豈先事飛輓耶揣  
思謙此意必不為朕進取也乃發與州乾渠渡糧食及  
山南諸倉米數萬斛屯鳳州以益之思謙不得已遂進

九  
卷七  
軍次大散關申貴以所部先進擊漢兵燒箭箬寨毀關道遁去貴盡銳追之及安都思謙進軍王女潭又殺漢兵千人漢兵退屯寶鷄城思謙駐軍摸壁時保貞之師攻隴州不能下思謙遂遷延不進會漢兵陷鳳翔景崇死乃班師上表待罪袒釋不問召歸移鎮閬州仍留宿衛思謙以受任無狀為物議所薄頗不自安袒既誅張業宮禁門衛恚加嚴警思謙以其疑已頗惡之言多悖慢三子哀嗣裔恃父權恣橫國人畏之會翰林王藻乘間奏思謙出怨言將圖不軌袒懼翌日俟其入朝伏壯士擊殺之并其三子廣政十七年也

焦彥賓

彥賓字英服滄州清池人父軫唐兗海節度使彥賓少聰慧多智略事後唐武皇尤所委信及莊宗即位遷左監門衛將同正四方節使出護邢州兵知祥移鎮成都詔以彥賓為監軍使與知祥同入蜀康延孝據廣漢彥賓說知祥令召董璋與之協力討賊遂擒延孝明宗即位忿閹豎輩怙勢擅權先朝使四方及逃遁不出者皆就戮之死者殆盡彥賓為知祥保護獲免朝廷因以李

嚴代之彥賓辭疾不歸朝知祥因令判都提學院事未  
幾轉左驍衛上將軍以年老乞代從之彥賓乃營別墅  
鑿池沼植蒲莢養魚以自給袒襲位以先君舊反命全  
給俸祿而不令覲謁俾遂其性廣政十五年卒年七十  
八

### 趙進

進定州人少以膽勇隸天雄軍籍時河北宿兵進累戰  
有功洎莊宗入洛猶在行間屯於清廩祿既薄又不時  
給士卒多怨憤思亂者十七同光末與本軍皇甫暉等

共推副趙在禮相率夜犯鄴城城中士卒莫有鬪志進  
等因陷其城未諭旬兵數萬在禮署進衙內都虞侯三  
城巡檢使莊宗遣元行欽以其言聞因詔明宗馳往招  
諭及入城乃共推戴遽有洛中之變天成初除貝州刺  
史鄴都衙內指揮使明年移典寧州屬慶州叛遣進討  
平之遷雅州刺史知祥入蜀進來覲謁知祥以進始謀  
叛逆將誅之進大懼趙季良諫曰莊宗季年天下思亂  
匪獨貝魏一境公國之懿親所宜責以干紀加其顯戮  
進自知必死歸命於我所宜撫納以責其後效知祥納

之董璋之亂我師致討進戎服謁見而言曰進荷明公  
不殺之恩今日有所報矣請前蹈白刃次命破賊乃署  
為前鋒監陣使先登立功璋平轉左衝山指揮使昶襲  
位歷忠鳳邛普四州刺史右匡聖步軍都指揮使所至  
軍政修舉戍卒有疾苦者必撫問周悉當盛夏寒未  
嘗勞役將士以此樂為之用廣政十七年督部兵戍漢  
中適月以疾聞召還卒於道年六十一

### 石處溫

處溫萬州人本波斯之種仕前蜀為利州司馬同光中

知祥入蜀補萬州管內諸壇點檢指揮使率義兵同收  
歧路時通州大將王允瓊侵擾邊鄙及草寇杜景溫劫  
束鄉豪殺縣令牟孟剽掠戶口焚燒村落處溫與諸軍  
討平之知祥遺書褒美轉寧江軍節度都知兵馬使萬  
州管內義軍都指揮使昶襲位遷興州刺史處溫初據  
石市招納亡命遠近多歸之由是廣事耕墾常積穀數  
十萬石前後累獻軍糧二千餘萬石加之以寶貨昶嘉  
之加檢校司空未幾授萬州刺史移簡州卒年八十

### 孟思恭

九國志 卷七  
思恭字近禮父彥暉潁川人嘗為許州獄吏前蜀王建  
嘗隸忠武軍坐事被繫謂彥暉曰卿能免我他日將厚  
報彥暉遂縱之令亡去及建霸蜀遣使迎之授簡州刺  
史遷漢州團練使思恭弱冠奇峭猿臂善射起家保信  
軍使建嘗集文武射苑中思恭屢中的建大悅賜衣服  
以其女妻之為射馬都尉累遷靜塞軍團練使王衍襲  
位為北路行營都指揮使知祥鎮蜀以其宗姓補先登  
指揮使以所部兵從董璋遣思恭分兵討集州誡之曰  
賊少則與戰賊衆則退守要害我將濟師及遇賊思恭

與之戰不利退求濟師璋怒放思恭歸知祥免之明年  
隨趙庭隱破璋於鷄蹤橋以功改清遠指揮使昶襲位  
加檢校司空改雄義都指揮使屯梓州累遷飛棹都指  
揮使歷劍階忠三州刺史思恭有膽畧善撫士卒廣政  
二十年為峽路行營都指揮使屯赤英山時秋暑未退  
思恭苦熱食冷物浴寒水致疾卒於任年七十二

申貴

貴潞州人弱冠有勇力初事李彥珂為帳下卒天成中  
歸於知祥累補定遠都頭從征伐身當矢石深為諸將

初魚五鼎四字疑有訛

之所推許改決勝耀武指揮使昶襲位遷右衛聖都指  
揮使歷昌渝文眉四州刺史貴貪鄙殘虐所在聚斂財  
貨民不勝其弊與眉州受財鬻獄尤恣暴橫常指獄門  
謂云云曰也我天棧盧其不道如此初魚五縣巡檢令  
之祺誣搆民連賊枷禁以求賂被  
訖下獄責授貴維州司戶參軍馳驛發遣至犀浦賜自  
盡

九國志卷之終

九國志卷八

東漢 世祖以乾祐四年稱帝至英武帝廣運六年國  
滅歷四主凡二十八年

世祖姓劉名旻初名崇後漢高祖母弟也為河東節度  
使乾祐三年隱帝遇弒郭威篡漢四年正月戊寅即位  
於晉陽仍用乾祐年號受契丹冊命在位四年薨年六  
十廟號世祖

睿宗名鈞初名承鈞旻次子受契丹冊命仍稱乾祐七  
年行三年喪服除改乾祐十年為天會元年至十二年

七月戊申薨年四十三謚曰孝和皇帝廟號睿宗

少主名繼恩本姓薛鈞養為子嗣位六十餘日為郭無為所弑

英武帝名繼元本姓何亦鈞養子既襲位仍稱天會十二年越五年改元廣運廣運六年五月癸未降於宋降封彭城郡公淳化中薨追封彭城郡王

蔚進

進太原人少有膂力身長七尺日行二百餘里高祖鎮并汾進以材官給事及高祖領軍令負羈勒開運米南

行留進於太原為崇翊衛即受為步軍指揮使鈞襲位

領建寧軍節度使典親軍如故繼恩監國郭無為授詔

輔導世子無為與進不協出為代州刺史時無為專政

繼恩潛欲圖之進知其必亂自以居親衛之地頗懷危

蹙及有中山之命忻然即路未幾繼恩遇弑國人皆以

進為先見以城納款歸朝授左衛大將軍領檀州刺史

卒年七十三進無他能惟掌兵方嚴所至不敗事劉氏

四王以質直聞歸老中國祿二千石亦武夫之終吉也

張元徽



元徽邢州武安人少以沈勇隸本城爲兵累轉至列校高祖鎮并汾召置帳下累從征討有功晉開運未破契丹於三交以功授代州刺史歷雲州防禦使遷代州與崇素相友善及崇建號領侍衛親軍遷武寧軍節度使崇舉兵南下將圍周室以元徽爲前鋒與周師遇於巴公原元徽以東軍先登陷陣擒監軍使一人降其步卒千人而旋崇大褒賞之元徽乘勝復入馬倒爲周師所擒殺之其麾下十餘騎畢力血戰奪其尸而出俄而崇衆亦敗先是前鋒兵將次巴公一夕營中刁斗皆噉元

徽亟遣謁崇大寨易之凡易數十皆噉而不可學因以白崇怒曰故要吾金鈿也遂止是夜有大星墜元徽營中明日果敗元徽沈原有將帥材善撫士卒輕財好施雖爵祿豐厚而家無餘貲既而軍吏爲立廟晉陽城西北隅塑其象歲時祀之見者必掩<sub>泣</sub>血

### 鄭進

進開封陽武人身長七尺餘翹勇多力漢祖鎮并汾以材官給事素從征討有功即位遷侍衛步軍都指揮使鈞襲位以先朝勲舊賜予彌厚進性慷慨重然諾好施

家無餘貲繼元立馬峯典機密性鄙吝與進不協峯怒  
悉奪其兵柄進不堪辱詬之於朝繼元怒翌日送定襄  
安置遣人殺之於路

### 衛儔

儔吐渾族人少事鈞爲蕃落小底善騎射驍果絕倫明  
書計通六蕃語鈞襲位遷如京使令專掌吐渾一軍以  
從征討所向多克捷虜援兵每至即遣儔居前鋒軍中  
凡布列烽燧措置寨柵皆儔爲之繼元立爲閣人衛德  
貴所嫉出爲遼州刺史吐渾數千人遮道請留繼元不  
許自是一軍失帥不復可用矣儔少長蕃中不樂爲郡  
頗出怨言繼元慮其爲變潛遣人殺之

### 李隱

隱鴈門人少以驍勇隸緣河十寨善騎射有膽畧鈞襲  
位以軍功擢授馬步諸軍都引進使累從征討性純直  
未嘗曲事權要衛儔出知遼州隱惜其忠勇爲倖臣所  
逐頗憤惋形於言德貴聞而惡之白於繼元即日送嵐  
州安置未幾殺之

九國志卷八終

九國志卷九

宋路振撰

南漢

唐天祐元年烈宗為廣州節度使至後主大寶十四年國滅凡六十七年斷自高祖乾亨元年為始凡四年實五十五年

烈祖姓劉名隱父謙為封州刺史有三子曰隱台巖乾

亨元年冬謙卒士民謀亂隱誅之嶺南節度使劉崇龜

表為封州刺史天祐元年朱全忠奏為清海軍節度使

梁開平元年封大彭王三年改封南平王四年進封南

海王乾化元年三月丁亥薨年三十八諡曰襄乾亨元

年追尊曰襄皇帝廟號烈宗陵曰德陵

高祖名龔初名巖又名陟謙庶子乾化元年五月甲辰  
梁以為清海軍節度使三年正月龔封南平王貞明三  
年八月癸巳稱帝建國號曰越改元乾亨追尊祖安仁  
曰太祖父謙曰代祖兄隱曰烈宗乾亨二年十一月改  
國號曰漢凡改元三乾亨九年白龍三年大有十五年  
三月丁丑薨年五十四諡曰天皇大帝廟號高祖陵曰  
康陵

殤帝名玠龔第三子初名洪度封賓王改封秦王及嗣  
位更今名改大有十五年為光天元年二年三月丙戌  
遇弒年二十四諡曰殤

中宗名晟初名洪熙封晉王既弒玠遂嗣位改光天二  
年為應乾元年十一月丁亥改乾和十六年八月辛巳  
薨年三十九諡曰文武光聖明孝皇帝廟號中宗陵曰  
昭陵

後主名張晟長子初名繼興封衛王乾和十六年八月  
辛巳襲位改是年為大寶元年至十四年二月宋師入  
城降封恩赦侯時宋開寶四年也八年進封彭城郡公

太平興國初進衛國公五年薨年三十九追封南越王  
或云歸葬於韶州之越王山

### 劉洪操

洪操字貞度龔第九子洪澤之母弟也幼知書及長有  
識量大有中封萬王十一年吳權攻交趾咬公羨求救  
於龔龔欲乘其亂而取之遣大將梁克貞率兵南下龔  
自護其軍以洪操為靜海軍節度使封交王令統衆趨  
白藤時吳權已殺公羨而據交趾親率衆來逆戰先於  
海口多植捷檝悉銳其首以鐵冒之潮水方漲權乘輕  
船引兵挑戰洪操逐之湏臾潮退戰艦為捷檝所絀士  
卒皆覆溺死者過半遂擒洪操殺之

### 劉洪杲

洪杲字日宣龔第十子母南儀謝氏名宜清有寵洪杲  
十歲封循王好步鬪復便弓馬以膽勇聞諸兄皆尚儒  
學或勸令讀洪杲曰我家立功立事皆起馬上獨使我  
老一經乎龔以兵書教之遂略通義光大初循州賊張  
遇自稱中天八國王擁衆數萬攻下郡邑洪杲請統衆  
討賊玠以其尚幼不許洪杲曰兵法尚變不尚齒也因

令越王為都統洪杲副之次錢帛館軍士方食賊衆奄至洪杲親率數百人介甲躍馬徑入賊中殺數十百人賊為之少却俄而越王領衆繼至與賊大戰自辰及午賊衆益盛圍我師數重矢下如雨軍人多死洪杲矢盡挺劍力戰流血滿袖裨將萬景忻等蒙以大楯翼二王以出賊亦解去洪杲以戰功授桂州觀察使未幾與晉王同謀篡殺應乾初為諸道兵馬副元帥參政事晟初立國中謗議騰沸洪杲請歸罪於劉思潮等晟不從反為思潮等所譖以洪杲謀為亂晟遣思潮偵之一旦洪杲與親信飲酒第中思潮與潭令裡領衛兵排闥而入斬其首以徇

### 蘇章

章封州人少事隱為牙將性忠厚有勇力從征譚圮盧琚有功薛王奏署衙內馬步軍都指揮使從隱討盧延昌於韶州隱率舟師出雙石會天大霧昏暝如夜韶人四出以鐵纜繫巨鈎投隱艦中士卒驚撓章引弓射殺數人以巨斧擊鈎鈎皆斷折纜不能施韶人乃退翌日進逼其城城上望樓中有人罵隱言頗穢褻隱慙甚不

敢視左右章伏艸樓中引弓射罵者應弦而斃舟中皆  
鼓譟時江水暴漲自清遠峽以北湍瀨尤惡糧運不繼  
會延昌父光稠自虔州擁兵來援隱與戰屢敗乃班師  
韶人以兵襲我後遂捨舟而徒士卒不成列隱馬斃章  
以所乘馬援隱因從行為後殿韶人不敢逼以攻遷封  
州刺史充左右街使龔襲位命章典禁衛諸軍白龍中  
楚人舉舟師來伐圍封州敗我師於賀江溺死者千人  
龔乃遣章領神弩軍三千人戰艦百艘援之章至賀江  
沉鐵索水中兩岸設巨輪以挽索築連堤以隱之伏壯  
士堤中章以輕艦逆戰佯不利楚人逐之堤中挽輪舉  
索楚人不能進退乃以強弩夾水射之楚人殲焉收戰  
船百艘以歸遂解封州之圍以功遷團練使章子五人  
俱為中郎將豪俠任氣所為不軌番禺號為五郎將軍  
年老不能致訓會有告其謀叛者逮捕下獄悉斬之章  
以功得不坐慙悸成疾大有十年卒

吳懷恩

懷恩番禺人事龔為內府局丞性謹愿典禁衛二十餘  
年未嘗有少過玠襲位遷內常侍玠好宴樂東西兩教

坊伶官千餘人常晝夜出入宮中懷恩言於玠曰今禁  
中自有簫韶府內樂百餘人皆善音律夜宴用此足矣  
焉用教坊若夜雜入禁中不拘閹籍恐姦人竊發不可  
不慎玠不聽未幾果為陳道庠所弑晟襲位授宮闈諸  
衛押番乾和六年加開封府儀同三司西北面招討使  
與指揮使吳玠領兵侵楚親冒矢石半歲間取梧桂六  
州之地以功加濮陽縣公大寶中王師取郴連鉞懼以  
懷恩為桂州團練使令治戰艦懷恩馭下方嚴臨事精  
至每舟成必自臨視材有良窳不等及制度疏略不法  
者必榜役工役者多怨之又造龍舟十以備鉞親征舟  
成懷恩以綿幕其手徧捫鈎楫匠區彥希在側運斤斬  
之首墜船中左右皆驚走後數日擒彥希斬於市懷恩  
治兵嚴整所至輒有功反被害國人憂之

### 陳道庠

道庠潁川人父璫唐末避亂於封州力絕人隱聞其忠  
勇召至帳下隨隱入廣州遷雄虎將軍卒道庠幼俊爽  
起家為虎賁郎驍果有父風大有未給事晉王府龔疾  
亟命以道庠為元帥府馬步軍都指揮使光大初張遇



賢起循州大掠都邑道庠與萬景忻從越王循王東征  
遇賊錢帛館賊圍之數重自辰及午我師殆盡道庠與  
景忻奮劍大呼殺十餘人賊衆披靡於是掖二王而出  
玠既立所為不法疑羣弟圖已每宴集則令宦官守閣  
供奉將吏悉露索而後入及晟將為亂謀於道庠玠好  
角抵道庠因引多力者劉思潮等數人習角抵於晉王  
府中玠聞而悅焉翌日大置酒長春宮召角抵與諸王  
觀之至夕玠大醉既罷晟遣道庠等掖之因拉殺玠血  
濺寢門左右皆散走晟立以道庠為功臣領英州刺史

出入宮中賞賜優厚既得志頗誅殺勲舊功臣劉思潮  
等皆相次被誅道庠不自安特進鄧仲與璫有舊嘗遺  
道庠漢紀問其意仲咤曰慙獠此書有韓信彭越事審  
讀之道庠大懼遂謀亂事未及發而晟覺之乃收道庠  
伸下獄翌日同斬於市悉夷其族

### 邵廷瑁

廷瑁循州人幼為黃門給事禁中言語峭直與羣閣異  
及長有文武材幹博覽書史尤善騎射玠襲位為內謁  
者遷內府局令總宿衛兵軍務嚴整尤重儒士有自遠

方來者廷瑁必先見之為其資糧而後入薦多被任用  
大寶中遷內常侍時鏐春秋已長而未知稼穡荒於游  
宴人心危懼廷瑁每從容言曰男兒十五奪父志今宗  
社安危繫於陛下願加檢慎鏐建禹餘宮在城東南六  
十里山水竒絕鏐避暑多往焉廷瑁雅所愛尚因請解  
兵職願為宮使鏐從之而令典兵如故廷瑁以諸戎器  
不甚犀利弓弩不能及遠甲鎧銷薄不可以禦大敵乃  
為樣親督工匠造之累言於鏐曰中國亂離久矣我先  
朝乘其間故有南越之地三十年來嶺表無事師之耳

目不識旗鼓今中國已有真主陛下未嘗遣一介之使  
馳咫尺之書珠貝犀象瑇瑁翠羽積於內府歲久而不  
可較陛下未嘗以修聘一旦兵至何以禦之鏐憤然不  
以為慮七年王師克郴州招討使暨彥贊戰死王師乘  
勝取連州鏐始懼乃加廷瑁開府儀同三司東南面招  
討使以舟師屯洗口王師既退廷瑁循撫將士招輯亡  
叛境上蕭然稱為良將因繕治兵甲親加訓練將復郴  
連會同列者嫉之投匿名書言廷瑁將圖不軌鏐信之  
遣使賜廷瑁死士卒排軍門爭入對使者哀訴言廷瑁

無反狀請加考驗弗許軍民冤痛為立廟於洗口至今祀之

### 潘崇徹

崇徹南海人事龔為內侍省局丞頗知書有鈴略乾和中晟遣崇徹率兵攻柳州時江南將邊鎬據湖南發兵來援相遇於宜草崇徹令步將康崇保分兵為兩翼以掩賊江南兵大敗遂克柳州明年潭州節度使王逵率兵五萬來復柳州晟遣崇徹領衆赴之與逵遇於壕石逵兵遠來罷乏不成列崇徹登塚而望喜曰此成擒也

乃縱兵擊之潭人大敗逵僅以身免桂州吳懷恩為部下所殺遣崇徹代領其衆加西北面招討使歲餘以飛語見疑於張遣崇岳來覘其軍戒之曰崇徹果有異志即就誅之崇岳至崇徹知其意悉以所部兵自衛以見崇岳不敢發還以白張曰崇徹日夕領伶官百餘輩並衣錦繡吹玉笛為長夜之飲不恤軍政張方怒會崇徹單騎來歸束身請罪張釋而不問但奪其兵柄自是常怏怏及王師圍賀州刺史陳守忠告急於張召大臣議皆請以崇徹領兵以拒王師崇徹難之辭以目疾張怒

曰何須崇徹伍彥柔獨無方略耶乃以彥柔代領其衆  
彥柔至賀州為王師所擒賀州陷鉞憂迫計無所出乃  
加崇徹內大司馬步軍都統領衆三萬屯賀江會王師  
徑趨韶州崇徹但擁衆自保不為之援王師度馬徑崇  
徹請降從鉞歸朝太祖知其事特赦崇徹以為汝州別  
駕卒

### 郭崇岳

崇岳番禺人宮媪梁鸞真之養子也幼為閹人以慧黠  
聞乾和中為內侍監鉞襲位遷內侍中大微宮使大寶

十二年王師來伐都統李承渥以全師出韶陽為王師  
所敗鉞震駭顧諸將無可使者鸞真即薦其子可用乃  
以為招討使與大將植廷曉統衆六萬守馬迳去番禺  
裁百餘里時王師已過隴頭翌日入馬迳去我寨十里  
游騎據雙女山直瞰我軍頻摩壘挑戰崇岳本無將材  
所統之衆皆韶陽敗卒絕無鬪志廷曉欲出戰崇岳不  
從但堅壁自守晝夜禱祠鬼神而已王師繼至廷曉謂  
崇岳曰北師乘席卷之勢其鋒不易當也吾士旅雖衆  
然皆傷痍舊卒今不驅策而前將坐受其斃亡無日矣

於是領前軍據水而陣令崇岳殿後禦其奔衝既而王師濟水廷曉力戰而死崇岳奔入營王師攻之初一夕南風甚厲至是北風大起王師縱火燒寨崇岳大敗死於亂尸之下

九國志卷九終

九國志卷十

宋三路振撰

閩司空以唐景福二年有泉汀五州地為節度使至天德帝天德三年滅於南唐歷七主凡五十三年

司空姓王名潮字信臣光州固始人唐末為縣佐史與弟審邽審知以材氣知名號三龍屠者王緒聚眾自稱將軍署潮為軍正既誅緒眾推為王時光啓三年八月也至景福二年盡有泉汀五州之地九月戊戌唐以福建觀察使三年九月庚辰并福建為威武軍拜節度使四年十二月丁未薨贈司空

太祖名審知字信通潮季弟景福四年冬潮有疾託審知以大事既卒自稱留後光化元年三月己丑受朝命十月癸卯授本軍節度使天祐元年四月封瑯琊王梁開平三年四月封閩王後唐同光二年辛未薨在位二十九年年六十四謚曰忠懿龍啟初追謚昭武孝皇帝廟號太祖陵曰宣陵

嗣王名延翰字子逸審知長子初審知寢疾命權知軍府既卒自為留後同光四年三月辛酉唐授為節度使明宗天成元年十月己丑建國曰閩稱王十二月辛卯

遇弒

惠宗名鱗初名延鈞審知次子建州刺史王延禀審知養子也既與延鈞弒延翰推為留後天成二年五月癸丑唐以為節度使封瑯琊王三年七月戊辰進封閩王長興四年正月稱帝改元凡改元二龍啓二年永和元年十月庚辰遇弒共在位十年謚曰齋肅明孝皇帝廟號惠宗

康宗名繼鵬鱗長子既弒鱗明日辛巳即位更名昶既而稱節度使奉表於唐明年改元通文四年閏七月辛

已夜拱辰控鶴二都兵作亂比明遇弒永隆謚曰聖神  
英睿文明 武應道大宏孝皇帝廟號康宗

景宗名曦初名延曦審知第二十八子先是被幽私第  
及繼鵬遇弒控鶴軍使連重遇等迎立自稱節度使閩  
國王時通文四年閏七月壬午也是月改為永隆元年  
又奉表於晉在國仍用天子制六年正月山酉為朱文  
進連重遇等所弒謚曰睿文廣武明聖元德隆道大孝  
皇帝廟號景宗

天德帝名延政延曦弟也延曦既立封為富沙王繼因  
延曦肆為醜虐貽書切諫遂成讐敵久之自立為帝以  
建州開國號曰殷改永隆五年為天德元年二年三月  
朱文進弒延曦延政討之十二月衆殺朱文進連重遇  
於天德三年正月迎政為帝復號曰閩是年八月丁亥  
唐兵破建州出降時晉開運二年為唐保大三年也保  
大五年唐封為鄱陽王九年徙封光山王未幾薨贈福  
王謚恭懿

### 王仁達

仁達延鈞從子也幼聰悟博覽群書及長魁梧有機略

用鐵槩每環甲持槩上馬馳刺觀者稱其妙延鈞襲位  
仁達為樓船指揮使王延稟叛與其子繼雄領兵攻福  
州仁達率舟師禦之偽立白幟請降繼雄登舟與語因  
刺殺之以首示延稟大慟士卒擾亂遂擊破其軍擒延  
稟以獻遷親從都指揮使領台州刺史性慷慨自以功  
高又居親衛言事頗肆胸臆延鈞忌之一日延鈞宴羣  
臣酒酣顧為左右曰趙高指鹿為馬以愚二世其理安  
在仁達對曰秦二世幼冲為強臣所蔽故有此弊今朝  
中官吏不滿百人長短善惡陛下皆見之動息飲啄陛

下皆知之敢有蒙蔽聰明擅作威福召族滅之禍者耶  
延鈞大慚因賜金帛以慰之翌日加檢校太傅自是延  
鈞每醉即欲殺仁達私謂所親曰仁達多智略當吾之  
世猶可駕馭觀其詞氣非幼主臣也後竟誣以叛誅之

### 黃仁諷

仁諷建州浦城人少有武幹隸本城為鄉兵以克敵立  
功累遷飛捷指揮使福州林仁翰殺連重遇送首於建  
安迎延政歸王閩中時唐兵僭境不果行遣仁諷護送  
從子繼昌入守閩中以仁諷為福州在城鎮遇使繼昌



庸懦無馭下才人心不安會江南兵逼建安將吏知其必破上下思亂仁諷因之遂與李仁達

等同謀

殺繼昌而自立延政大怒收仁諷妻子戮於市發兵討之時仁達已推立卓儼明令仁諷為城西門軍帥以杆建兵仁諷知妻子已戮臨敵不顧出入奮擊建軍大敗退而謂繼珣曰忠信仁義士之所守也舍此無以立吾頃在建安嘗攻伐今見利忘義不能慎守晚節是不忠也富沙託子於我曾不營救中道而變是無信也與建軍對敵所殺者皆鄉曲故人不仁也棄其妻子使為

魚肉是不義也此身十沈九浮旦夕歸地下何面目以見之因拊膺而哭繼珣曰大丈夫殺身殉名何顧妻子且置是事無輕泄也建軍既退左右以其言白仁達翌日擒斬之并殺繼珣

### 許文鎮

文鎮泉州同安人少事審知為給使累歷內職昶襲位遷文思院使延曦立改金吾使率兵屯臨汀未幾授汀州刺史朱文進竊位以其黨黃紹頗守泉南而臨汀亦叛以應文進留從效殺紹頗以其首送建安文鎮懼乃

諭郡人歸款於延政加大尉兼侍中為治嚴整賞罰必當吏民畏而愛之江南兵圍建州遣將時厚卿分兵攻汀州文縝率衆拒戰擒厚卿遣歸金陵因上表謝罪及建州陷明年文縝率軍吏赴金陵璟後以為汀州刺史未幾改蘄州召歸授建州刺史周顯德中王師圍壽春潘承祐薦文縝有武幹璟令統兵數萬屯紫金山為周師所破擒文縝世宗釋不誅璟割地歸款世宗放文縝歸璟以其失律不復用歸同安坎壈而卒

### 楊思恭

思恭建州建陽人少俊爽好學有心計事昶為同安尉延政聞其名辟為節度巡官襲位遷戶部尚書時兵革屢興國力空匱命思恭為僕射錄國事增山澤壠畝之稅魚鹽蔬果皆倍其莫道路側目號楊剥皮唐兵至建陽延政遣統軍陳望帥衆拒之列寨相屬斥候甚明唐人不敢逼凡月餘不戰思恭遣使以延政之命詰責之望對曰江淮間多精兵將帥練習戰事未可輕敵陛下不以臣不肖舉國中之衆以屬於臣安危之機在此一決今之曠師非臣之怯也且欲觀其變為萬全之策耳

思恭大怒復遣讓之曰淮兵侵凌百姓叛逆睡不交曉  
食不知味且彼之衆不過數千跋涉山川師無停糧將  
軍擁衆盈萬兵精馬壯今乘危投隙與之角戰是以石  
破卵也若曠日持久使其營壘堅固芻粟豐備復何望  
哉將軍受國重恩宜盡死力立功立事以報萬一江淮  
懼而自退將軍無血刃之勞何面目見陛下乎望不得  
已乃引兵渡水唐人張左右翼以擊我軍大敗溺死者  
尤衆延政降思恭遂歸金陵斬於建康市

### 留從效

從效泉州桃林人少隸本城為衛兵征臨汀以功遷冗  
員指揮使朱文進殺延曦竊據福州以其黨黃紹頗為  
泉州刺史從效與其裨將王忠順董思安謀同殺紹頗  
迎立王繼勳為刺史從效自署為平賊統軍俄而文進  
率兵來攻從效開城門與戰文進敗走於是人心悉歸  
於從效會江南兵已平建州從效遂叔繼勳送於金陵  
李璟以從效為清源軍節度使發兵屯郡中一日從效  
謂屯將曰此一方東漸於海與福州世為讐敵南限廣  
川瘴癘之地人使不通西連鄞水皆援徑鳥道近歲干

戈屢動三農廢業冬徼夏斂僅足自贍不煩大軍久駐於此屯將皆不對翌日置酒餞之郊外屯將不得已皆捲旗而去從效遂有漳泉之地李璟不能制累授從效同平章事兼侍中封晉江王從效起自行陳知人疾苦勤儉養民常衣布素涉獵史傳延納名士部內清治吏民愛之王氏有二女嫁為郡人妻從效每給其衣食歲取進士明經謂之秋堂周世宗征淮南從效遣衙將蔡仲興為商人以帛書置草帶中由岳鄂送款內附又請置郟京師世宗以其素附江南恐其非便不許宋朝建

隆初上表稱藩李璟遷於洪州從效遣使假道吳越入貢太祖遣使賜詔書以慰之未至而衙校張漢思陳洪進叔從效遷於東亭漢思自稱留後從效疽發背卒

### 王忠順

忠順泉州人隸本城為鄉軍與從效同殺黃紹頌遷為軍校江南兵逼建州黃思安與忠順同領衆赴難延政屯西門數戰不利延政諭之曰孤以不德致寇公等與從效首誅兇黨克定泉南踰越巖險以兵來援見公等之忠赤也今當勉之思安等俯伏對曰臣以必死奉報

時城中衆心離散或說以去就之計思安曰吾輩世為王氏臣今視其危而叛去天下皆咎有容我者乎衆感其言遂無叛者翌日城陷忠順力戰死之思安整衆歸泉州追兵不敢過

黃思安

見前五  
忠順傳

陳洪進

洪進泉州仙游人少材勇選為州兵留從效殺紹頗遷為指揮使從效將送紹頗首於建安迎延政為閩王郡中以道阻賊盛莫有肯行者獨洪進請往時尤溪賊數

千衆遮道不得前洪進神氣自若語賊曰朱福州已為義師所襲殺之矣爾輩更為何人戍守即持紹頗首示之曰我倍道兼送之建州以嗣君返國爾等無所歸矣賊遂潰散渠帥數人皆聽命因從洪進至建州延政大悅擢洪進為建州馬步軍都指揮使及江南克建州延政歸金陵李璟以留從效為清源軍節度使洪進佐之出戰入守十五餘年以功遷統軍使從效卒其子紹鏐使江南未復小子紹鏐領留後事月餘吳越遣使來聘紹鏐夜召其使與之宴語洪進疑之乃誣紹鏐謀叛欲

以其地入吳越執之送於建康推副使張漢思為留後  
自為副使漢思老且淳謹事無巨細皆決於洪進漢思  
諸子患洪進之專因大宴伏甲府署中將殺洪進酒數  
行地忽大震屋宇皆傾動甲未及發而同謀者告之洪  
進遽起去洪進子文顯文顥俱為牙校請以所部兵擊  
之洪進不許一日洪進置大鑲於袖從子常服安步以  
入府中漢思方處閣內洪進自外鑲其中門使人叩門  
謂漢思曰郡中軍吏以公耄荒不能治請洪進知郡事  
衆情不可遏望以郡印相授漢思錯迂不知所為乃以

印與之洪進出召將吏告之曰漢思昏耄不能治事以  
郡印見授矣將吏皆賀即日置漢思於別館以兵監守  
之遣使如江南請命李煜以洪進為清源軍節度使建  
隆初太祖平李重進於揚州江浙皆納款洪進懼乃遣  
牙校奉表自稱副使言張漢思請老歸第以已領軍事  
太祖賜詔書慰諭乾德二年制授平海軍節度使仍鑄  
印以賜開寶八年江南平洪進遣其子文顥來朝貢因  
降詔洪進入覲至建州聞太祖崩乃還鎮發哀太宗即  
位加檢校太師太平興國二年入朝遂獻所管漳泉二

州之地願朝請加平章事卒年七十二贈中書令謚曰  
順

九國志卷十終

九國志卷十一

宋路振撰

楚武穆王於唐乾寧三年丙辰自立於湘南至  
後唐保大九年辛亥國滅凡五十七年

武穆王姓馬名殷字霸圖唐中和時孫儒劉建鋒戍蔡  
州殷隸軍中及儒敗死衆推建鋒為帥殷為先鋒建鋒  
被殺衆推張佶佶讓於殷時乾寧三年五月也九月唐  
授殷潭州刺史光化元年三月命知武安軍留後未幾  
進本軍節度使梁開平元年四月辛未封楚王後唐天  
成二年六月封楚國王許自開國長興元年十一月已

已薨年七十九謚曰武穆葬於衡陽之上黃

衡陽王名希聲字若訥殷次子殷有子數十人嫡子希振長而賢次希聲與希範同日生以母寵得位長興元年十一月丙戌襲位去建國制十二月唐以為節度使三年七月辛卯薨追封衡陽王

文昭王名希範字寶規殷第四子希聲既歿長興三年八月辛酉襲位九月唐以為節度使四年正月乙卯封扶風郡侯應順元正月壬辰封楚王晉天福四年四月加天策上將軍十一月開天策府開運四年五月壬辰

薨年四十九謚文昭是年六月劉知遠改國號曰漢廢王名希廣希範同母弟希範病以希廣屬拓跋恒將佐以希萼為長恒以勸希廣讓希萼指揮使劉彥瑫等不欲遵奉希廣樞軍府事時越希範薨之四月乙未也七月甲午漢封為楚王十月希萼來奔喪拒之遂構兵乾祐三年十一月希萼陷長沙戊申被害葬劉陽門之外

恭孝王名希萼殷第三子既害希廣遂自為楚王時漢乾祐三年為南唐保大八年十一月丁未也保大九



年二月入貢於唐三月唐以為楚王九月戊寅同母弟  
希崇指揮使徐威作亂執希萼幽於衡山縣希崇既襲  
位國人不附復主希萼為衡山王希崇求援於唐唐命  
邊鎬將兵趨長沙十月鎬入醴陵遂趨希崇入朝十一  
月辛酉盡遷於唐辛未鎬遣先鋒李承戩將兵如衡山  
趨希萼入唐十二月唐仍賜希萼爵楚王以希崇為節  
度使數年希萼薨於金陵賜謚恭孝希崇率兄弟十七  
人奔於周

張佖

佖京兆長安人少通經史咸通初以明經中第累遷宣  
州從事秦彥牧宣州陰養亡命將圖江淮而克暴多忌  
不為吏民所信佖慮其害已乃辭疾去職將歸京師至  
汝陽值秦宗權阻兵佖往依之宗權與語大悅署為行  
軍司馬會宗權叛遣衆四出屢為梁祖所破佖謂劉建  
鋒曰今天下方亂英豪角逐吾觀秦公剛鷲猜忍終不  
能濟大事梁王軍政精明將士悉力一旦全軍奄至吾  
等無賴矣不如早自為謀建鋒孫儒俱從儒殺宗衡自  
領其衆以佖為行軍號令嚴肅衆皆憚之及破揚行密

信有力焉行密逐趙錐據宣州儒與建鋒領衆西上將  
討行密建鋒謂信曰今與孫公權全軍為公刷恥於宣  
州如何信唯唯謝之於是儒盡焚維陽積聚驅其民入  
大屯廣德將先平行密而後北渡及圍宣州糧道阻絕  
士卒大疫反為行密所破信與建鋒率餘衆據湖南推  
建鋒為帥建鋒多私狎每飲酒部曲間有長真兵陳瞻  
者其妻有殊色建鋒通之瞻怒以鉄槌置袖中擊殺建  
鋒建鋒將吏推信為帥信將入府常所乘馬忽蹏蹠不  
止正中信髀仆地不能起者久之時殷征蔣勛於邵州

信謂其將吏曰吾非汝主當迎馬公為之於是磔陳瞻  
於東市遣姚彥章迎殷及殷至信乘肩輿入府受其拜  
謁訖命殷升廳信即降階率將吏拜賀請代殷攻邵州  
梁開平中奏授信朗州永口軍節度使累遷檢校太保  
平章事乾化初移鎮桂林卒於治所子少敵有武畧事  
殷為軍校希範襲位遷永州刺史天福中卒

### 許德勳

德勳蔡州朗山人少為縣吏好讀書史任氣不辟秦宗  
權據淮西德勳往依之擢為右軍判官與殷同在帳下

有州里之舊情好款洽從孫儒討揚州以德勳為踏白都指揮使時淮上饑饉德勳所至必先固圉廩以待儒謂左右曰成吾事者許踏白也自是軍中謀議皆得預焉及儒敗於宣城與劉建鋒同入湖南以功軍奏授檢校太傅兼侍中殷代立以德勳為內外馬步軍都指揮使乾寧四年淮南楊行密遣使來通好以梁祖擅朝政願與殷為兄弟之國以絕梁殷欲許之德勳諫曰行密盜據淮甸抗衡中國明公義修職貢於朝為附庸一旦棄之前功盡廢他日朝廷問罪江表以我為同惡即王

師先至湖上矣不如拒絕之乃心王室長久之策也殷從之天復中淮人攻鄂杜洪求救於朝廷詔發荆湖澧朗兵以援之殷遣德勳與秦彥暉率舟師東下時荆南成汭知梁祖將篡曲意事之乃自擁衆乘巨艦直抵夏口為淮人所敗汭溺死德勳遂與朗州雷彥恭襲破荆南盡俘其府寔及士女伶倫功巧之徒凡數千人以歸天祐二年又領兵畧地荆南還經岳州刺史鄧進忠以城歸附遷岳州刺史梁開平初淮將冷業寇平江以德勳為東西行營步軍都指揮使去淮軍五里下寨業以

遊騎偵邏晝夜不絕德勳選習水者五千人斬木取其  
枝葉戴之各持長刀浮江而下夜犯業營令舉火為號  
俄而營中擾亂自相蹂藉火舉德勳以勁兵奄至大敗  
淮軍斬首千餘級擒業及裨校二十餘人以歸天成中  
淮將王彥章苗倫等寇岳州舟師萬餘人蔽江而下屯  
君山側殷遣德勳率艤艘戰艦千艘以禦之德勳謂諸  
將曰淮人遠來掩吾不備今若以全師臨之必懼而遁  
矣乃潛師屯角子湖偃旗卧鼓夜遣裨將王環以戰艦  
二百斷楊林浦絕其歸路淮人覺之遲明淮人移軍荆

江口將會荆南兵合攻岳陽德勳選輕艦三百令裨將  
詹信先襲淮人且行且戰德勳擁艤艘自後而至大戰  
荆江中淮人大敗斬首千餘級溺死者甚衆擒彥章及  
倫以歸而行密遣使來行成且請二將殷以禮歸之遣  
德勳餞彥章等德勳謂之曰楚國雖小舊臣宿將尚在  
願公此歸勿以湖南為念若須得志當待馬子爭草然  
後可圖也彥章等媿謝而去是後馬氏諸子果爭立為  
江南所滅人以德勳為知言天成二年殷建國拜右相  
卒年七十餘子可瓊

鄧進忠

進忠湘陰人世為土豪兄進思唐中和初為瀏陽鎮將  
黃巢之亂江湖荒饑進思陰養死士千人以防寇盜會  
巢弟黃浩領惡少數千剽劫江左號浪岩軍轉入湖外  
大掠瀏陽進思患之乃與進忠謀率壯士伏山塚間候  
浩軍半過橫出擊之浩軍大敗前後皆遁之浩僅以身  
免縣以事聞於州奏授進思岳州刺史天復中進思卒  
進忠襲位天祐二年許德勳襲京南面出戰艦臨其城  
進忠遣人獻牛酒開門納德勳大亨將士德勳諭以禍  
福翌日舉族南歸長沙賜進忠鞍馬繒帛金銀器令權  
知衡州軍州事未幾奏授刺史同光中卒

姚彥章

彥章字繼徽汝南人少倜儻有武畧乾符中黃巢盜起  
秦宗權召募豪俊以彥章隸帳下善用鉄槊重百餘觔  
每上馬盤辟疾如旋風觀者壯之隨孫儒渡淮拔廣陵  
儒死宣城隨劉建鋒入湖南領直軍最被親信及建鋒  
遇害張佶傷解不能視事佶與彥章首議迎殷遂遣彥  
章率所部迎殷於邵州殷初疑之猶豫未即還彥章入

白殷曰劉龍驤張行軍與足下同功一體之人也不幸龍驤有不測之禍行軍以解病廢是天意人望歸於足下何遽疑也殷釋然遂令彥章統衆先歸國內既定翌日殷至代立以功遷長直都指揮使彥章建議平嶺北七州荐李瓊為游奕使桂州平奏授靜江軍行軍司馬監軍府事遷檢校工部尚書橫州刺史容南龐巨昭歸款彥章率兵迎之遷寧遠軍節度使副使知容州事殷建國拜左相遷昭順軍節度使清泰中加兼侍中卒

### 秦彥暉

彥暉上蔡人宗權之族弟父轍仕郡為牙校彥暉少抗勇有智畧宗權將敗族人懼禍彥暉隨族兄宗衡討揚州宗衡為儒所害彥暉從儒攻宣州儒敗又從劉建鋒入湖南為促生指揮使光化中殷將平嶺北以彥暉及李瓊為七州游奕使率兵平桂州虜劉士進以功奏遷檢校太保天祐末准將劉存劉威領戰棹攻湖南殷以彥暉為在城都指揮使領兵三萬以禦之彥暉潛艘舫於上流以待准人又遣副指揮使黃璠分戰棹三百艘潛瀏陽口存以舟師至越堤屢戰不利乃遣使送書於

殷以請和殷欲許之彥暉曰淮人多詐將緩我師而為變不可信也使者回以其言白存時彥暉與存時對水為陣存登岸遙呼彥暉曰我降矣而公弗許古人有言殺降不祥公豈不為子孫計彥暉怒曰賊踞吾城下而不擊吳顧子孫耶乃鼓譟齊進淮人遁走黃璠自瀏陽口列陣戰艦橫絕大江合擊之淮人大敗擒劉存至夕劉威以輕舸遁去彥暉親戮其裨校百餘人以功奏加檢校太傅開平三年領兵攻朗州殺其將區景思擒節度使雷彥恭及其族屬雷彥雄等七人以歸朗州平遷

道州軍節度使賜襲衣巾帶以毒置巾帽中未幾贊腦裂而卒

### 李瓊

瓊蔡州汝陽人少以驍勇選隸秦宗權帳下後隨孫儒渡淮儒敗又從劉建鋒入湖南為親從都裨校殷代立遷本軍指揮使時湖外初霸王宇未廣議者復請規取嶺北七州之地乃命瓊與秦彥暉為七州游奕使張國英李唐為之副兵克水道柳連四州因水陸齊進屯全義嶺時桂州劉士政遣副使陳可璠營嶺下指揮使王

建武營秦城以拒我師彥暉三戰不利會全義民請為嚮導瓊詰之對曰此去西南有古路背嚴關抵秦城五十里雖生荆棘可通單騎瓊乃白彥暉請以步卒三百騎兵六十以巨槊長劍銜枚夜襲秦城至建武營纜三鼓矣時營中士卒不虞我師之至皆熟寢令騎兵分布柵外自以牛草蒙柵門踰入士卒隨之營中亂自相蹂躪斬首百餘級衆遁走擒建武而歸遲明至大寨係建武以素練示可璠營中可璠不知我師已破秦城寨猶鼓譟未信乃斬建武投首營中士卒震駭彥暉因其驚

擾以全軍擊破之擒可璠降其將吏二千餘人欲部送歸湖南瓊曰我以七千人討桂林若分兵以送降者前有大敵何以當之此敗軍烏雜其心不一不如殺之以全軍直趨桂林此席捲之勢也於是盡坑降兵自秦城以南猶有二十餘柵皆迎風而潰瓊以先鋒兵躡之比至桂林殺戮萬計遂圍其城九日而士政降彥暉班師殷以瓊為桂州刺史令經畧嶺南遂襲容州降龐巨昭明年又與呂師周克韶賀梧三州瓊魁岸多力每食肉十餘觔踞案大嚼眈眈然軍中號曰李大蟲先是桂林



兒童聚戲衢路中忽相驚走曰大蟲來大蟲來至是果  
應瓊治桂林三年招納逋遁法令寬簡吏民使之開平  
中卒於治所年六十八

### 呂師周

師周廣林人吳將蒙之裔孫也父珂少以勇敢隸楊行  
密帳下累戰有功遷黑雲都指揮使師周少勇敢任氣  
隨父征討臨陣未嘗介甲金創被體而談笑自若衆皆  
服其果毅珂卒行密令代其父為指揮使天祐初副指  
揮使綦毋章以所部兵屯上高與湖南為敵境累戰殺

傷者萬餘人遷素州刺史師周性豪率頗通緯候及兵  
書自言世將家子不可保富貴每恣為杯酌狎客常十  
餘人醉必起舞或擊節狂歌慷慨泣下行密聞而疑之  
密遣人偵其動靜師周不自安乃謀於綦毋章曰吾與  
湖南對壘有日矣觀其營上雲飛常紛紛然未易敗也  
馬公寬仁待士有禮吾欲逃死焉公以為如何章曰公  
自圖之章舌可斷而言不可洩也乃遣牙將呂蔚通款  
於我開平初以所部兵大獵境上因歸於湖南章縱其  
親隨之人殷聞師周至甚喜曰吾方圖嶺表得師周足

矣即以為步軍都指揮使領索州刺史明年率兵攻韶  
賀梧象龔富等州與劉隱公十餘戰而克之奏授韶州  
刺史乾化中領兵破飛山蠻斬其帥潘金盛諸蠻悉歸  
欵奏遷檢校太傅清泰中卒

### 廖光齊

光齊有武幹事殷為決勝副指揮使天成末從許德勳  
討荆南屯兵沙頭高季昌之子從嗣為雲猛指揮使驍  
果無敵一日單騎薄德勳營衆不敢出光齊怒言於德  
勳曰此驍童也請為公擒之乃介馬援槍而出與從嗣

格鬪良久光齊偽墮馬從嗣奪槌以擊之反為光齊所  
擒時季昌以數十騎觀於臺上見其子被擒亟令騎士  
來請及入營光齊已拉殺之矣季昌大慟翌日遣使請  
成光齊以功遷決勝指揮使性簡傲使酒因爭飲令毆  
同列黜為邵州教練使未幾復舊職討溪州蠻中流矢  
而卒

### 彭玕

玕吉州廬陵人世居赤石洞為首豪黃巢之後江表寇  
盜蜂起玕於鄉里保聚徒衆得數千人自為首領捕逐

郡盜有功本州補玕永新制置使玕雅好儒學精左氏春秋當兵荒之歲所在饑饉玕延接文士曾無虛日治具勤厚人多歸之廣陵筆工季懣者善為詩什玕嘗貽書於懣以白金十兩市一筆又令懣訪石本五經卷以白金百兩為直廣陵人相謂曰玕以十金易一筆百金酬一卷况得士乎於是蕭謨等數人咸往依之鍾傅據江西其裨將韓德師叛傅令其弟瑊攻破之斬獲甚衆軍政嚴肅樵採不犯傅以瑊為吉州刺史未幾以玕代之玕以傅為輔車之勢會傅死楊行密將攻破豫章虜

鍾匡時玕懼將圖據湖南先遣其黨敖瞻李緒來致書於殷且覘殷之起居殷勞之翌日大宴府中將吏畢集以瞻為上客瞻等歸以語玕曰馬公龍髯鳳眸大人之表其將吏輯睦少長有禮未可圖也玕默然開平中撫州危全諷率素吉之兵以復豫章至象牙潭淮將周平擊破之玕乃以所部并其族千餘人歸款於我殷發兵境上援其輜重至即奏授郴州刺史隴西郡公以希範聘玕女天成中玕卒年七十三兄鄴弟瑊子繼英繼勳

劉昌魯

昌魯字安國相州鄴縣人唐末明經登第釋褐項城主  
簿累遷至尚書郎乾符中出為高州刺史黃巢寇嶺南  
郡縣離析昌魯使其居民據保章以自守一境獲安就  
遷防禦使劉隱入廣州遣其弟龔領兵攻高州昌魯率  
勵丁壯逆戰於城外大破龔軍自以地小力寡終慮為  
隱所吞開平初乃致書於殷曰僕昔占籍鄴中受恩唐  
室葢高三歲過黃巢之亂收合生齒堡於掠山因深為  
漸憑高作壘攻若食淡以勤士卒洎盜賊平定一境獨  
全高涼之民至今相戴而中原多故嶺南不賓劉隱亂  
常僭興師律舉蠻貊之衆成吞噬之心僕嘗訓勵甲兵  
躬當矢石掃壘一戰劉巖遁走雖仗義者必勝恃力者  
必亡然而山越之人瘡痍衆矣殘民以聘所不忍為昔  
古公去幽寶融歸漢千古之下迭為推美僕雖顛愚景  
慕前烈竊惟明公負江湖之固有桓文之業土宇至廣  
仁風素厚願以所部歸款於執事謹刺血染翰上達誠  
悃惟明公圖之殷覽書甚喜即遣指揮使張球率兵迎  
之昌魯盡輦其帑庫及士卒千餘人歸於湖南奏授永  
順軍節度副使兼行軍司馬天成中卒

鄧處訥

處訥邵州龍潭人少為州兵累遷至軍校唐乾符中從  
閔頊征蠻於安南黃巢之亂盜殺潭州觀察使李巢城  
中無主會頊自安南回以所部兵駐郡中傳檄諸州同  
捍寇盜境內以安遣使奉表於朝詔以頊為檢校右僕  
射欽化軍節度使潭州刺史處訥從頊久在安南及是  
欲歸邵州省其親族頊回署處訥為邵州兵馬留後未  
幾衡州刺史周嶽舉兵襲頊殺之因據長沙處訥縞素  
發哀召集將吏諭之曰閔僕射駐軍長沙親扞寇盜布

衣糲食以養士卒救民於塗炭恩德厚矣不幸為鼠輩  
所圖今欲與諸公問罪於周嶽可乎衆皆曰留後為善  
人雪寃敢不從命乃以精卒二千襲嶽殺之梟首於東  
市遂據其城慰撫將吏中外胥悅時景福二年也既而  
州人以狀聞於朝廷詔以處訥為湖南節度兵馬留後  
乾寧元年劉建鋒領衆自豫章至處訥遣其鄉豪首蔣  
勛等領步卒三千斷龍回關殷先至關召勛等諭以禍  
福仍許奏授官秩勛衆皆喜是夕乃棄鎧甲旗幟潰奔  
邵州明日建鋒令前鋒兵盡被邵軍鎧甲張旗幟直趨

潭薄城東門守裨者不之覺且謂卸軍之回也門啓前  
鋒兵經趨府中將吏驚走是日處訥內宴集寮屬了無  
備禦裨將宋全節就擒處訥斬於長史橋側

### 龐巨昭

巨昭不知何許人唐末為容州觀察使精天文緯候之  
學黃巢入廣南巨昭括部內諸蠻得數千人親自選練  
分屯險隘巢寇憚之不敢犯其境以功加寧遠軍節度  
使開平初高州劉昌魯率衆歸附殷遣姚彥章李瓊率  
兵迎之長驅而南前鋒至容州巨昭將歸款於我乃大

享將士而謂之曰李瓊甲馬雄威乘席捲之勢必來侵  
我何策以禦之裨將莫彥昭對曰瓊軍遠來士卒疲乏  
請盡撤諸糧潛兵山谷空城以待之瓊至當據吾城外  
無救援我以全師掩其不備決旬之間瓊可擒也巨昭  
曰吾觀楚氣甚銳未易破也不如以牛酒犒其軍爾輩  
不失為富家翁足矣彥昭不從巨昭殺之迎勞瓊瓊以  
軍徑赴城中俄而廣南劉隱率衆來我師不能守於是  
盡輦其府寔驅其人民以歸巨昭挈其族數百口隨歸  
長沙殷久聞巨昭之名遣使慰勞即日奏授檢校太傅

領容管經畧使巨昭在嶺南嘗占翼軫間有善星因謂所親曰劉隱兄弟不道殘害良民吾終當避難於長沙至是果歸附人或問湖南與淮南國祚長短巨昭曰吾入境來聞童謠曰三羊五馬馬子離群羊子無舍自今以往馬氏當五主楊代當三主後皆如其言貞明中卒年七十六

### 彭師高

師高溪州人世為諸蠻酋長父士然唐末溪州刺史其地西接牂牁羽林南抵桂林象郡東北控澧朗方數千里山水險惡舟車不能通其蠻有六種盤氏為大即盤瓠之種也俗無文法約束繫於酋長當士然之世昆弟強力多積聚故能誘脅諸蠻皆歸之勝兵萬餘人春夏則營種秋冬則暴掠而長沙四境最被其患天福五年士然遣使通款於蜀且請兵同寇澧朗辰三州大畧縣邑希範遣指揮使劉勅劉全明率衡山步卒五千以救之勅等擊敗其兵士然遁去遂進兵襲溪州州在山顶為堡四面斗絕勅選壯士緣崖梯山縛棧道以圍守之士然夜舉烽火以集蠻軍勅於溪澗中置毒蠻軍至飲

其水者皆病嘔不能戰死者甚衆一日南風暴起勅以  
火箭射堡中盡焚其廬舍蠻軍多死士然乃率所部夜  
逾絕險遁入獎州遣師高率諸蠻酋長田泝贊單行方  
向存祐羅君富等携牌印納款於勅班師與師高等  
歸長沙釋其罪厚賜而遣之奏授士然溪州刺史兼溪  
洞招撫使以師高補武安軍牙校師高有勇力善射累  
從諸將征討有功遷衡山指揮使希廣襲位改強弩指  
揮使領辰州刺史希萼舉朗州之衆以攻湖南列戰棹  
於水西軍勢甚盛師高登城觀之白希廣曰朗人驕而  
輕雜以蠻兵其勢易破請假臣步卒三千人南自巴漢  
渡江趨嶽麓後夜擊之請令許可瓊以舟師陣於山前  
破之必矣希廣因與可瓊謀堅沮止之翌日師高見可  
瓊於軍門坐談戰事師高瞑目叱之曰汝反文在面即  
日當殺賊何庸論戰耶拂衣而去乃白希廣請誅可瓊  
希廣不從師高退而嘆曰禍亂如此王稔惡無斷敗亡  
可待矣及朗軍攻長樂門可瓊果束甲以入於賊城陷  
師高被擒希萼命釋之師高溪洞人性曠直不喜阿附  
屢為希萼以罪咎責及希崇篡位令師高衛送希萼囚



於衡山欲使殺之於路而師高奉事彌謹終以保全因與指揮使庾偃同謀立希萼為衡山王後隨希萼歸江南李璟聞其忠節擢為殿直都指揮使後卒於金陵

### 劉言

言吉州廬陵人少事彭玕為伍長以勇幹聞開平中玕納款於湖南言從歸長沙希範即玕之婿也出鎮朗州召言為牙校及希範襲位溪洞酋長多求款附乃以言知辰州軍事以鎮撫諸蠻使之未幾奏授辰州刺史希萼入湖南百役繁興靜江軍指揮使王逵周行逢叛歸

朗州初希萼令其子光贊為朗州留後逵至廢之以馬希振子光惠權軍州事光惠庸懦不能馭羣下但酣營淫戲而已將吏患之逵等懼亂遂與行逢謀遣人往辰州請言為副使言素知逵等亮暴謂其徒曰南方禍亂方始今若不往必加於我矣於是盡留所部以單騎行逵等遂廢光惠推言權留後事時周光順元年也言既立遣使詣闕上表又遣使納款於李璟求授節鉞璟未之許也會希崇逐希萼而自立請援於江南璟遣其將邊錫率師入長沙盡俘馬氏之族歸於金陵二年冬璟

又下詔召言入覲言不行因令副使王逵行軍司馬何景真指揮使張傲蒲公益朱全琇宇文瓊周行逢彭萬和潘叔嗣張文表等統十指揮使同率兵攻湖南逐邊鎬奔歸江南言乃以逵權知潭州軍府事遣使詣闕上表且言逐江南賊軍復馬氏土疆之意周太祖遣使來宣慰三年正月言又遣使上表以長沙經兵火焚毀請就以朗州為治所周太祖下詔升朗州為大都督府在潭州桂州之上以言為檢校太傅同中書門下平章事武平軍節度使逵為潭州刺史武安軍節度使景真為桂州刺史靜江軍節度使指揮張傲而下並領刺史為節度副使或行軍司馬皆言奏請之也是月又遣牙校張崇嗣置邸京師歲時修貢周祖下詔賜言舊屬湖南在京及諸處莊宅邸店時王逵為節度使周行逢為行軍司馬專制湖南威雄漸盛言懼其為變將圖之逵與行逢謀先六月逵率所部兵入湖州殺言部將鄭玟收言囚於別館誣奏言與江南通謀誘引淮賊將并潭朗之地以歸金陵八月周祖下詔奪言官勒歸私第委逵以便宜安置復下詔令逵歸治潭州乃以潘叔嗣權知

朗州軍府事未幾令叔嗣殺言於武陵初民間謂為劉  
黻牙馬氏將亂湖南有謠言曰馬去也不用鞭黻牙過  
今年及邊鎬入長沙盡俘諸馬歸金陵鎬尋為王逵所  
逐奔歸江南是歲言亦為叔嗣所殺皆其驗也

王逵

逵朗州武陵人或名進逵少以驍勇選為靜江兵希萼  
入朗州累遣討賊有功遷本軍指揮使乾祐三年希萼  
攻湖南令逵領戰棹為前鋒陷長沙希萼既立逵有立  
為時剗劍之後城中帑庫盡以焚毀賞賜不足又重構

府署執役者皆靜江士卒相與怨憤聚而謀亂副指揮  
使周行逢聞之以告逵曰士卒怨懟深矣不早為計難  
將及我是不夕乃擁其衆以長柯巨斧斬關以出遂歸武  
陵時希萼方醉遲明始遣裨將唐翥領兵追之不及因  
徑趨朗州士卒皆重趄不復成列逵先已入城伏卒門  
下翥至逵縱兵擊之翥軍大敗追殺殆盡翥僅以身免  
逵乃遂留後馬光惠請辰州刺史劉言為師未幾長沙  
兵亂指揮使徐威等廢希萼而立其弟希崇因希萼於  
衡山行軍司馬廖偃等與指揮使彭思高共立希萼為

衡山王將納之希崇懼納款於江南且請兵為援李璟遣其將邊鎬率師入長沙盡遣馬氏之族歸於金陵璟以鎬為武安軍節度使又遣將劉仁贍率師取岳州鎬將圖朗州密白璟請召言入覲言不行謀於達曰江南召我不往必加兵於我矣為之柰何達曰鎬之此來以制置潭朗為名公如東行正入其莫陵負江湖之阻帶甲萬衆乃欲拱手臣異姓乎鎬新至長沙經畧未定乘人心憤怨引兵攻鎬可一鼓而擒也言然之乃遣與何景真等同起兵於武陵號十指揮使以攻邊鎬達率舟師南上至長沙邊鎬大駭以所部奔歸江南諸州屯守皆罷去盡復湖外之地時廣順二年冬也達遂據長沙與劉言同遣使上表於朝三年正月周祖下詔褒諭達為武安軍節度使達出於行陣本無幹略不能馭群下時諸指揮使受詔為節度副使者數人多留長沙各置牙兵分廳案事軍政淆亂將吏患之每宴集府中喧擊如市達莫能禁止會廣兵乘間盡取梧桂柳連之地達率衆南征敗於壕石而還時何景真朱全琇同在武陵與劉言不協各謀為亂言又以達專制湖南慮其難制

將并長沙之地遠大懼因與周行逢謀召景真全琇領兵討桂林至皆殺之又殺張傲於府中景真之姻也乃率所部兵襲武陵幽言於別館誣奏言欲併潭朗歸款於江南周祖下詔委達以便且處置達既殺言遂移治武陵時顯德元年也世宗下詔以達為武平武安等軍節度使三年世宗征江南詔達為南面行營都統以所部兵逼鄂州攻其長山寨而還復領衆逼宜春道出長沙耀兵金波亭有峒峰集織蓋中占者以為不利遂留長沙令行營副使毛立領兵南下以潘叔嗣張文表為前鋒叔嗣怒至澧陵擁衆而還達聞兵叛乃乘輕舸奔歸武陵叔嗣追殺之於朗州城外

### 周行逢

行逢武陵人少無賴與王逵同里俱為靜江兵事希萼為小校從希萼攻湖南陷長沙靜江軍叛逐逵入朗州破追兵於城門下殺千餘人逵攻邊鎬令行逢領步卒趨益陽拔其寨殺江南兵二千餘人擒其將李建期逵平湖南周祖下詔以行逢為集州刺史充武安軍節度使行軍司馬劉言將并潭朗逵聞而憂之以語行逢行

逢曰言本江西反徒景真全琇今具暴無職相與為亂必矣會廣南兵寇全義行逢乃與達密謀白於劉言請以景真為南面行營招討使使全琇為先鋒令會兵於湖南北至皆殺之達攻劉言於武陵以行逢權知潭州軍府事顯德元年世宗下詔以行逢為武清軍節度知潭州軍府事達奉詔領軍征宜春至長沙不行遣副使毛立潘叔嗣張文表統衆南伐行逢久專湖南之務頗任威刑達屢以言規之行逢不悅叔嗣又怒達即安而令已赴難頗出怨言叔嗣將行行逢泣曰吾恐不見師之入也叔嗣懼至澧陵邑吏請以牛酒犒師毛立不許士卒皆怒叔嗣乃與張文表械立送於行逢明日擁衆回長沙叔嗣既殺達乃迎行逢歸治朗州行逢至懲王達之亂斬叔嗣以徇遂自領兩鎮留後遣使奉表詔以行逢為朗州大都督武平軍節度制置武安靜江等軍事乃表宇文瓊為武清軍節度使張文表為衡州刺史領親衛都指揮使彭萬和為永州防禦使觀察判官李觀象通判軍府事釋毛立為水軍都指揮使行逢既得志恣行誅戮達之子弟及門將吏死者百餘輩性猜忌

每遣人伺察郡縣守宰有聚飲偶語者必逮捕下獄以謀反誅宇文瓊彭萬和興行逢族兄飲酒疑其謀叛夜遣甲士圍其第盡擒殺之麾下之人皆重足脅息是年朝廷遣使儲魚鹽於境上行逢懼乃繕治戎器增築城壁閱諸州鄉兵大修武備皇朝建隆三年以疾卒年四十六葬武陵之肩山子保推嗣行逢性殘忍然為治嚴整不徇私黨躬履儉約以率群下辟署官吏必取兼介之士條教簡約民甚便之有女媀求補吏不許授以耒耜而語之曰吏所以治民也汝才不能任職豈敢私汝以祿姑歸墾田而自活也其妻嚴氏不入府署躬率奴僕耕織以給賦調人民化之率務稼穡四五年間倉廩充寔尤崇信釋氏常設大會齋緇徒畢集行逢徧拜之捧椀執悅親侍湔洗因謂左右曰吾殺人多矣不假佛力何以解其冤報乎

### 何景真

景真武陵人少以強勇隸朗團軍希萼入朗州署步軍都指揮使乾祐三年希萼攻湖南命景真率步騎三千出竹柵屯兵楊柳橋以逼其城湖南指揮使韓禮率步

騎五千陣於橋西景真登橋望之見旂幟不整曰此非  
我敵也乃縱兵擊之潭人大亂奔入城中禮被砲傷至  
其家而卒明日城陷希萼之攻長沙也以其子光贊守  
武陵至是既平湖南乃以景真為朗州衙內指揮使以  
翊光贊王逵周行逢叛於長沙以所步兵奔歸朗州廢  
光贊奪其印授而立馬光惠景真不能拒後又與王逵  
同請劉言為帥會希崇逐希萼而自立請援於江南邊  
鎬入長沙劉言王逵同謀逐鎬乃結景真為十指揮使  
率舟師同攻湖南鎬遁走奏授景真檢校太尉靜江軍  
節度使景真求歸治所言不許留於長沙與王逵不協  
求歸朗州許之時劉言以為使相景真不能下之每使  
酒悖慢言不勝其忿且意王逵等遣景真伺已也將誅  
逵景真而欲殺言以據朗州事未及發逵皆偵知之因  
與周行逢密謀將先誅景真後圖劉言會廣南兵入寇  
因偽召景真為招討使會兵於長沙景真即日以牙兵  
百餘人徑往湖南逵迎勞於郊相見甚歡館於馬氏之  
故第宴飲彌日多選妓女真帳幄中景真流連月餘逵  
乃遣人偽自朗州來者傳劉言之命就詰景真曰邊寇



槍懷委公以戎事公耽淫縱酒遲留不發太師以公觀  
望命械公歸西府時景真已醉愒恍不知所為乃俛首  
就縛送朗州殺之於路

九國志卷十一終

九國志卷十二

宋張唐英補撰

北楚武信王於梁開平元年據有荊州旋得歸峽至  
宋乾德改元國除傳襲四世五帥凡五十七年  
武信王姓高名季興字貽孫陝州硤石人本名季昌避  
後唐諱更今名初隸朱友讓得見全忠竒其才命友讓  
畜為子冒姓朱氏補制勝軍使天復三年拜宋州團練  
使徙潁州防禦使復姓高氏梁開平元年五月拜荆南  
節度使乾化四年八月封渤海王龍德三年十月戊寅  
梁亡入覲於後唐同光二年三月丙午封南平王天成

二年因掠唐部送蜀貨削爵官乾貞二年六月稱藩於吳是年十二月丙辰薨年七十一謚武信葬於江陵城西之龍山鄉

文獻王名從誨字遵聖季興長子既襲位吳以為節度使懼唐見討復修職貢時為嗣位之明年唐天成四年也是年七月甲申唐復以為節度使追封季興為楚王長興三年二月賜爵渤海王應順元年正月改封南平王荆南介於吳楚自吳稱帝而南漢閩楚皆修貢中原假道境上自季興以來常邀掠貨物諸道移書誚責即

復還之無慚色其後南漢與閩稱帝從誨所嚮稱臣利其賜予諸國目為高賴子又曰高無賴漢乾祐元年十一月癸卯薨年五十八葬於龍山鄉明年漢加謚文獻貞懿王名保融字德長從誨第三子漢乾祐元年十二月丁丑漢以為荆南節度使周廣順元年封渤海郡王顯德元年正月丙子進封南平王宋建隆元年八月薨年四十一葬於龍山鄉宋加謚貞懿

侍中名保勗字省躬從誨第十子保融同母弟也保融卒世宗以為荆南節度使建隆三年十一月卒年三十

九贈侍中

侍中名繼冲字成和保融長子保勗既歿宋以為荆南節度使乾德元年二月宋師至納土出降十月至闕下授武寧軍節度使鎮彭門幾十年開寶六年卒年三十一贈侍中

李景威

景威公安人幼隸於軍而頗有智略累以戰功遷黑雲指揮副使保勗以為衙內兵馬副使繼冲嗣位多委任之初慕容延釗等伐張文表景威乘間見繼冲曰今王師雖稱假道以收湖湘然觀其勢恐因而襲我景威欲效犬馬之力願假兵三千人於荆門中道險隘處設伏候其夜行發伏攻其上將王師必退却回軍收張文表以獻於朝廷則公之功業大矣不然則有搖尾求食之禍繼冲曰吾家世世貢獻朝廷必無此事爾無過慮况爾非慕容延釗之敵也景威又曰俗傳江陵諸處有九十九洲若滿一百則有王者興自武信王之初江心深浪之中忽生一洲而滿百昨此洲漂沒不存茲可憂也繼冲又不聽景威知計不行自扼吭而死及王師入城

繼冲悔不用其言太祖聞景威之計曰彼忠其主也命  
王仁贍厚恤其家

九國志卷十二終